

MESYUARAT PERTAMA, PENGGAL KELIMA
PARLIMEN KEEMPAT BELAS
2022

HARI KHAMIS : 24 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9 HINGGA NO. 92)**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB DATO' DR. XAVIER JAYAKUMAR A/L
ARULANANDRAM [KUALA LANGAT]**

TARIKH : 24 MAC 2022 (KHAMIS)

SOALAN

Dato' Dr. Xavier Jayakumar A/L Arulanandram [Kuala Langat] minta **MENTERI PEMBANGUNAN WANITA, KELUARGA DAN MASYARAKAT** menyatakan dasar baru JKMPay di mana pembayaran bantuan bulanan dipotong sebanyak 50% dan dimasukkan dalam kad Cashless JKMPay yang mengehendkan penggunaannya. Nyatakan jumlah wang diterima oleh individu dalam kad ATM serta dalam kad Cashless JKMPay. Berapa jumlah keseluruhan pembayaran bulanan yang dibayar oleh JKM setiap bulan bagi setiap negeri.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) sedang melaksanakan satu inisiatif baru iaitu **projek Bayaran Bantuan Kewangan Tanpa Tunai (Cashless, dengan izin) atau dikenali sebagai JKMPay**. Projek ini berstatus **PROJEK RINTIS** dilaksanakan mulai bulan Februari 2021 ke atas **penerima bantuan kelulusan baharu sahaja dan tidak melibatkan penerima bantuan sedia ada** bagi semua skim bantuan kewangan bulanan Persekutuan.

Pelaksanaan Projek Rintis adalah bagi menilai kebolehlaksanaan **Bayaran Bantuan Kewangan Tanpa Tunai di kalangan penerima**

bantuan dalam menyokong ke arah mewujudkan masyarakat digital selaras dengan Rangka Tindakan Ekonomi Digital Malaysia 2021 dan Memacu Transformasi Perkhidmatan Digital Sektor Awam melalui kerjasama Sektor Korporat.

Penerima baharu juga kekal menerima kesemua jumlah keseluruhan bantuan yang diluluskan **secara 100% iaitu 50% dibayar melalui bank dan 50% lagi akan dimasukkan ke kad JKMPay untuk berbelanja secara tanpa tunai.** Sehingga Februari 2022, sebanyak **RM9.2 juta** telah diperuntukkan kepada **4,752 penerima bantuan baharu** yang menyertai projek rintis ini.

Selain itu juga, sehingga **Februari 2022, sebanyak RM4.18 juta** telah dibelanjakan oleh peserta bagi tujuan pembelian **keperluan makan/minum iaitu 80.8% atau RM3.37 juta; 16.2% atau RM678 ribu bagi pembelian keperluan rumah** seperti lampin bayi, tuala wanita, sabun pencuci dan lain-lain. **2.3% atau RM96 ribu bagi keperluan lain** seperti pembayaran bil dan utiliti, tambah nilai prabayar (*top-up*) dan **0.7% atau RM29 ribu dibelanjakan bagi tujuan pembelian ubat-ubatan.** Ini menunjukkan bahawa program ini **memberi impak yang baik dan manfaat kepada peserta dalam memenuhi keperluan asas mereka.**

Tuan Yang di-Pertua,

Berdasarkan kepada kajian penilaian enam (6) bulan pertama projek yang melibatkan 1,066 peserta pada Oktober 2021, 61% responden adalah penerima bantuan baharu bagi skim OKU mendapati bahawa:

- 1) **76% setuju bantuan kewangan tanpa tunai** memudahkan;
- 2) 80% menyatakan bantuan kewangan tanpa tunai lebih selamat berbanding perbelanjaan tunai;
- 3) 80% menyatakan kawalan perbelanjaan mereka lebih baik melalui kaedah bantuan kewangan tanpa tunai; dan
- 4) 73% berpuas hati dengan transaksi dan jumlah kedai di kawasan.

JKMPay tidak bertujuan untuk **menyekat mana-mana hak kebebasan** OKU untuk berbelanja. Apa yang diwujudkan adalah **mekanisme atau kaedah berbelanja ditambah atau diperluaskan** lagi di mana selain daripada perbelanjaan tunai, penerima boleh melaksanakan perbelanjaan secara tanpa tunai. Malahan melalui kaedah tanpa tunai ini, **tiada caj tambahan atau fi transaksi dikenakan** berbanding sebagaimana caj RM1 boleh dikenakan jika mengeluarkan duit melalui Mesin Teler Automatik (ATM).

Memandangkan pendigitalan penyampaian perkhidmatan ini merupakan agenda masa depan negara, Kementerian akan memastikan usaha penambahbaikan projek rintis ini sentiasa dilaksanakan agar dapat memberi manfaat dan memudahkan penerima bantuan.

Justeru, satu **kajian menyeluruh** akan dilaksanakan bagi memastikan suatu hala tuju dan dasar berkaitan projek ini dapat ditentukan. Dalam tempoh masa tersebut, projek ini **akan kekal berstatus projek rintis** di lokasi sedia ada dan **tidak akan diperluaskan** ke negeri/daerah lain sehingga laporan kajian menyeluruh tersebut dibentangkan.

Kementerian sentiasa mengalu-alukan dan membuka peluang kepada semua pihak untuk memberikan pandangan dan juga cadangan dalam menambah baik pelaksanaan program ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 24 MAC 2022 (KHAMIS)

SOALAN

Dato' Seri Utama Haji Mukhriz bin Tun Dr. Mahathir [Jerlun] minta **MENTERI KOMUNIKASI DAN MULTIMEDIA** menyatakan apakah strategi dan langkah-langkah jangka panjang yang dilakukan untuk merapatkan jurang digital antara bandar dan luar bandar bagi memastikan tiada pihak yang tercicir dari pembangunan arus perdana.

JAWAPAN

Tuan Yang Dipertua,

Untuk makluman Ahli Yang Berhormat, tidak dinafikan tumpuan khusus diberikan kepada rancangan untuk meluaskan liputan di kawasan luar bandar dan terpencil, selain juga menambah baik perkhidmatan jalur lebar secara keseluruhan. Ketersediaan maklumat infrastruktur digital sedia ada serta data lain yang berkaitan daripada pelbagai sumber juga akan dipertingkatkan untuk membolehkan perancangan yang lebih berkesan serta merapatkan jurang digitalisasi antara bandar dan luar bandar agar tiada elemen keciciran di pelbagai lapisan masyarakat terhadap dunia teknologi kini.

Kementerian melalui Suruhanjaya Komunikasi dan Multimedia Malaysia (SKMM) dan *Malaysia Digital Economy Corporation* (MDEC) sentiasa cakna dan prihatin akan jurang digital yang berlaku antara

SOALAN NO : 10

bandar dan luar bandar. Pelbagai inisiatif disusun atur dan dilaksanakan bagi memastikan tiada pihak yang tercicir dari pembangunan arus perdana yang melibatkan kualiti perkhidmatan internet jalur lebar serta ekonomi digital di samping meletakkan ia keutamaan dalam memastikan pelaksanaan dan pembinaan teknologi di negara ini berjalan lancar.

Antara inisiatif untuk menambah baik infrastruktur bagi merapatkan jurang digital di Malaysia melalui Pelan Jalinan Digital Negara (JENDELA) fasa 1 setakat suku keempat tahun 2021 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
Lokasi	Perancangan	Siap	Perancangan	Siap	Perancangan	Siap	Siap	Pelaksanaan
Malaysia	3,205	1,311	30,810	30,180	2,527,184	1,890,899	437	402
Jerlun	2	1	50	53	1,698	1,482	-	-

Manakala peratusan liputan 4G di kawasan berpenduduk di Malaysia telah meningkat kepada 95.40% pada suku keempat 2021 berbanding 92.03% sebelum pelaksanaan JENDELA pada suku kedua 2020. Di Parlimen Jerlun pula, liputan 4G telah meningkat kepada 96.86% pada suku keempat 2021 berbanding 82.45% sebelum pelaksanaan JENDELA pada suku kedua 2020.

Parlimen	% 4G (LTE) Kawasan berpenduduk	
	Sebelum JENDELA (Q2 2020)	JENDELA (Q4 2021)
Malaysia	92.03%	95.40%
Jerlun	87.38%	99.91%

Selain itu, usaha penambahbaikan rangkaian selain dari pembinaan menara-menara telekomunikasi, Pihak Kerajaan turut akan melaksanakan Penyediaan infrastruktur jalur lebar menggunakan kaedah *Point of Presence* (PoP) yang akan menjadikan sekolah sebagai hab untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Kawasan berhampiran sekolah di luar bandar dan pendalaman ini dipilih berikutan lokasi bangunan sekolah yang merupakan fasiliti umum. Kedudukannya juga adalah dikelilingi dengan kediaman, pejabat kerajaan, kawasan perniagaan, kemudahan

awam dan komersil lainnya.

Fasa 1 akan melibatkan 630 buah sekolah dan Fasa 2 pula akan melibatkan 3693 buah sekolah kawasan luar bandar di seluruh negara. Pelaksanaan inisiatif ini akan meliputi skop:

- (i) Pemasangan gentian optik dari *Point of Interconnection* (PoI) ke PoP hingga ke kawasan *Premises Passed*;
- (ii) Penyediaan perkhidmatan internet Jalur Lebar Talian Tetap (JLTT) ke kawasan populasi dan juga bangunan yang berhampiran; dan
- (iii) Penyelenggaraan infrastruktur gentian optik.

Keseluruhan jumlah PoP di kawasan luar bandar Kedah adalah sebanyak 368 dan daripada jumlah tersebut pula sebanyak 5 buah sekolah luar bandar di Parlimen Jerlun akan terlibat dengan pelaksanaan PoP Fasa 1 manakala bagi Fasa 2 pula sebanyak 30 buah.

Selain daripada teknologi yang sedia ada, kementerian juga melalui SKMM sedang meneliti teknologi baharu yang akan membantu meningkatkan kualiti perkhidmatan kepada pengguna. Antaranya teknologi TV White Space (TVWS) yang boleh menggunakan jalur spektrum dari 470MHz hingga 694 MHz iaitu jalur spektrum yang sama diperuntukkan kepada perkhidmatan penyiaran TV, yang tidak digunakan dan berupaya menawarkan kelajuan sehingga 72 Mbps. Sebagai percubaan, teknologi ini telah dilaksanakan di Lenga, Pagoh dan yang terkini di Sabah.

Untuk makluman Ahli Yang Berhormat, selain daripada inisiatif-inisiatif bersifat infrastruktur telekomunikasi, Kementerian juga melalui SKMM telah menyediakan Pusat Ekonomi Digital Keluarga Malaysia (PEDi) yang beroperasi di kawasan yang kurang mendapat liputan jalur lebar seperti di kawasan luar bandar dan pedalaman serta masyarakat yang tinggal di kawasan perumahan kos rendah di kawasan bandar. Objektif utama PEDi adalah untuk menyediakan capaian Internet secara kolektif kepada masyarakat dan kawasan yang kurang mendapat liputan jalur lebar. Selain kemudahan capaian Internet, pelbagai kursus dan

latihan berasaskan teknologi maklumat dan komunikasi (ICT) turut disediakan.

Fungsi dan peranan PEDi telah diubah untuk menjadikan PEDi sebagai tempat untuk masyarakat setempat mengambil bahagian dalam program-program berkaitan e-dagang yang disediakan dan aktiviti yang menggalakkan penciptaan digital serta penyebaran dan penguasaan ilmu pengetahuan digital. Program/aktiviti ini boleh meningkatkan tahap kesedaran dan penglibatan komuniti ke arah peningkatan taraf sosio-ekonomi dan seterusnya memperkasa modal insan dalam kalangan masyarakat luar bandar. Ia secara tidak langsung merapatkan jurang digital di antara masyarakat bandar dan luar bandar.

Di samping itu, pelbagai program yang dikelolakan oleh MDEC juga turut diberi perhatian bagi menggalakkan penggunaan teknologi digital yang akan membolehkan masyarakat bandar dan luar bandar mendapat manfaat daripada inisiatif ekonomi digital negara seperti PeDAS, eRezeki dan eUsahawan. Pada tahun 2022, Kerajaan melalui MDEC menyasarkan untuk meluaskan pelaksanaan program PeDAS di 30 buah PEDi terpilih yang akan dikenal pasti dalam masa terdekat. MDEC juga menyasarkan untuk melatih seramai 5,000 usahawan dan mencapai jumlah jualan sebanyak RM15 juta.

Kerajaan akan terus mempergiatkan usaha meningkat akses perkhidmatan dan kualiti internet bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan dan jurang digital dapat dikurangkan di antara penduduk bandar dan luar bandar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATO' HAJI MOHD FASIAH BIN
HAJI MOHD FAKEH [SABAK BERNAM]**

TARIKH : 24 MAC 2022 (KHAMIS)

SOALAN

Y.B. DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI KEWANGAN** menyatakan jumlah nilai ringgit transaksi Pembayaran Tanpa Tunai bagi tempoh tahun 2021 termasuk yang menggunakan baucer (*voucher*) dan nyatakan agensi-agensi Kerajaan yang telah menerima kaedah pembayaran tanpa tunai ini serta nyatakan langkah Kerajaan bagi menggalakan dan meningkatkan lagi kaedah pembayaran tanpa tunai ini khususnya menggunakan baucer (*voucher*).

JAWAPAN

Tan Sri Yang di-Pertua,

Di Malaysia secara keseluruhannya, kadar pertumbuhan penggunaan pembayaran tanpa tunai atau e-pembayaran tertinggi telah direkodkan pada tahun 2021, di mana bilangan penggunaan e-pembayaran meningkat sebanyak 30% dari tahun 2020. Kadar ini adalah dua kali ganda lebih tinggi berbanding dengan purata **9 tahun** pertumbuhan sebelum pandemik COVID-19 (2011 – 2019: 15%). Jumlah nilai ringgit transaksi e-pembayaran pada tahun 2021 pula merekodkan peningkatan sebanyak 13% kepada RM25.3 trilion berbanding tahun sebelumnya (2020: RM22.5 trilion).

Selaras dengan Rangka Tindakan Ekonomi Digital Malaysia atau *MyDigital Blueprint* yang menyaran kerajaan menyediakan pilihan pembayaran tanpa tunai di semua kementerian dan agensi menjelang 2022, hampir semua agensi utama kerajaan telah menerima kaedah pembayaran tanpa tunai.

Jabatan Akauntan Negara Malaysia (JANM) merekodkan terimaan e-pembayaran oleh agensi-agensi Kerajaan bagi tahun 2021 berjumlah RM121.63 bilion, kenaikan sebanyak 59% dari tahun 2018 (RM76 billion). Jumlah nilai ringgit e-pembayaran ini melibatkan 8.3 juta transaksi, kenaikan sebanyak 4,384% berbanding tahun 2018 (0.185 juta transaksi) dan merupakan 73% daripada keseluruhan terimaan pembayaran agensi-agensi Kerajaan pada tahun 2021 yang berjumlah RM167.56 bilion.

Sehingga tahun 2021, terdapat **216** sistem e-pembayaran aktif di Kementerian/Jabatan Persekutuan yang merangkumi terimaan Kerajaan secara elektronik di *Terminal Point of Sale* (POS), melalui portal Kementerian atau Jabatan dan Portal Bank melalui perbankan Internet dan perbankan mudah alih.

Kejayaan pelaksanaan e-pembayaran dalam sektor awam, sebagai contoh ialah Jabatan Imigresen Malaysia (JIM) yang telah berjaya mencapai penggunaan 100% kutipan secara e-pembayaran di semua cawangan termasuk Pusat Transformasi Bandar (UTC).

Bagi menggalakkan penggunaan **e-pembayaran**, pelbagai inisiatif telah dilaksanakan oleh Kerajaan, antaranya seperti berikut:

- i. Menyediakan pelbagai pilihan e-pembayaran alternatif dalam pasaran seperti pembayaran menggunakan **kod QR** yang tidak melibatkan penambahan kos perniagaan;
- ii. Meningkatkan kesedaran pengguna melalui **program jangkauan dan kesedaran** serta program bersama kumpulan sasar seperti perusahaan mikro, kecil dan sederhana. Contoh inisiatif berkaitan ialah Program Transformasi Digital Pasar Siti

Khadijah yang dilancarkan baru-baru ini, di mana seramai 321 peniaga (80.3%) kini menerima kaedah e-pembayaran; dan

- iii. Kerajaan telah mengambil langkah untuk meningkatkan kesalinghubungan digital di seluruh negara, dengan **kadar penembusan Internet** bertambah baik daripada 66.6% pada 2014 kepada 87.4% pada 2018. Seterusnya, Kerajaan telah melancarkan program JENDELA yang merupakan pelan infrastruktur digital 5 tahun yang komprehensif bertujuan untuk menangani keperluan dan permintaan untuk liputan jalur lebar tetap dan mudah alih berkualiti di seluruh negara. Pelbagai inisiatif untuk menambah baik akses orang ramai kepada peranti mudah alih pintar juga dilaksanakan seperti Jaringan Prihatin yang memberikan subsidi kepada isi rumah berpendapatan rendah untuk membeli peranti mudah alih dan melanggan perkhidmatan jalur lebar mudah alih; dan
- iv. Kerajaan juga dalam proses menyediakan dan membangunkan satu platform e-pembayaran untuk Kementerian/Jabatan yang belum mempunyai sistem sendiri iaitu **Sistem Terimaan Elektronik Kerajaan Persekutuan (iPayment)**. Sistem ini merupakan satu platform alternatif bagi sistem terimaan yang membolehkan orang awam membuat urusan perkhidmatan Kerajaan Persekutuan secara dalam talian serta mempunyai ciri *end to end process* dan akan berintegrasi dengan sistem Perakaunan Kerajaan, iGFMAS.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIVAKUMAR VARATHARAJU
NAIDU [BATU GAJAH]**

TARIKH : 24 MAC 2022 (KHAMIS)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI PELANCONGAN, SENI DAN BUDAYA** menyatakan tentang keperluan untuk membuka pintu antarabangsa bagi menggalakkan industri pelancongan di negara kita. Apakah sasaran pelancongan dalam negeri dan pelancongan antarabangsa bagi tahun 2022. Bagaimanakah SOP COVID-19 yang bakal dilaksanakan itu tidak menghalang minat pelancong antarabangsa memasuki negara kita.

JAWAPAN

Tuan Yang di-Pertua,

1. Industri pelancongan adalah sektor yang paling teruk terjejas akibat penularan wabak COVID-19. Pada tahun 2020, negara kita hanya menerima ketibaan sebanyak 4.3 juta pelancong antarabangsa berbanding 26 juta pada tahun 2019. Dengan pintu sempadan yang belum dibuka sepenuhnya, statistik ini terus suram pada tahun 2021. Dari segi pendapatan pelancongan pula, sebanyak RM12.7 bilion dicatatkan pada tahun 2020 berbanding RM86 bilion pada tahun 2019.
2. Berikutan penutupan sempadan negara dan sekatan-sekatan terhadap aktiviti-aktiviti pelancongan dalam tempoh Perintah Kawalan Pergerakan (PKP), Kementerian Pelancongan, Seni dan Budaya (MOTAC) menganggarkan kerugian pendapatan pelancongan adalah melebihi RM100bilion pada tahun 2020 dan jumlah kerugian dianggarkan terus meningkat pada tahun 2021.
3. Justeru, adalah amat penting bagi negara untuk membuka semula sempadan negara secara berperingkat dan selamat untuk tujuan pelancongan.
4. Berdasarkan Pertubuhan Pelancongan Dunia (UNWTO), pelancongan domestik akan terus memacu pemulihan dalam industri pelancongan mengambil kira penularan varian Omicron. Justeru, fokus utama MOTAC bagi tahun 2022 adalah pemulihan industri pelancongan negara dengan tumpuan pada:
 - (i) pelancongan domestik dan antarabangsa;
 - (ii) naik taraf dan penyelenggaraan kemudahan pelancongan;
 - (iii) pembukaan sempadan negara menerusi destinasi terpilih; dan
 - (iv) menambah nilai kepada Acara Perniagaan (*Business Events*)
5. Sehubungan itu, bagi tahun 2022, MOTAC mensasarkan pendapatan pelancongan domestik mencecah 60% daripada RM103 bilion yang dicapai pada tahun 2019 (pra-pandemik). Bagi pelancongan antarabangsa pula, jumlah ketibaan pelancong asing yang disasarkan

SOALAN NO : 12

adalah seramai 2 juta. Sasaran ini akan dipengaruhi pencapaiannya oleh dasar pembukaan pintu sempadan negara kita, negara pasaran serta arahan Kerajaan dan peraturan semasa yang berkuatkuasa.

6. Sementara itu, Kerajaan telah bersetuju untuk melanjutkan projek rintis Gelembung Pelancongan Antarabangsa Langkawi (LITB) sehinggalah pintu sempadan negara dibuka sepenuhnya. Projek rintis ini adalah medan percubaan bagi menguji mekanisme, keupayaan dan kesiapsiagaan negara dalam menerima kedatangan pelancong asing, terutamanya dengan keadaan negara berusaha untuk mengekang penularan COVID-19.

7. SOP kemasukan pengembara asing ke Malaysia melalui LITB juga telah diselaraskan mengikut ketetapan dan garis panduan terkini yang dikeluarkan oleh Kementerian Kesihatan Malaysia (KKM). Penambahbaikan ke atas SOP ini akan menjadi penanda aras terhadap SOP pembukaan sempadan negara kelak.

8. Kerajaan akan sentiasa memantau keberkesanan pelaksanaannya dan melaksanakan penambahbaikan berterusan bagi memastikan SOP ini kekal praktikal dan relevan serta mampu mencetus keinginan pelancong ke Malaysia secara berterusan tanpa kompromi kepada protokol keselamatan kesihatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 24 MAC 2022 (KHAMIS)

SOALAN

DATUK WILSON UGAK ANAK KUMBONG [HULU RAJANG] minta
MENTERI KANAN PENDIDIKAN menyatakan cadangan:

- (a) membina satu sekolah menengah di Daerah Baru Bukit Mabong, Tunoh, Baleh, Kapit dan membina satu sekolah menengah di Daerah Nanga Merit, Bahagian Kapit ; dan
- (b) membina satu sekolah vokasional di Daerah Baru Bukit Mabong, Tunoh, Baleh, Kapit.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha untuk menyediakan prasarana dan kemudahan infrastruktur pendidikan kepada semua murid di seluruh negara, termasuk di kawasan Hulu Rajang, Sarawak.

Untuk makluman Ahli Yang Berhormat, untuk memastikan setiap pembinaan sekolah baharu dilaksanakan dengan teratur, KPM mendapatkan input dan cadangan daripada jabatan pendidikan negeri (JPN). KPM kemudiannya melaksanakan analisis keperluan secara terperinci termasuk menganalisis kesediaan tapak atau tanah, bilangan

dan kapasiti sekolah sedia ada yang berhampiran, kepadatan penduduk di kawasan sekitar, liputan kawasan tadahan penduduk (*catchment area*) serta perancangan pembangunan kawasan tersebut berdasarkan perbincangan bersama pihak berkuasa tempatan (PBT).

Berdasarkan semakan rekod KPM, Sekolah Menengah Kebangsaan (SMK) Balleh merupakan satu-satunya SMK di kawasan Bukit Mabong, Kapit, Sarawak. Kapasiti sekolah tersebut adalah untuk 500 orang murid dengan kemudahan asrama untuk 300 orang murid. Pada masa kini, sekolah tersebut beroperasi secara satu sesi dan enrolmen murid masih belum mencapai tahap optimum iaitu 200 orang murid. Sehubungan dengan itu, KPM berpandangan bahawa SMK sedia ada di kawasan Bukit Mabong, Nanga Merit masih dapat menampung keperluan pendidikan bagi murid di kawasan Hulu Rajang, khususnya di daerah Kapit.

Berhubung cadangan pembinaan sekolah vokasional di Daerah Baru Bukit Mabong, KPM ingin memaklumkan pada masa ini, terdapat enam buah kolej vokasional, sebuah sekolah menengah teknik dan 15 sekolah menengah harian yang menjalankan Pendidikan Vokasional Menengah Atas (PVMA) di negeri Sarawak. Sehingga kini, kapasiti sekolah vokasional sedia ada masih mencukupi dan dapat menampung keperluan murid di negeri Sarawak yang berminat untuk mengikuti Pendidikan Teknik dan Vokasional (TVET). Walau bagaimanapun, KPM akan terus meneliti keperluan pembinaan sekolah vokasional di Sarawak mengikut kesesuaian dan keperluan industri dalam kalangan masyarakat setempat bagi merancakkan Pendidikan TVET pada masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' MASIR KUJAT [SRI AMAN]

TARIKH : 24 MAC 2022 (ISNIN)

SOALAN

DATO' MASIR KUJAT [SRI AMAN] minta **MENTERI PERTANIAN DAN INDUSTRI MAKANAN** menyatakan apakah status pelaksanaan projek jelapang padi di kawasan Stumbin/Bijat Bahagian Sri Aman. Bilakah ianya akan siap dilaksanakan.

JAWAPAN

Tuan Yang Di Pertua,

Untuk makluman Ahli Yang Berhormat, Kawasan Pembangunan Pertanian Bersepadu (IADA) Batang Lupar telah ditubuhkan pada tahun 2014 sebagai peneraju utama jelapang padi yang baharu di Negeri Sarawak. Ia diwujudkan bagi meningkatkan tahap sara diri (SSL) negara dan memberi penekanan pembangunan jelapang padi merangkumi kawasan di Stumbin, Bijat, Gran, Entulang, Seduku dan Lingga-Banting seluas 5,100 hektar. Cadangan pelaksanaan di kawasan ini adalah berdasarkan kesesuaian tanah dan keluasan kawasan bertanam padi sedia ada serta jumlah penglibatan petani yang ramai dengan tanaman padi.

Pada masa ini, Kementerian Pertanian dan Industri Makanan (MAFI) sedang giat membangunkan infrastruktur pertanian seperti membina, menaiktaraf dan menyelenggara infrastruktur pengairan dan saliran di kawasan sawah. Antara program/projek yang dilaksanakan adalah penyelenggaraan sistem pengairan dan saliran, menaiktaraf jalan ladang, membina lintasan, memasang *culvert* dan tebatan banjir.

Daripada 5,100 hektar kawasan yang dicadangkan untuk pembangunan jelapang padi di Bahagian Sri Aman, seluas 1,500 hektar sedang dibangunkan di bawah Pakej Stumbin-Bijat Fasa 1 yang meliputi pembangunan di tiga kawasan utama iaitu Blok A, B dan C. Ketiga-ketiga blok kawasan ini telahpun dilengkapi dengan sistem pengairan utama (*primary pipeline*) sehingga peringkat *secondary pipeline* yang melibatkan kawasan Tanjung Bijat, Stumbin, Gran dan Entulang.

SOALAN NO : 14

Kawasan Tanjung Bijat (Block C) seluas 196 hektar telahpun dilengkapi dengan *tertiary pipeline*. Manakala pembangunan *system tersier* di kawasan Stumbin (Blok A dan Blok B) masih lagi diperingkat kerja ukur dan reka bentuk terperinci yang melibatkan keluasan seluas 400 hektar. Keseluruhan projek di bawah di bawah Pakej Stumbin-Bijat Fasa 1 ini dijangka siap sepenuhnya pada penghujung Rancangan Malaysia Kedua Belas (RMKe-12) iaitu 2025.

Bagi Pakej Stumbin-Bijat Fasa 2 (Seduku) yang juga melibatkan Kawasan seluas 1,500 hektar, pelaksanaan projek ini masih lagi di peringkat 'review *design*' dan dijangka akan siap sepenuhnya pada penghujung Rancangan Malaysia Ketiga Belas (RMKe-13).

Pembangunan infrastruktur pertanian ini amat penting bagi menyediakan kawasan tanaman padi yang sesuai dan pembangunan projek pertanian yang lain bagi meningkatkan taraf sosio-ekonomi petani di kawasan tersebut. MAFI melalui IADA Batang Lupar akan terus berusaha membangunkan keseluruhan kawasan ini dengan infrastruktur yang lengkap dengan pembangunan kawasan tanaman padi secara berperingkat dalam tempoh RMKe-12 sehingga RMKe-13.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB DATO' HAJI CHE ABDULLAH BIN
MAT NAWI [TUMPAT]**

TARIKH : 24 MAC 2022 (KHAMIS)

SOALAN

DATO' HAJI CHE ABDULLAH BIN MAT NAWI [TUMPAT] Minta **MENTERI PENGANGKUTAN** menyatakan sama ada Kereta Api Tanah Melayu Berhad (KTMB) akan menyambung semula perkhidmatan kereta api Ekspres Wau dari Kuala Lumpur terus ke Tumpat tanpa transit ke stesen Gemas terlebih dahulu.

JAWAPAN

Tuan Yang di-Pertua,

Perkhidmatan keretapi Ekspres Wau terpaksa dihentikan pada 2015 kerana menelan kos operasi yang tinggi dan mengakibatkan kerugian sebanyak RM6 juta setiap tahun. Kementerian ini menyedari bahawa perkhidmatan Ekspres Wau ini memberi manfaat yang besar kepada rakyat di sebelah Pantai Timur khususnya Pahang dan Kelantan. Pada masa ini, penumpang yang ingin membuat perjalanan dari Kuala Lumpur ke Tumpat dan dari Tumpat ke Kuala Lumpur masih dapat membuat perjalanan menggunakan perkhidmatan ETS dan Ekspres Rakyat Timuran sedia ada. Pada masa hadapan, ketersambungan rel ke negeri pahang dan Kelantan akan dipertingkatkan dengan penyiapan Projek East Coast Rail Link (ECRL) menjelang tahun 2027 kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 24 MAC 2022 (KHAMIS)

SOALAN

PUAN HANNAH YEOH TSEOW SUAN [SEGAMBUT] minta **MENTERI KANAN PENDIDIKAN** menyatakan status terkini usaha penstrukturan semula industri pendidikan awal kanak-kanak yang melibatkan empat kementerian berbeza, jangka masa ianya akan dilaksanakan serta status penyelesaian isu 'dual licensing' taska dan tadika.

JAWAPAN

Tuan Yang di-Pertua,

Kanak-kanak yang berumur dari 0 hingga 4 tahun tertakluk kepada Akta Taman Asuhan Kanak-Kanak 1984 [Akta 308] di bawah fungsi Kementerian Pembangunan Wanita, Keluarga dan Masyarakat (KPWK). Manakala, pendidikan awal kanak-kanak bagi kanak-kanak yang berumur 4 hingga 6 tahun adalah tertakluk kepada Akta Pendidikan 1996 [Akta 550] di bawah fungsi Kementerian Pendidikan Malaysia (KPM). Terdapat tiga kementerian iaitu KPM, Kementerian Pembangunan Luar Bandar dan Kementerian Perpaduan Negara yang menyediakan perkhidmatan dan pengoperasian pendidikan awal kanak-kanak. Selain itu, perkhidmatan dan pengoperasian pendidikan awal kanak-kanak juga disediakan oleh kerajaan negeri dan pihak swasta.

Untuk makluman Ahli Yang Berhormat, Mesyuarat Majlis Tindakan Ekonomi (EAC) Bil.4/2021 yang dipengerusikan oleh YAB Perdana Menteri pada 15 Februari 2021 telah memutuskan supaya KPM mengetuai inisiatif memperkemaskan struktur tadbir urus secara bersepadu pendidikan awal kanak-kanak bersama-sama Kementerian/ Jabatan/ Agensi yang berkaitan. KPM serta kementerian dan agensi yang berkaitan telah mewujudkan dua jawatankuasa iaitu Jawatankuasa Khas dan Jawatankuasa Teknikal Bagi Mengawal Selia Secara Bersepadu Penubuhan dan Operasi Institusi Pendidikan Awal Kanak-Kanak di Malaysia yang akan memperhalusi terma rujukan bagi pengoperasian pendidikan awal kanak-kanak dengan mengambil kira perkara berkaitan perundangan dan tadbir urus secara menyeluruh.

Berkenaan isu *dual licensing*, KPM mengambil maklum kewujudan tadika dan taska dalam premis yang sama bagi memenuhi keperluan ibu bapa khususnya yang mempunyai anak-anak berumur 0 hingga 6 tahun. Bagi tujuan tersebut, KPM telah mengeluarkan Surat Pekeliling Ikhtisas Bilangan 1 Tahun 2014 Pengeluaran Perakuan Sementara Pendaftaran Bagi Tadika Swasta Yang Ditempatkan Dalam Premis Yang Sama Dengan Taska untuk menyelaraskan pengurusan pendaftaran tadika dalam premis yang

sama dengan taska mengikut bidang kuasa KPM.

Pendaftaran bagi tadika yang berada dalam premis yang sama dengan taska boleh dipertimbangkan dengan syarat berikut:

- i. premis disempadankan dengan pemisah yang jelas antara tadika dan taska;
- ii. persempadanan yang dibuat hendaklah mendapat kelulusan Pihak Berkuasa Tempatan, Jabatan Bomba dan Penyelamat dan Jabatan Kesihatan; dan
- iii. kedua-dua taska dan tadika hendaklah berdaftar mengikut peruntukan akta masing-masing iaitu Akta Taman Asuhan Kanak-kanak 1984 dan Akta Pendidikan 1996.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI MOHD. SALIM SHARIF
[JEMPOL]**

TARIKH : 24 MAC 2022 (KHAMIS)

SOALAN

DATUK SERI HAJI MOHD. SALIM SHARIF [JEMPOL] minta **MENTERI PERTANIAN DAN INDUSTRI MAKANAN** menyatakan jangka pendek dan panjang bagi menyelesaikan kemelut yang dihadapi oleh penternak ayam serta penelur untuk meneruskan kelangsungan pengeluaran bahan makanan tersebut.

JAWAPAN

Tuan Yang di-Pertua,

Untuk makluman Ahli Yang Berhormat, purata keperluan ayam dalam negara adalah sebanyak 2.09 juta ekor sehari atau 62.9 juta ekor sebulan. Data pengeluaran ayam yang dikeluarkan oleh Jabatan Perkhidmatan Veterinar (DVS) pada bulan Oktober 2021 adalah sebanyak 52.05 juta ekor menurun kepada 51.4 juta ekor pada bulan November 2021. Manakala pengeluaran ayam pada bulan Disember 2021 adalah sebanyak 61.1 juta ekor berbanding 62.9 juta ekor mengikut keperluan sebenar. Ini menunjukkan terdapat kekurangan bekalan di pasaran. Antara faktor-faktor yang menyebabkan berlakunya penurunan bekalan ayam tersebut adalah seperti berikut:

- (i) pengurangan pengeluaran ayam oleh pihak industri bagi mengelakkan kerugian berikutan peningkatan kos operasi pengeluaran ayam. Kos makanan ternakan menyumbang kepada 70% daripada kos pengeluaran. Komposisi makanan ayam terdiri daripada bahan mentah utama iaitu jagung dan *soybean meal* (SBM). Pada bulan Mac 2022, harga jagung telah meningkat sebanyak 110.99% kepada RM1,920/tan, berbanding bulan RM910.00/tan pada Januari 2020. Manakala harga SBM telah meningkat sebanyak 83.45% kepada RM3,070/tan pada Mac 2022, berbanding RM1,673.50/tan pada bulan Januari 2020. Kenaikan harga import bahan mentah ini disebabkan oleh kenaikan harga pasaran dunia dan kadar tukaran matawang di luar kawalan pengimport. Faktor lain yang mempengaruhi kenaikan harga ayam adalah peningkatan kos operasi di sepanjang rantai seperti kos logistik, kos pekerja dan kadar tukaran matawang asing;
- (ii) peningkatan permintaan yang mendadak berikutan pembukaan semula sektor ekonomi terutamanya perhotelan, restoran dan katering pasca Perintah Kawalan Pergerakan (PKP) mulai Oktober 2021;

- (iii) bencana banjir pada penghujung tahun 2021 yang menjejaskan industri ternakan ayam; dan
- (iv) pengurangan kemasukan anak ayam oleh pihak industri semasa musim hujan bagi mengurangkan risiko penyakit berjangkit seperti sampar ayam (*Newcastle Disease*).

Bagi memenuhi permintaan tempatan serta meringankan beban penternak, Kerajaan melaksanakan langkah jangka pendek dan jangka panjang seperti berikut:

(a) Jangka pendek

- (i) memberi kebenaran mengimport (*approved permit – AP*) kepada 36 buah syarikat untuk mengimport ayam sebanyak 36,030 tan metrik bagi tempoh Disember 2021 hingga Mei 2022 tertakluk kepada syarat-syarat yang ditetapkan;
- (ii) memberi subsidi sebanyak RM0.60/kg pada harga borong ayam hidup di ladang dan RM0.05/biji bagi telur gred A, B dan C bermula dari 5 Februari hingga 5 Jun 2022. Usaha ini dijangka memberi manfaat kepada 2,061 penternak ayam pedaging dan 194 penternak ayam penelur. Rakyat pula dapat menikmati harga ayam bulat lebih rendah iaitu RM8.90/kg dan harga telur antara RM0.39 hingga RM0.43 sebiji mengikut gred. Jumlah keseluruhan subsidi yang ditanggung oleh Kerajaan ialah sebanyak RM528.52 juta. Permohonan subsidi telah dibuka mulai 28 Februari sehingga 6 Jun 2022 melalui DVS Negeri. Untuk mendapatkan bantuan subsidi tersebut, penternak perlu mengemukakan permohonan melalui borang yang boleh didapati di laman sesawang Jabatan Perkhidmatan Veterinar www.dvs.gov.my. Semua permohonan yang dikemukakan penternak akan dinilai di peringkat lapangan di negeri dan dipertimbangkan oleh Jawatankuasa di peringkat Putrajaya untuk kelulusan tuntutan. Bagi

permohonan yang berjaya, tuntutan subsidi akan dikreditkan ke dalam akaun penternak melalui Agrobank dalam tempoh satu (1) hingga tiga (3) hari;

- (iii) memberi insentif makanan ternakan ruminan kepada penternak kecil ruminan melalui skim harga bersubsidi dedak isirung kelapa sawit (PKC) yang berjumlah RM10 juta. Dianggarkan seramai 30,000 orang penternak akan menerima bantuan dalam bentuk tunai sebanyak RM300/penternak.

(b) Jangka panjang

- (i) mengurangkan kebergantungan kepada sumber jagung import sebanyak 30% menerusi inisiatif penanaman jagung bijian dalam negara yang berkeluasan sehingga 80,000 hektar dengan sasaran pengeluaran jagung bijian tempatan sebanyak 1.44 juta tan metrik menjelang tahun 2033;
- (ii) menjalankan kajian bagi menghasilkan bahan mentah gantian dari sumber tempatan berasaskan isirung sawit seperti PKC/PKE; dan
- (iii) menawarkan pinjaman mudah sebanyak RM200 juta kepada penternak melalui Agrobank bagi membantu penternak mengatasi masalah modal pusingan kewangan yang terjejas akibat kenaikan kos pengeluaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB TUAN KHOO POAY TIONG
[KOTA MELAKA]**

TARIKH : 24 MAC 2022 (KHAMIS)

SOALAN

TUAN KHOO POAY TIONG [KOTA MELAKA] minta **MENTERI PEMBANGUNAN WANITA, KELUARGA DAN MASYARAKAT** menyatakan :-

- (a) status dan maklum balas yang telah diterima oleh Kementerian terhadap sistem bantuan kebajikan tanpa tunai (JKMPay), termasuk masalah dan cabaran yang dihadapi oleh para penerima; dan
- (b) adakah sistem JKMPay akan dihentikan buat sementara waktu ketika kajian semula sedang dilaksanakan .

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) sedang melaksanakan satu inisiatif baru iaitu **projek Bayaran Bantuan Kewangan Tanpa Tunai (Cashless, dengan izin) atau dikenali sebagai JKMPay**. Projek ini berstatus **PROJEK RINTIS** dilaksanakan mulai bulan Februari 2021 ke atas **penerima bantuan kelulusan baharu sahaja dan tidak melibatkan penerima bantuan sedia ada** bagi semua skim bantuan kewangan bulanan Persekutuan.

Pelaksanaan Projek Rintis adalah bagi menilai kebolehlaksanaan **Bayaran Bantuan Kewangan Tanpa Tunai di kalangan penerima bantuan dalam menyokong ke arah mewujudkan masyarakat digital selaras dengan Rangka Tindakan Ekonomi Digital Malaysia 2021 dan Memacu Transformasi Perkhidmatan Digital Sektor Awam melalui kerjasama Sektor Korporat.**

Penerima baharu juga kekal menerima kesemua jumlah keseluruhan bantuan yang diluluskan **secara 100% iaitu 50% dibayar melalui bank dan 50% lagi akan dimasukkan ke kad JKMPay untuk berbelanja secara tanpa tunai.** Sehingga Februari 2022, sebanyak **RM9.2 juta** telah diperuntukkan kepada **4,752 penerima bantuan baharu** yang menyertai projek rintis ini.

Selain itu juga, sehingga **Februari 2022, sebanyak RM4.18 juta** telah dibelanjakan oleh peserta bagi tujuan pembelian **keperluan makan/minum iaitu 80.8% atau RM3.37 juta; 16.2% atau RM678 ribu bagi pembelian keperluan rumah** seperti lampin bayi, tuala wanita, sabun pencuci dan lain-lain. **2.3% atau RM96 ribu bagi keperluan lain** seperti pembayaran bil dan utiliti, tambah nilai prabayar (*top-up*) dan **0.7% atau RM29 ribu dibelanjakan bagi tujuan pembelian ubat-ubatan.** Ini menunjukkan bahawa program ini **memberi impak yang baik dan manfaat kepada peserta dalam memenuhi keperluan asas mereka.**

Tuan Yang di-Pertua,

Berdasarkan kepada kajian penilaian enam (6) bulan pertama projek yang melibatkan 1,066 peserta pada Oktober 2021, 61% responden adalah penerima bantuan baharu bagi skim OKU mendapati bahawa:

- 1) **76% setuju bantuan kewangan tanpa tunai** memudahkan;
- 2) 80% menyatakan bantuan kewangan tanpa tunai lebih selamat berbanding perbelanjaan tunai;
- 3) 80% menyatakan kawalan perbelanjaan mereka lebih baik melalui kaedah bantuan kewangan tanpa tunai; dan

4) 73% berpuas hati dengan transaksi dan jumlah kedai di kawasan.

JKMPay tidak bertujuan untuk **menyekat mana-mana hak kebebasan** OKU untuk berbelanja. Apa yang diwujudkan adalah **mekanisme atau kaedah berbelanja ditambah atau diperluaskan** lagi di mana selain daripada perbelanjaan tunai, penerima boleh melaksanakan perbelanjaan secara tanpa tunai. Malahan melalui kaedah tanpa tunai ini, **tiada caj tambahan atau fi transaksi dikenakan** berbanding sebagaimana caj RM1 boleh dikenakan jika mengeluarkan duit melalui Mesin Teler Automatik (ATM).

Memandangkan pendigitalan penyampaian perkhidmatan ini merupakan agenda masa depan negara, Kementerian akan memastikan usaha penambahbaikan projek rintis ini sentiasa dilaksanakan agar dapat memberi manfaat dan memudahkan penerima bantuan.

Justeru, satu **kajian menyeluruh** akan dilaksanakan bagi memastikan suatu hala tuju dan dasar berkaitan projek ini dapat ditentukan. Dalam tempoh masa tersebut, projek ini **akan kekal berstatus projek rintis** di lokasi sedia ada dan **tidak akan diperluaskan** ke negeri/daerah lain sehingga laporan kajian menyeluruh tersebut dibentangkan.

Kementerian sentiasa mengalu-alukan dan membuka peluang kepada semua pihak untuk memberikan pandangan dan juga cadangan dalam menambah baik pelaksanaan program ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 24 MAC 2022 (KHAMIS)

SOALAN

Tuan Ahmad Fadhli bin Shaari [Pasir Mas] minta **MENTERI KOMUNIKASI DAN MULTIMEDIA** menyatakan perkembangan pelaksanaan dan operasi 5G oleh Digital Nasional Berhad memandangkan terdapat pelbagai pandangan dan perdebatan bagi isu tersebut.

JAWAPAN

Tuan Yang Dipertua,

Pelaksanaan rangkaian 5G oleh Digital Nasional Berhad (DNB) sedang berjalan mengikut perancangan yang telah dibuat. DNB telah mencapai sasaran-sasaran bagi Fasa 1A pada tahun 2021 iaitu menyiapkan 500 tapak 5G meliputi kawasan sekitar Putrajaya, Cyberjaya dan Kuala Lumpur, dan memulakan akses kepada perkhidmatan rangkaian borong mereka pada 15 Disember 2021 lalu.

Peluasan rangkaian 5G diteruskan dalam Fasa 1B dengan sasaran 3,518 tapak bagi tahun 2022, yang akan melibatkan kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak.

Dari segi perkhidmatan kepada pengguna, YTL Communications (YTLC) dan Telekom Malaysia (TM) telah mendapatkan akses daripada

DNB. Mereka turut sedang bekerjasama dengan DNB dalam langkah mengoptimumkan kualiti perkhidmatan 5G.

YTLC telah membenarkan pelanggan mereka menikmati perkhidmatan 5G. Sehingga 11 Februari 2022, terdapat 2,457 orang bilangan pengguna aktif yang direkodkan dan purata kelajuan muat turun perkhidmatan 5G berada pada tahap 588 Mbps. Manakala bagi pihak TM pula, mereka masih menjalani fasa ujian.

Sepertimana diumumkan dalam Sidang Media bersama YB Menteri Kewangan dan YB Menteri Komunikasi dan Multimedia pada 16 Mac 2022, Kerajaan bersetuju untuk meneruskan pelaksanaan rangkaian 5G menggunakan model *Single Wholesale Network* (SWN) dengan pegangan ekuiti DNB dibuka sehingga 70% untuk penyertaan syarikat telekomunikasi (MNOs).

Keputusan untuk meneruskan model SWN ini juga akan memastikan tiada implikasi kewangan tambahan ke atas kontrak yang telah termeterai sebelum ini. Anggaran sejumlah 61% daripada kontrak dan perkhidmatan berkaitan pelaksanaan rangkaian 5G akan memanfaatkan kepentingan Bumiputera. Selain itu, DNB juga akan diletakkan di bawah kawal selia K-KOMM selaku Kementerian yang bertanggungjawab ke atas industri komunikasi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN LIM GUAN ENG [BAGAN]

TARIKH : 24 MAC 2022 (KHAMIS)

SOALAN NO. 20

Tuan Lim Guan Eng [Bagan] minta **MENTERI PENGANGKUTAN** menyatakan apakah pelaburan digital dan jumlahnya yang masuk ke Malaysia ekoran dasar kabotaj yang enggan diberikan pengecualian untuk pembaikan semula kabel digital dasar laut dan adakah Facebook, Microsoft, Google dan Amazon kini bersetuju dengan dasar kabotaj beliau selepas menulis tiga surat bantahan serta sejauh manakah projek Apricot sepanjang 12,000 km kini akan melibatkan Malaysia.

JAWAPAN:

Tuan Yang di-Pertua,

1. Berdasarkan kepada maklumat yang diperolehi daripada Kementerian Komunikasi dan Multimedia Malaysia (KKMM), jumlah pelaburan digital yang direkodkan pada tahun 2020 adalah melebihi RM6.65 bilion.
2. Walaupun pengecualian dasar kabotaj bagi kapal asing yang melaksanakan kerja-kerja pembaikan kabel dasar laut telah dibatalkan mulai 15 November 2020, namun negara kita tetap mencatatkan prestasi yang baik dalam menarik pelaburan digital pada tahun 2021.
3. Nilai projek digital yang telah diluluskan di peringkat Jawatankuasa Pelaburan Kebangsaan (NCI) bagi tahun 2021 adalah sebanyak RM3.4 bilion. Ini tidak termasuk projek-projek bernilai RM39.6 bilion yang telah

diluluskan secara dasar dan sedang menunggu formaliti proses kelulusan NCI.

4. Pada masa ini terdapat beberapa pelaburan digital berpotensi yang sedang dalam peringkat fasilitasi atau dalam perbincangan antara Pejabat Pelaburan Digital (DIO) yang diterajui oleh MIDA dan MDEC dengan pihak pelabur. Pelaburan digital ini merangkumi antaranya projek-projek teknologi dan infrastruktur digital seperti pusat data, pengkomputeran awan, keselamatan siber dan robotik.

5. Ini membuktikan bahawa pelaksanaan Dasar Kabotaj di Malaysia tidak menghalang kemasukan pelaburan asing dalam industri digital. Malahan, projek kabel dasar laut baharu seperti sistem kabel MIST dan sistem kabel India-Asia Xpress (IAX) turut dilaksanakan semasa Dasar Kabotaj masih berkuatkuasa.

6. Untuk makluman Yang Berhormat, Jemaah Menteri pada Oktober 2021 telah bersetuju untuk mengekalkan pembatalan pengecualian Dasar Kabotaj bagi kapal asing yang melaksanakan kerja-kerja pembaikan kabel dasar laut.

7. Saya ingin menegaskan bahawa walaupun pengecualian tersebut telah dibatalkan, kapal asing masih dibenarkan melaksanakan kerja pembaikan kabel dasar laut setelah ketiadaan kapal tempatan disahkan. Malah sejak pembatalan pengecualian tersebut pada November 2020, kesemua Lesen Perkapalan Dalam Negeri (DSL) bagi kapal asing yang terlibat dalam kerja pembaikan kabel dasar laut telah diluluskan dalam tempoh tiga hari bekerja sahaja; berbanding dengan lima hingga tujuh hari ketika pengecualian tersebut masih berkuatkuasa. Justeru, pembatalan pengecualian serta Dasar Kabotaj tidak wajar terus dijadikan polemik oleh pihak yang tidak bertanggungjawab untuk mengelirukan pemain industri dan pelabur.

8. Kementerian Pengangkutan akan terus memainkan peranan memudahcara (*facilitate*) dalam memastikan pelaksanaan Dasar Kabotaj dapat mengimbangi kepentingan industri perkapalan dan pembangunan ekonomi digital negara. Pada masa ini, sistem eDSL serta proses kerja permohonan DSL yang telah ditambahbaik membolehkan DSL

dikeluarkan paling cepat dalam tempoh tiga hari bekerja sahaja. Proses permohonan yang merangkumi penerimaan permohonan, semakan permohonan oleh pegawai Kementerian, pembayaran dan cetakan lesen adalah dibuat sepenuhnya melalui dalam talian. Jika dibandingkan kaedah manual sebelum ini, sistem eDSL bukan sahaja lebih cekap dan telus, malah ia memudahkan pemohon lesen serta menyakinkan mereka kerana setiap peringkat proses permohonan telah ditetapkan had tempoh kerja bagi memastikan tiada kelewatan yang berlaku dalam setiap peringkat permohonan.

9. Demi memastikan maklumat dan fakta yang tepat dapat disampaikan dengan lebih efektif kepada segmen industri dan pelabur yang berkaitan, Kementerian Pengangkutan akan menggandakan usaha dalam melaksanakan pelan komunikasi Dasar Kabotaj. Dalam perkara ini, Kementerian Pengangkutan akan berkerjasama rapat dengan Kementerian-kementerian lain seperti Kementerian Komunikasi dan Multimedia Malaysia (KKMM), Kementerian Perdagangan Antarabangsa dan Industri (MITI) serta agensi-agensi promosi pelaburan (IPA).

10. Saya yakin penyaluran maklumat yang tepat dan usaha proaktif untuk berinteraksi dengan golongan pelabur adalah antara langkah yang penting dalam menangkis persepsi yang kurang tepat dan seterusnya mempertingkatkan keyakinan mereka untuk membuat pelaburan di Malaysia, terutamanya pelaburan digital.

11. Ini dapat dibuktikan melalui sesi debat antara saya dengan Yang Berhormat Bagan pada 2 November 2021, masyarakat umum dan pihak industri telah memperoleh pemahaman yang lebih mendalam dan jelas berhubung pelaksanaan dan rasional Dasar Kabotaj negara kita.

12. Misalnya, sewaktu Perbincangan Meja Bulat yang dipengerusikan oleh Yang Berhormat Jeli pada 15 Disember 2021, yang melibatkan kementerian/ agensi kerajaan dan US-ASEAN *Business Council* (US-ABC) yang diwakili oleh pelabur-pelabur ternama Amerika Syarikat, termasuk Amazon, Google, IBM dan Cisco. Tidak ada pelabur pun yang menyuarkan bantahan atau aduan berhubung pembatalan pengecualian bagi kerja pembaikan kabel dasar laut. Malah, prosedur operasi standard

(SOP) Kementerian Pengangkutan untuk mengeluarkan DSL dalam masa tidak lebih dari 10 hari telah diberi penghargaan oleh Google.

13. Saya juga telah terangkan sebelum ini bahawa kabel dasar laut projek Apricot adalah melalui Lautan Pasifik yang dari segi geografinya tidak melalui Malaysia. Lagipun, Malaysia memang tidak dilibatkan sejak permulaan perancangan projek ini pada 2017.

14. Walau bagaimanapun, sistem kabel dasar laut MIST yang menghubungkan India, Myanmar, Thailand, Singapura dan Malaysia akan disambungkan dengan sistem kabel Apricot. Justeru, Malaysia akan disambungkan secara terus dengan Taiwan, Jepun dan Guam melalui rangkaian sambungan yang melebihi 18,000 km ini.

15. Tambahan lagi, sistem kabel India Asia Express (IAX) yang akan mendarat di Malaysia juga akan disambung dengan sistem kabel Echo. Sambungan dua sistem kabel ini membolehkan negara kita mendapat manfaat dengan tambahan sambungan terus ke India dan Amerika Syarikat. Manakala sistem kabel Intra-Asia Express yang kini dalam perancangan, akan menyambungkan Jepun dengan Malaysia melalui Sarawak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' MOHD. NIZAR BIN
HAJI ZAKARIA [PARIT]**

TARIKH : 24 MAC 2022 (KHAMIS)

SOALAN

DATO' MOHD. NIZAR BIN HAJI ZAKARIA [PARIT] minta
MENTERI PELANCONGAN, SENI DAN BUDAYA menyatakan :-

- (a) apakah langkah jangka masa panjang Kementerian dalam membantu melonjakkan destinasi pelancongan viral di luar bandar; dan
- (b) apakah usaha Kementerian dalam membantu menaikkan lagi jumlah pengunjung bagi industri pelancongan luar bandar.

JAWAPAN

Tuan Yang di-Pertua,

1. Sepertimana Ahli Yang Berhormat sedia maklum, kuasa tular atau viral kini sudah menjadi sebahagian daripada paparan utama di media sosial yang kini bertindak sebagai medium penyebaran maklumat selain platform komunikasi pantas dan berkesan. Tidak dinafikan kuasa tular di media sosial juga boleh membantu dari segi pemasaran pelancongan khususnya dalam mempromosikan destinasi-destinasi pelancongan domestik kepada rakyat.

SOALAN NO : 21

2. Sehubungan itu, antara langkah masa panjang Kementerian Pelancongan, Seni dan Budaya (MOTAC) dalam membantu melonjakkan pelancongan viral di luar bandar ialah dengan menambah baik kemudahan-kemudahan pelancongan selain memudahkan akses dan pergerakan pelancong ke lokasi-lokasi berkenaan.
3. MOTAC menerusi Tourism Malaysia sentiasa bekerjasama dengan semua pihak termasuklah kerajaan negeri dalam mengenal pasti produk-produk pelancongan di kawasan luar bandar yang berpotensi untuk dimajukan sebagai destinasi pelancongan serta dipromosikan bagi pasaran domestik mahupun antarabangsa. Ini turut mengambil kira kawasan-kawasan luar bandar seperti Parit, Seri Iskandar dan Bota di Perak yang memiliki keistimewaan tersendiri seperti Pusat Konservasi Hidupan Liar (Tuntung) dan Kompleks Pertanian Titi Gantung.
4. Tidak dinafikan kawasan luar bandar di Malaysia kaya dengan keindahan alam semula jadi yang menjadi tarikan destinasi ekopelancongan. Sebagai contoh, Air Terjun Susung di Bengoh Dam, Padawan, Sarawak telah tular di media sosial dengan jolokan sebagai *Jurassic Park of Sarawak*. Bagi memudahkan kunjungan pelancong ke sana, komuniti setempat telah bekerjasama menyediakan kemudahan seperti jambatan, pengangkutan bot, inap desa, laluan denai, tandas dan pondok untuk berehat. Sebagai pelengkap kepada ketersediaan destinasi pelancongan ini, Tourism Malaysia turut menjalankan promosi berterusan di media sosial termasuk hebahan promosi melalui pejabat-pejabat Tourism Malaysia di luar negara.
5. Di bawah Pelan Ekopelancongan Kebangsaan (NEP) (2.0) 2020 – 2030, beberapa kluster ekopelancongan telah dikenal pasti bagi memperkukuhkan pembangunan segmen ini. Di negeri Perak, pembangunan kluster ekopelancongan Taiping - Batu Kurau - Bukit Merah dan Royal Belum - Lenggong - Kuala Kangsar misalnya, turut mengambil kira aktiviti pelancongan berasaskan komuniti atau *Community-Based Tourism* (CBT) serta program inap desa yang dapat dikembangkan dan dipromosi secara holistik. Pada masa sama, destinasi-destinasi ekopelancongan di sepanjang kluster ini boleh dipromosikan sebagai destinasi pelancongan bersepadu yang seterusnya mampu menarik minat pelancong untuk tinggal lebih lama dan berbelanja lebih.

6. Program Pengalaman Homestay Malaysia yang telah diperkenalkan Kementerian bukan sahaja merupakan suatu inisiatif bagi membangunkan produk-produk pelancongan luar bandar, malah meningkatkan penyertaan masyarakat desa dalam CBT, agropelancongan serta kesenian dan kebudayaan yang memberikan nilai tambah.

7. Selain itu, penawaran pakej-pakej luar bandar yang diintegrasikan bersama produk-produk sokongan di sekitarnya melibatkan elemen budaya, warisan, alam semula jadi dan gastronomi, mampu menjadikannya kelihatan lebih 'premium' sekali gus meningkatkan kepuasan pelancong serta memperkukuh komitmen Kementerian terhadap pelancongan lestari.

8. MOTAC turut melaksanakan program *upskilling* dan *reskilling* melibatkan pemandu pelancong dengan memberi penekanan kepada penyampaian serta komunikasi berkesan secara *storytelling*. Pendekatan kreatif dalam komunikasi ini mampu membangkitkan pengalaman mengujakan dalam kalangan para pelancong untuk terus menerokai destinasi-destinasi pelancongan menarik di negara ini.

9. Bukan itu sahaja, usaha pembangunan pelancongan luar bandar juga dapat terus diperhebat melalui peningkatan aktiviti kajian dan penyelidikan di sesebuah lokasi pelancongan mahupun pusat konservasi seperti di Danum Valley, Sabah menerusi kehadiran pakar penyelidik dari luar negara bagi mengkaji ekologi orang utan di sana. Selain itu, Tapak Warisan Dunia Lembah Lenggong di Perak turut menjadi tumpuan untuk aktiviti penyelidikan berkaitan arkeologi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI ANWAR BIN IBRAHIM
(PORT DICKSON)**

TARIKH : 24 MAC 2022 (KHAMIS)

SOALAN

DATO' SERI ANWAR BIN IBRAHIM (PORT DICKSON) minta **MENTERI TENAGA DAN SUMBER ASLI** menyatakan apakah kewajaran Kementerian menaikkan surcaj tarif elektrik sebanyak RM3.70/kWj kepada semua pengguna komersial dan industri ketika ini dan langkah diambil untuk memastikan keperluan asas bekalan elektrik tidak akan membebankan rakyat.

JAWAPAN

Tuan Yang di-Pertua,

1. Kerajaan mempunyai mekanisme khusus bagi penetapan purata tarif asas elektrik yang telah diguna pakai sejak tahun 2014 iaitu berdasarkan mekanisme *Incentive Based Regulation* (IBR). Melalui IBR ini, purata tarif asas di Semenanjung Malaysia untuk Tenaga Nasional Berhad (TNB) akan dikaji tiga (3) tahun sekali berserta dengan penetapan parameter-parameter untuk perniagaan TNB yang dikawal selia oleh Kerajaan melalui Suruhanjaya Tenaga (ST). Selain itu, Kerajaan juga mempunyai mekanisme khusus bagi pelarasan tarif elektrik iaitu melalui *Imbalance Cost Pass-Through* (ICPT) yang disemak setiap enam (6) bulan. Mekanisme ICPT ini adalah penting memandangkan TNB telah membuat bayaran bagi semua kos penjanaan tenaga elektrik di Semenanjung bagi enam bulan yang terdahulu, maka bagi enam bulan yang berikutnya, mekanisme ICPT membenarkan segala kos yang telah dibuat oleh TNB dilepaskan kepada pengguna sama ada dalam bentuk rebat atau surcaj. Kerajaan pada 26 Januari 2022 telah meluluskan pelaksanaan tempoh regulatori ketiga (RP3) bagi tahun 2022 hingga 2024 di bawah mekanisme IBR.

2. Bagi tempoh 1 Januari hingga 31 Disember 2021, Kerajaan telah melepaskan rebat 2 sen/kWj kepada semua kategori pengguna di Semenanjung. Pemberian rebat ini melibatkan kos keseluruhan sebanyak RM2.27 bilion.

3. Bagi tempoh Julai hingga Disember 2021, kos ICPT yang terlibat adalah sebanyak RM1.672 bilion bersamaan surcaj 3.70 sen/kWj yang perlu dilepaskan kepada semua pengguna elektrik di Semenanjung. Pelepasan surcaj ICPT sebanyak 3.70 sen/kWj kepada pengguna bagi tempoh Februari 2022 hingga Jun 2022 tidak dapat dielakkan berikutan kenaikan harga arang batu sehingga USD105.09/metrik tan berbanding unjuran harga arang batu yang ditetapkan pada tahun 2021 iaitu sebanyak USD67.45/metrik tan. Peningkatan harga arang batu yang ketara ini telah menyebabkan kos penjanaan berasaskan arang batu meningkat sebanyak 45% bagi tempoh Julai hingga Disember 2021.

SOALAN NO : 22

4. Sebarang kenaikan dalam harga arang batu memberi impak yang besar kepada tarif elektrik di Semenanjung kerana 59% penjanaan elektrik adalah daripada sumber arang batu. Selain itu, kenaikan pertukaran mata wang asing bagi tempoh Julai hingga Disember 2021 iaitu pada kadar RM4.246 untuk setiap USD1.00 berbanding unjuran iaitu pada kadar RM4.212 bagi setiap USD1.00 turut menjadikan kos penjanaan meningkat.
5. Kerajaan menyedari bahawa sekiranya surcay dilepaskan kepada semua pengguna seperti yang sepatutnya dilaksanakan berdasarkan mekanisme ICPT, pasti rakyat akan merasa terbeban disebabkan kenaikan tarif elektrik. Oleh itu, Kerajaan telah memutuskan supaya rebat 2 sen/kWj diteruskan kepada semua pengguna domestik bagi tempoh Februari sehingga Jun 2022 dengan membelanjakan RM715 juta daripada dana Kumpulan Wang Industri Elektrik (KWIE). Dalam masa yang sama, TNB telah menyerap kos ICPT pada bulan Januari 2022 sebanyak RM181 juta walaupun kos tersebut sepatutnya dilepaskan kepada semua pengguna.
6. Kerajaan telah melepaskan surcay sebanyak 3.70 sen/kWj kepada pengguna bukan domestik bagi tempoh tersebut kerana pihak Tenaga Nasional Berhad (TNB) perlu membayar kos bahan api dan penjanaan tambahan kepada pembekal-pembekal bahan api bagi tempoh Julai hingga Disember 2021.
7. Bagi menghadapi situasi ini, saya ingin menyarankan agar pengguna-pengguna bukan domestik untuk melanggan inisiatif *Green Electricity Tariff* (GET). Ia bukan sahaja dapat mengecualikan pelanggan GET daripada membayar surcay ICPT untuk tempoh setahun, malah mereka akan turut memiliki *Renewable Energy Certificate* (REC) yang boleh membantu mereka memenuhi komitmen *Environmental, Social and Governance* (ESG), dengan izin, dan menyokong agenda Tenaga Boleh Baharu negara.

SOALAN NO : 22

8. Selain itu, pengguna-pengguna bukan domestik turut dicadangkan untuk meneroka potensi solar melalui pemasangan sistem solar bagi kegunaan sendiri (*self-consumption* – SelCo) atau menyertai Program *Net Energy Metering 3.0* (NEM 3.0). Kementerian juga menyarankan pemain-pemain industri untuk mengamalkan penggunaan elektrik secara cekap dengan menggunakan peralatan cekap tenaga yang mendapat penarafan 4 atau 5 bintang oleh pihak Suruhanjaya Tenaga. Inisiatif-inisiatif ini dapat membantu pengguna komersial dan industri untuk mengurangkan bil elektrik mereka pada masa akan datang.

9. Di samping itu, pemilik-pemilik syarikat yang merupakan pengguna elektrik di bawah kategori industri atau komersial yang menggunakan lebih 3 juta kWj dalam tempoh enam bulan berturut-turut di premis mereka dan berdaftar di bawah Peraturan Tenaga Elektrik 2008 boleh memohon dana melalui “Program Geran Audit Tenaga Bersyarat dan Pengurusan Tenaga dalam Sektor Industri dan Komersial” untuk melaksanakan audit tenaga secara kolaborasi dengan Syarikat Perkhidmatan Tenaga – *Energy Service Company* (ESCO) bagi mengenal pasti potensi penjimatan tenaga elektrik di premis dan pemasangan mereka.

10. Inisiatif-inisiatif tersebut bukan sahaja dapat membantu mengurangkan bil elektrik bagi pengguna bukan domestik, malah ia dapat dilihat sebagai usaha ke arah melestarikan perniagaan masing-masing dalam memenuhi komitmen ESG mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 24 MAC 2022 (KHAMIS)

SOALAN

**DATO' SRI HAJAH ROHANI BINTI HAJI ABDUL KARIM
[BATANG LUPAR]** minta **MENTERI PERTANIAN DAN INDUSTRI
MAKANAN** menyatakan bagaimanakah sektor agro makanan negara
dapat kekal kompetitif di sebalik penglibatan tenaga buruh dalam sektor
makanan negara terutamanya pertanian semakin berkurangan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa melihat keperluan untuk menerajui industri makanan secara keseluruhan dan mentransformasikan pertanian supaya menjadi sektor moden dan kompetitif sehingga memberi pulangan lumayan kepada pengusaha tanaman, ternakan dan perikanan.

Antara inisiatif dan pendekatan yang telah dilaksanakan oleh Kementerian untuk memastikan sektor agro makanan negara kekal kompetitif adalah seperti:

- i. Menggalakkan golongan muda terlibat secara langsung dalam sektor agromakanan melalui program latihan. MAFI telah memperkenalkan Program Latihan Kemahiran Pertanian Kebangsaan (PLKPK) merupakan satu program yang menggalakkan generasi muda melibatkan diri dalam bidang agromakanan sebagai pekerja separa mahir dan usahawan agromakanan melalui penggunaan teknologi terkini seperti drone dan automasi bagi meningkatkan kualiti dan produktiviti sektor agromakanan negara. Selain penerapan kemahiran dalam bidang yang diceburi, para pelatih PLKPK turut diterapkan dengan latihan keusahawanan semasa menjalani program pembelajaran. Pelaksanaan program PLKPK ini dijalankan di 14 buah Pusat Bertauliah di bawah MAFI. Selain itu, kursus-kursus jangka pendek juga dijalankan oleh jabatan/agensi dibawah MAFI;
- ii. Menjalankan pengintegrasian teknologi pertanian moden seperti penggunaan robot (agro-robotik), penderia, pertanian tepat, penggunaan dron, pembangunan data pertanian (*big analytical data*), aplikasi berasaskan *Internet of Things* (IoT) dan model kilang tanaman;
- iii. Menjalankan pelbagai penyelidikan bagi meningkatkan daya saing dan nilai tambah dalam industri pengeluaran pertanian negara.

Antara aktiviti R&D berkaitan teknologi yang sedang dilaksanakan oleh MARDI adalah seperti Pertanian Tepat Padi (*Precision Farming*); dan

- iv. Meneroka teknik dan teknologi terkini untuk disesuaikan dan diaplikasikan kepada petani dan usahawan tani seperti *smart-fertigation*, *nutrient film technique* (NFT), *aquaponic* dan lain-lain.

Teknologi seperti penggunaan dron, sistem pertanian pintar, kecerdasan buatan (AI) dan data raya dengan dibantu peningkatan penggunaan mekanisasi, benih bermutu yang rintang penyakit serta berdaya tahan tinggi daripada kesan perubahan iklim serta amalan agronomik mapan, akan dapat mengubah landskap sektor agromakanan negara untuk kekal kompetitif.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN CHONG CHIENG JEN
[STAMPIN]**

TARIKH : 24 MAC 2022 (KHAMIS)

SOALAN

TUAN CHONG CHIENG JEN [STAMPIN] minta **MENTERI KEWANGAN** menyatakan apakah hasil cukai Kerajaan dalam tahun 2021 dan berapa defisit dialami oleh Kerajaan Persekutuan dalam tahun 2021.

JAWAPAN

Tan Sri Yang Di-Pertua,

Kutipan hasil keseluruhan Kerajaan Persekutuan tahun 2021 adalah sebanyak RM233.8 bilion, lebih tinggi berbanding anggaran disemak yang telah ditetapkan iaitu RM221 bilion. Kutipan yang lebih baik ini didorong oleh prestasi kutipan cukai yang meningkat 7.4% kepada RM173.7 bilion berbanding anggaran disemak yang berjumlah RM161.8 bilion. Daripada jumlah hasil cukai tersebut, cukai langsung adalah berjumlah RM130.1 bilion manakala jumlah cukai tidak langsung pula adalah sebanyak RM43.6 bilion. Jumlah hasil cukai langsung merangkumi sekitar 75% daripada jumlah keseluruhan hasil cukai manakala cukai tidak langsung merangkumi 25%.

Sehubungan itu, bagi tahun 2021, Kerajaan telah mensasarkan defisit fiskal pada 6.5% kepada KDNK seperti yang telah diumumkan dalam Bajet 2022. Sasaran ini mengambil kira penularan varian baharu COVID-19, pelaksanaan semula Perintah Kawalan Pergerakan dan penyediaan pakej bantuan dan rangsangan ekonomi tambahan untuk meringankan beban rakyat dan perniagaan. Walau bagaimanapun, berikutan prestasi kutipan hasil pada suku keempat yang memberangsangkan susulan pembukaan semula ekonomi serta prestasi Keluaran Dalam Negeri Kasar (KDNK) yang lebih baik, defisit fiskal 2021 telah mencatat 6.4% kepada KDNK.

Sekian, terima kasih.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB DATUK SERI PANGLIMA BUNG MOKTAR
BIN RADIN (KINABATANGAN)**

TARIKH : 24 MAC 2022 (KHAMIS)

SOALAN

YB DATUK SERI PANGLIMA BUNG MOKTAR BIN RADIN (KINABATANGAN) minta **MENTERI PENGAJIAN TINGGI** menyatakan apakah Kementerian berhasrat untuk mengkaji semula yuran-yuran pengajian di institusi pengajian tinggi ataupun memberikan pengurangan atau pengecualian pembayaran yuran-yuran pengajian bagi membantu meringankan beban kewangan keluarga pelajar yang terjejas ekoran pandemik COVID-19.

JAWAPAN

Tan Sri Yang di-Pertua,

Kementerian Pengajian Tinggi (KPT) mengambil berat hal ehwal kebajikan para pelajar yang telah menghadapi pelbagai dugaan sejak bermulanya episod pandemik COVID-19 pada tahun 2020 yang lalu. Untuk makluman, bagi Semester Pertama, Sesi Akademik 2021/2022 khususnya, KPT telah menyediakan inisiatif pengurangan yuran secara *one-off* sebanyak 20% kepada semua pelajar warganegara yang mendaftar dengan Universiti Awam (UA) dengan melibatkan implikasi kewangan keseluruhan UA berjumlah RM 123.9 juta yang memberi manfaat kepada 518,326 orang pelajar. Bagi tempoh tiga (3) semester sebelum ini iaitu di peringkat awal penularan COVID-19, jumlah kos yang ditanggung menggunakan sumber dalaman UA bagi maksud pengurangan yuran adalah berjumlah RM 1857.7 juta untuk manfaat 386,142 orang pelajar.

Mengambil kira faktor semasa di mana negara akan mula beralih ke Fasa Peralihan Endemik bermula 1 April 2022, sesi pengajaran dan pembelajaran di UA akan kembali berlangsung seperti sediakala dengan pematuhan kepada Prosedur Operasi Standard (SOP) yang ditetapkan oleh Majlis Keselamatan Negara (MKN). Maka, bagi Semester Kedua Sesi Akademik 2021/2022, pihak KPT mengambil ketetapan untuk mengekalkan kadar yuran sedia ada dan pihak UA tidak dibenarkan untuk menaikkan sebarang yuran yang dikenakan ke atas pelajar.

Tan Sri Yang di-Pertua,

Sungguhpun tiada pengurangan yuran diberikan kepada para pelajar bagi Semester Kedua Sesi Akademik 2021/2022 ini, namun atas semangat #KPTPRIHATIN, pihak UA akan tetap membantu para pelajar yang terkesan sepanjang tempoh Fasa Peralihan Endemik ini berlangsung melalui sumber dalaman masing-masing dalam menyalurkan bantuan kepada para pelajar yang terlibat. Antaranya:

SOALAN NO: 25

- i. Universiti Teknologi Malaysia (UTM) telah menyalurkan bantuan makanan kepada pelajar dalam kampus yang dikenakan Perintah kuarantin (Sekatan Pergerakan Keluar Masuk) pada 30 Januari 2022 sehingga 16 Februari 2022 lalu melibatkan 1,877 orang pelajar dengan kos berjumlah RM173,700.
- ii. Universiti Islam Antarabangsa Malaysia (UIAM) pula memberikan Sumbangan Khairat kepada 454 orang pelajar yang disahkan positif COVID-19 sepanjang Julai 2021 sehingga 7 Mac 2022 dengan kos berjumlah RM71,300.
- iii. Universiti Kebangsaan Malaysia (UKM) telah menyalurkan sumbangan makanan & minuman sebanyak 22,427 pek kepada Pelajar Kuarantin & Kontak Rapat COVID-19 sepanjang 25 April 2021 sehingga 10 Mac 2022 dengan kos berjumlah RM323,690.00

Pihak KPT mengucapkan terima kasih kepada para ibubapa, para sukarelawan, Majlis Perwakilan Pelajar (MPP) di Universiti Awam (UA) dan semua UA atas sokongan padu yang telah diberikan kepada KPT sepanjang mendepani pandemik COVID-19 ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 24 MAC 2022 (KHAMIS)

SOALAN

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan:-

- (a) kadar dan peratusan terkini kebantutan terkini di kalangan murid sekolah di seluruh negara mengikut negeri; dan
- (b) apakah usaha Kementerian untuk memastikan anak-anak rakyat dari golongan B40 dan M40 mendapat makanan yang berkhasiat, bergizi dan gaya hidup yang sihat demi mengelakkan gejala kebantutan dan apakah Kementerian bercadang untuk menaikkan kos makanan RMT dan meluaskan penerimanya kepada kesemua B40 dan M40.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin dan peka dengan perkembangan kesihatan dan tumbesaran murid sekolah. Berdasarkan kepada definisi Kementerian Kesihatan Malaysia (KKM), bantut ialah masalah tumbesaran tidak normal iaitu ketinggian yang tidak seiring dengan usia akibat pengambilan makanan yang tidak seimbang dalam diet seharian bagi satu tempoh masa yang lama.

Untuk makluman Ahli Yang Berhormat, berdasarkan analisis KKM terhadap data murid sekolah rendah Tahun 4 hingga Tahun 6 (berumur 10 hingga 12 tahun) yang diperolehi daripada ujian Standard Kecergasan Fizikal Kebangsaan (SEGAK), KPM pada tahun 2019, seramai 113,358 orang (9.1 peratus) daripada 1,245,696 orang murid bagi kumpulan ini dikategorikan sebagai bantut. Perincian analisis ini mengikut negeri adalah seperti berikut:

**Status Bantut Murid Sekolah Tahun 4 hingga Tahun 6
(berumur 10 - 12 Tahun) Mengikut Negeri Tahun 2019**

Negeri	Jumlah murid yang disaring (n)	Status Pemakanan	
		Bantut (< -2SD)	Normal (>2SD)
		(%)	(%)
Malaysia	1,245,696	9.1	90.9
Perlis	10,941	7.9	92.1
Kedah	88,519	9.2	90.8
Pulau Pinang	61,854	6.5	93.5
Perak	93,799	8.6	91.4
Selangor	237,696	7.7	92.3
Kuala Lumpur	58,284	5.8	94.2
Putrajaya	7,327	6.6	93.4
Negeri Sembilan	47,597	7.9	92.1
Melaka	36,978	8.2	91.8
Johor	154,182	7.7	92.3
Pahang	66,964	10.7	89.3
Terengganu	58,926	10.5	89.5
Kelantan	79,905	11.3	88.7

SOALAN NO : 26

Sabah	124,572	14.8	85.2
Sarawak	114,207	9.2	90.8
Labuan	3,945	8.2	91.8

Berhubung dengan usaha Kerajaan dalam mengatasi masalah kebantutan murid ini, KPM merupakan salah satu ahli dalam Jawatankuasa Khas Memerangi Masalah Bantut Dalam Kalangan Kanak-kanak yang diterajui oleh KKM. Dalam hal ini, KPM sentiasa berkerjasama secara rapat dalam mencari penyelesaian kepada masalah bantut dalam kalangan murid.

Selain itu, program Rancangan Makanan Tambahan (RMT) bertujuan memberi makanan tambahan kepada murid sekolah rendah dalam golongan rentan untuk memperbaiki keadaan dan kesihatan fizikal serta amalan pemakanan mereka. Berdasarkan Laporan Kajian Keberkesanan Program Rancangan Makanan Tambahan yang telah dilaksanakan KPM, secara keseluruhannya, Program RMT telah berjaya meningkatkan tahap kesihatan murid melalui pemberian makanan tambahan yang bernutrisi dan seimbang. Murid RMT juga didapati lebih aktif dan berupaya memberi tumpuan sewaktu sesi pengajaran dan pembelajaran dalam kelas.

Bagi memastikan murid penerima RMT menerima nutrien yang mencukupi, KPM dengan kerjasama KKM telah menyediakan 20 menu untuk dipilih oleh pihak pengurusan sekolah. Setiap menu yang disediakan mampu membekalkan antara 428 hingga 545 kalori bagi memenuhi sebahagian keperluan kalori harian murid sekolah rendah. Sebagai langkah pemerkasaan program RMT iaitu dari *food security* kepada *nutrient security*, bermula tahun 2021 program ini telah ditambah baik dengan pemberian susu pada setiap hari bagi memastikan murid turut dibekalkan dengan nutrien daripada sumber tenusu.

Berhubung cadangan peluasan penerimaan dan kenaikan kadar RMT, KPM sentiasa meneliti setiap cadangan yang diberikan dan sebarang pelaksanaan program baharu adalah tertakluk kepada kedudukan kewangan semasa kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 24 MAC 2022 (KHAMIS)

SOALAN

DATO' SERI HAJI IDRIS BIN JUSOH [BESUT] minta **MENTERI KANAN PENDIDIKAN** menyatakan langkah-langkah Kementerian dalam menambah baik pembelajaran secara bersemuka susulan penularan COVID-19 yang masih belum menunjukkan tanda ia akan stabil dalam masa terdekat.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan persekitaran sekolah adalah selamat bagi pelaksanaan pengajaran dan pembelajaran (PdP) secara bersemuka.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 (GPPPS) 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis Panduan ini mengandungi panduan khusus mengenai prosedur pengurusan murid bergejala, murid disahkan positif COVID-19, murid yang dikenal pasti sebagai kontak rapat pesakit COVID-19 di sekolah dan penutupan sekolah.

Selari dengan situasi semasa berkenaan penularan wabak COVID-19, KPM sentiasa berbincang secara berkala bersama-sama Kementerian Kesihatan Malaysia (KKM) untuk meneliti dan menambah baik SOP sedia ada bagi mengekang jangkitan COVID-19 di sekolah. Berdasarkan saranan daripada KKM, pihak KPM telah mengambil tindakan memperketatkan lagi pelaksanaan GPPPS 3.0 dengan menyediakan lampiran tambahan (*annexe*) kepada garis panduan ini yang memberi penekanan kepada keselamatan dan kesihatan warga sekolah. Lampiran tambahan ini menekankan beberapa aspek utama seperti kehadiran warga sekolah yang bergejala, kebenaran masuk berdasarkan status MySejahtera, tanggungjawab guru di sekolah, pengurusan bilik guru, pengurusan murid di sekolah, pengurusan asrama, pengurusan dewan makan asrama dan pengurusan kes positif di sekolah. Selain itu, lampiran tambahan ini mengupayakan peranan ketua kelas/pengawas/pembimbing rakan sebaya untuk bersama-sama memantau rakan-rakan yang bergejala dari semasa ke semasa dan mengingatkan rakan mereka supaya sentiasa mematuhi SOP.

Berdasarkan langkah-langkah yang telah diambil ini, KPM yakin sesi pengajaran dan pembelajaran (PdP) secara bersemuka dapat diteruskan dan dilaksanakan secara kondusif.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 24 MAC 2022 (KHAMIS)

SOALAN

PUAN RUSNAH BINTI ALUAI [TANGGA BATU] minta **MENTERI KEWANGAN** menyatakan adakah Kementerian berhasrat untuk memudahkan prosedur pembukaan akaun bank baharu kepada golongan yang tidak bekerja seperti suri rumah memandangkan pelbagai keperluan yang memerlukan pembayaran melalui atas talian.

JAWAPAN

Tan Sri Yang Di-Pertua,

Semenjak tahun 2005, BNM telah melaksanakan rangka kerja perkhidmatan perbankan asas di mana institusi kewangan dikehendaki untuk menawarkan akaun simpanan asas dan akaun semasa asas kepada semua warganegara Malaysia dan pemastautin tetap. Pemegang akaun akan mendapat akses kepada perkhidmatan perbankan asas secara percuma atau pada kos yang berpatutan, seperti pembukaan akaun, pengeluaran wang, pemindahan dana, kemudahan pembayaran bil serta deposit cek dan tunai.

Secara amnya, proses meluluskan pembukaan akaun simpanan asas dan akaun semasa akan melibatkan proses usaha wajar pelanggan (*customer due diligence*) bagi memastikan akaun tersebut tidak digunakan untuk tujuan penggubahan wang haram. Institusi kewangan dikehendaki untuk mengenal pasti dan mengesahkan identiti pelanggan dengan menggunakan dokumen dan sumber yang sah. Dalam hal ini, institusi kewangan juga mempunyai kriteria penilaian yang berbeza berdasarkan dasar dalaman dan pengurusan risiko masing-masing, serta memberi pertimbangan kepada beberapa perkara, termasuk:

- i. Identiti pemohon dan pemegang akaun;
- ii. Tujuan pembukaan akaun;
- iii. Pihak yang dibenarkan untuk mengendalikan akaun; dan
- iv. Tatacara dan arahan pengendalian akaun.

Sekian, terima kasih.

**JAWAPAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 24 MAC 2022 (KHAMIS)

DATO' HAJI AHMAD NAZLAN BIN IDRIS [JERANTUT] minta **MENTERI PERTANIAN DAN INDUSTRI MAKANAN** menyatakan adakah Kementerian bercadang untuk melaksanakan skim insurans pertanian dan agromakanan bagi meringankan beban sektor tersebut yang terkesan akibat bencana alam seperti banjir dan kemarau.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) bersama Agrobank sedang giat membangunkan skim perlindungan khusus berlandaskan prinsip syariah yang dinamakan sebagai Skim Takaful Agromakanan bagi memenuhi keperluan komuniti pertanian yang menghadapi risiko ancaman bencana alam seperti banjir dan kemarau. Ini adalah selaras dengan Dasar Agromakanan Negara 2.0 (DAN 2.0) di bawah Teras Dasar 5, Strategi 2 iaitu mereka bentuk dan mewujudkan skim insurans untuk pengeluar makanan terhadap bencana alam.

Skim perlindungan takaful ini bakal menawarkan pakej perlindungan dengan caruman premium tahunan pada kadar berpatutan (*affordable*) serta penyediaan pampasan yang sewajarnya kepada semua pesawah, petani, penternak dan nelayan di seluruh negara yang mengalami ketidaktentuan punca pendapatan akibat berlakunya bencana alam seperti banjir, kemarau, kebakaran semulajadi, kilat, petir, letupan, ribut, tanah runtuh dan lain-lain lagi terhadap hasil pertanian/perikanan/perladangan. Pada peringkat permulaan ini, Skim Takaful Agromakanan ini akan dilaksanakan menerusi inisiatif swasta yang akan dipelopori oleh Agrobank sebagai perintis di dalam menawarkan skim perlindungan dalam sektor pertanian di Malaysia.

Skim Takaful Agromakanan ini dijangka akan dilancarkan dalam suku kedua pada tahun ini, dimulakan dengan Fasa Pertama melibatkan skim perlindungan untuk para pesawah padi seluruh negara dan manfaat termasuk:

- i. Memberi kepastian kepada Kerajaan mengenai jumlah perbelanjaan fiskal tahunan bagi menampung kerugian pesawah akibat bencana alam;
- ii. Menanggung kos penanaman semula yang boleh menyumbang kepada peningkatan jaringan keselamatan

SOALAN NO : 29

makanan negara dan mengurangi kebergantungan kepada import;

- iii. Menjadikan sektor agromakanan lebih berdaya maju (*viable*) kepada industri sokongan seperti kewangan serta logistik, dan sebagai pilihan pekerjaan yang lebih menarik bagi golongan muda; dan
- iv. Memberi perlindungan kepada petani/pesawah daripada kehilangan pendapatan akibat bencana alam, dengan itu mengurangkan risiko kemiskinan luar bandar.

Fasa-fasa berikutnya, Skim ini akan diperluaskan pada tahun 2023 dengan melibatkan komoditi tanaman lain seperti nanas dan durian, industri akuakultur, perikanan serta industri makanan yang lain.

Dengan adanya Skim Takaful Agromakanan ini, Kerajaan yakin para petani, peladang, penternak dan nelayan akan berasa lebih tenang dan selesa di atas jaminan kelangsungan aktiviti ekonomi mereka dan dapat mengurangkan risiko kehilangan pendapatan yang dihadapi serta memastikan pengeluaran agromakanan negara tidak terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HASSAN BIN ABDUL KARIM
[PASIR GUDANG]**

TARIKH : 24 MAC 2022 (KHAMIS)

SOALAN

TUAN HASSAN BIN ABDUL KARIM [PASIR GUDANG] minta **MENTERI KANAN PENDIDIKAN** menyatakan apakah usaha Kementerian yang telah diambil untuk membaik pulih infrastruktur sekolah-sekolah di Pasir Gudang yang telah berumur lebih 30 tahun yang berada dalam keadaan terbiar dan daif.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan fasiliti bangunan dan kemudahan sekolah agar dapat berfungsi dengan baik, selamat dan kondusif.

Untuk makluman Ahli Yang Berhormat, sekolah yang masih ekonomik untuk dibaiki akan diselenggara berdasarkan keutamaan yang dicadangkan oleh Jabatan Pendidikan Negeri (JPN) atau Jabatan Kerja Raya (JKR). Peruntukan penyelenggaraan ini diagihkan kepada setiap JPN atau JKR untuk melaksanakan kerja-kerja pembaikan mengikut skop yang ditetapkan. Bagi tahun 2022, KPM memperuntukkan sebanyak RM25.54 juta untuk penyelenggaraan sekolah di negeri Johor. Khusus bagi Parlimen Pasir Gudang, peruntukan yang telah disalurkan adalah sebanyak RM1.2 juta untuk penyelenggaraan sekolah dalam Parlimen tersebut. Berdasarkan kepada rekod KPM, sebanyak RM7.6 juta telah disalurkan bagi tujuan penyelenggaraan sekolah dalam Parlimen Pasir Gudang dari tahun 2019 hingga 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 24 MAC 2022 (KHAMIS)

SOALAN

DATO' SYED ABU HUSSIN BIN HAFIZ SYED ABDUL FASAL (BUKIT GANTANG) minta **MENTERI PERTANIAN DAN INDUSTRI MAKANAN** menyatakan apakah yang menjadi halangan kepada pihak penguatkuasa Kementerian bagi mengatasi masalah lalat, pembuangan air kumbahan ternakan ayam dan pelepasan takungan udang ke sungai terbuka yang mengancam kehidupan manusia dan mengakibatkan kematian sumber protein di dalam Mukim Trong dan Mukim Matang seperti kos pembungan air takungan kolam udang pada 29 Januari 2022 yang menyebabkan air sungai bertukar warna menjadi hijau dan menjejaskan pendapatan para nelayan. Apakah jaminan Kerajaan bahawa perkara ini dapat diselesaikan secara holistik dalam kadar segera.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) memandang serius isu pencemaran yang disebabkan oleh aktiviti penternakan ayam di Mukim Trong dan Mukim Matang, Perak. Aktiviti pemantauan dan penguatkuasaan berhubung isu pencemaran di Negeri Perak dilakukan oleh Jabatan Perkhidmatan Veterinar (DVS) Negeri Perak.

Pada tahun 2021, sebanyak dua (2) buah ladang ayam didapati tidak mematuhi peraturan yang ditetapkan dan menjadi punca kepada gangguan lalat dan pencemaran air di mukim tersebut. Tindakan penguatkuasaan telah diambil di mana tiga (3) kompaun telah dikeluarkan kepada pengusaha ladang ayam tersebut. Namun begitu, masih terdapat beberapa halangan dalam menjalankan tindakan pemantauan dan penguatkuasaan, antaranya:

- (i) pengusaha ladang ayam gagal menguruskan sisa ladang dengan baik dengan alasan kekurangan pekerja;
- (ii) pandemik COVID-19 telah menghalang aktiviti pemantauan dan pihak pengusaha ayam sukar untuk menjual sisa kompos disebabkan kekangan pergerakan; dan
- (iii) kejadian banjir telah memburukkan lagi isu pencemaran lalat dan pembuangan kumbahan perternakan ayam.

Bagi sektor akuakultur, Pejabat Perikanan Negeri Perak (PPN) telah membuat penyiasatan dan kajian kualiti air berkaitan kes pencemaran di Sungai Limau. Hasil daripada kajian tersebut mendapati bahawa tiada air dikeluarkan dari ladang udang, tiada air berwarna hijau direkodkan, kualiti air adalah normal, dan tiada gambar atau bukti kematian ikan. Tiada aduan yang diterima oleh Jabatan mengenai pembuangan takungan udang di lokasi yang dinyatakan di atas.

SOALAN NO: 31

Bagi memastikan isu ini tidak kembali berulang, MAFI telah menyusun pelbagai strategi secara holistik seperti berikut:

- (i) pengusaha diarahkan untuk melaksanakan kawalan lalat dengan membuat semburan racun serangga;
- (ii) meningkatkan kekerapan pemantauan pada setiap pusingan keluaran ayam di ladang ayam;
- (iii) pengusaha diarahkan untuk memperbaiki saluran perparitan dan membina kolam kumbahan bagi mengelakkan pelepasan sisa air tidak dirawat ke sungai berdekatan;
- (iv) membina benteng sempadan di antara ladang dan saluran awam agar air banjir tidak akan bercampur dengan sisa air belum dirawat;
- (v) notis berhenti beroperasi sementara dikeluarkan;
- (vi) tindakan undang-undang dikenakan;
- (vii) Kumpulan Kerja Teknikal Pengurusan Pencemaran Industri Ternakan telah diaktifkan khusus bagi memantau aduan dan tindakan penambahbaikan di negeri-negeri; dan
- (viii) pensijilan Malaysia Good Agriculture Practices (MyGAP) bagi sektor akuakultur dilaksanakan berdasarkan piawaian Malaysian Standard (MS) iaitu MS 1998:2007 Good Aquaculture Practice (GaqP) garis panduan ladang akuakultur serta MS 2467:2012 Code of Practice for Seaweed Cultivation.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN KHALID BIN ABD SAMAD
(SHAH ALAM)**

TARIKH : 24 MAC 2022 (KHAMIS)

SOALAN

YB TUAN KHALID BIN ABD SAMAD (SHAH ALAM) minta **MENTERI TENAGA DAN SUMBER ASLI** menyatakan apa rasional di sebalik diadakan dasar menghalang penjualan tenaga boleh diperbaharui (*renewable energy*) kepada Singapura.

JAWAPAN

Tuan Yang di-Pertua,

1. Kerajaan telah membuat keputusan dasar untuk tidak membenarkan penjualan Tenaga Boleh Baharu (TBB) ke Singapura kerana keputusan ini memberikan lebih banyak kelebihan dan manfaat kepada rakyat dan negara. Keutamaan perlu diberikan untuk mengekalkan daya saing negara khususnya dalam menarik pelaburan asing yang berkehendakkan sumber TBB dan membantu negara mencapai komitmen ke atas sasaran pengurangan pelepasan gas rumah kaca (GHG) di bawah rangka kerja perubahan iklim.

2. Sekiranya Kerajaan membenarkan penjualan TBB ke Singapura, Malaysia akan kehilangan hak untuk menuntut *carbon avoidance* bagi projek TBB, yang sangat penting bagi negara bagi memenuhi komitmen di bawah Perjanjian Paris. Ini kerana syarat penjualan bekalan elektrik TBB yang dieksport ke Singapura hendaklah turut dipakejkan dengan *Renewable Energy Certificate*. Dengan kata lain, Malaysia perlu menggunakan sumber negara bagi membantu Singapura dalam melaksanakan langkah mitigasi perubahan iklim, mengurangkan jejak karbon pembekalan elektrik serta menarik pelaburan asing ke negara tersebut.

3. Oleh yang demikian, Kerajaan telah mengambil langkah strategik ini bagi mengekalkan kelebihan perbandingan atau *competitive advantage* dan daya saing negara dalam menarik pelaburan ke Malaysia. serta tidak merugikan negara. Sebaliknya mendatangkan manfaat yang besar kepada negara amnya dan Keluarga Malaysia khususnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI CHE ABDULLAH BIN MAT NAWI
(TUMPAT)**

TARIKH : 24 MAC 2022 (KHAMIS)

SOALAN

DATO' HAJI CHE ABDULLAH BIN MAT NAWI (TUMPAT) minta **MENTERI TENAGA DAN SUMBER ASLI** menyatakan statistik mengikut negeri jumlah mangsa banjir yang menyertai Program Bantuan Banjir: Rebat Pembelian Peralatan Elektrik dan apakah usaha SEDA menyebarkan lagi informasi berkenaan program ini.

JAWAPAN

Tuan Yang di-Pertua,

Program Bantuan Banjir Keluarga Malaysia bagi Pembelian Peralatan Elektrik Domestik bertujuan untuk meringankan beban kepada pengguna elektrik domestik yang terkesan dengan bencana banjir Monsun Timur Laut untuk membuat pembelian peralatan elektrik baharu bagi menggantikan peralatan yang rosak.

Sehingga 13 Februari 2022, sebanyak 43,954 unit rebat bernilai RM21.9 juta telah berjaya ditebus oleh mangsa-mangsa banjir.

Daripada 43,954 unit rebat yang berjaya ditebus, Selangor mencatatkan jumlah tertinggi dengan 30,634 unit rebat iaitu 69% diikuti dengan negeri Pahang sebanyak 12,932 unit rebat. Negeri Sembilan dan Kelantan dengan 155 dan 125 unit rebat. Manakala Wilayah Persekutuan Kuala

Lumpur berjumlah 72 unit rebat, Melaka dengan 28 unit rebat dan Johor berjumlah 7 unit rebat.

Tuan Yang di-Pertua,

Pihak Berkuasa Pembangunan Tenaga Lestari (SEDA) Malaysia telah dipertanggungjawabkan sebagai agensi pelaksana bagi Program Bantuan Banjir Keluarga Malaysia ini menggunakan platform Program *Sustainability Achieved Via Energy Efficiency* atau singkatannya SAVE.

SEDA Malaysia sedang giat mempromosikan program ini melalui:

- (i) Sesi temu bual di televisyen seperti di dalam Rancangan Selamat Pagi Malaysia (SPM);
- (ii) laman sesawang KeTSA dan SEDA Malaysia;
- (iii) media sosial KeTSA, SEDA Malaysia, TNB dan Agensi-agensi Kerajaan seperti NADMA; dan
- (iv) kedai berdaftar dengan program SAVE dan platform e-dagang seperti Lazada, Shopee dan PGMall.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LIM LIP ENG (KEPONG)

TARIKH : 24 MAC 2022 (KHAMIS)

SOALAN

TUAN LIM LIP ENG (KEPONG) minta **MENTERI TENAGA DAN SUMBER ASLI** menyatakan adakah aktiviti pembalakan bagus untuk usaha pemuliharaan harimau dan pemeliharaan hidupan liar. Berapa jumlah terkini harimau di Malaysia mengikut negeri.

JAWAPAN

Tuan Yang di-Pertua,

1. Amalan pengurusan hutan secara berkekalan memainkan peranan penting dalam pemeliharaan dan pemuliharaan habitat semula jadi Harimau Malaya. Perkara ini bertujuan untuk memastikan keseimbangan ekosistem yang akan melindungi populasi hidupan liar termasuk Harimau Malaya.
2. Dalam hal ini, Kementerian Tenaga dan Sumber Asli (KeTSA) melalui Jabatan Perhutanan Semenanjung Malaysia (JPSM) dan Jabatan Perhutanan Negeri komited dalam melaksanakan pengusaha hasilan hutan mengikut amalan Pengurusan Hutan Secara Berkekalan (*Sustainable Forest Management* – SFM) yang memberikan penekanan kepada keseimbangan aspek pemeliharaan serta pemuliharaan hutan dan fungsinya dalam pembangunan sosioekonomi.
3. Pelaksanaan SFM di Malaysia adalah berpandukan kepada Dasar Perhutanan Malaysia serta selaras dengan komitmen negara terhadap ketetapan di bawah Forum Hutan Pertubuhan Bangsa-bangsa Bersatu (*United Nations Forum on Forests* - UNFF).
4. Kementerian Tenaga dan Sumber Asli melalui Jabatan Perlindungan Hidupan Liar dan Taman Negara (PERHILITAN) Semenanjung Malaysia telah melaksanakan Survei Harimau Kebangsaan Pertama (*First National Tiger Survey* - NTS1) dari tahun 2016 hingga 2020. Hasil survei mendapati bahawa bilangan individu Harimau Malaya dalam habitat asal dianggarkan kurang daripada 150 ekor sahaja yang terdapat di negeri-negeri yang merupakan kawasan keliaran Harimau Malaya iaitu Perak, Kedah, Selangor, Kelantan, Terengganu, Negeri Sembilan dan juga Pahang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI PANGLIMA BUNG MOKTAR
BIN RADIN [KINABATANGAN]**

TARIKH : 24 MAC 2022 (KHAMIS)

SOALAN

DATUK SERI PANGLIMA BUNG MOKTAR BIN RADIN [KINABATANGAN] minta **MENTERI PERTANIAN DAN INDUSTRI MAKANAN** menyatakan apakah bantuan-bantuan yang telah dan akan diberikan kepada golongan nelayan, petani dan penternak dalam membantu meringankan bebanan kewangan mereka yang terjejas sepanjang pelaksanaan Perintah Kawalan Pergerakan (PKP).

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) mengambil berat impak yang dialami oleh nelayan, petani dan penternak yang terjejas akibat pandemik COVID-19. Bagi memastikan aktiviti para petani dapat diteruskan, MAFI telah merangka 43 inisiatif berjumlah RM1 bilion melalui Pakej Rangsangan Ekonomi (PRE), Pakej Rangsangan Ekonomi Prihatin Rakyat (PRIHATIN), Pelan Jana Semula Ekonomi Negara (PENJANA) dan Inisiatif Bajet 2021 di bawah Dana Jaminan Makanan. Inisiatif-inisiatif tersebut dilaksanakan bagi merancakkan semula aktiviti pertanian dan pengeluaran makanan serta mendatangkan pendapatan kepada para pengusaha.

MAFI telah diperuntukkan sebanyak RM50 juta di bawah PRE untuk pelaksanaan 26 projek dan RM190 juta di bawah PRIHATIN bagi pelaksanaan program jaminan bekalan makanan melalui pemberian insentif input, peningkatan mobilisasi dan logistik bahan makanan serta pemantapan pembekalan stok makanan. Selain itu, Pertubuhan Peladang Kawasan (PPK) dan Pertubuhan Nelayan Kawasan (PNK) juga telah diperuntukkan dana khas untuk menggalakkan penglibatan dan aktiviti ahli peladang dan nelayan dalam industri pertanian dan agromakanan.

Di bawah PENJANA pula, MAFI telah menerima peruntukan sebanyak RM350 juta untuk Skim Pembiayaan Mikro Kredit yang menawarkan bantuan kewangan dalam bentuk pinjaman dengan jumlah minimum RM1,000 sehingga maksimum RM50,000 untuk tempoh sehingga lima (5) tahun pada kadar efektif serendah 3.5% setahun atas baki pembiayaan. Skim ini ditawarkan kepada usahawan mikro yang menjalankan aktiviti pertanian, asas tani dan pengeluaran makanan bertujuan membantu meringankan beban pengusaha yang terkesan akibat pandemik COVID-19.

SOALAN NO : 35

Keseluruhan program / projek yang disenaraikan di bawah pakej-pakej PRE, PRIHATIN dan PENJANA ditawarkan kepada golongan nelayan, petani, penternak dan melalui pelbagai jabatan/ agensi di bawah MAFI.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATO' ABDULLAH SANI BIN ABDUL
HAMID [KAPAR]**

TARIKH : 24 MAC 2022 (KHAMIS)

SOALAN

DATO' ABDULLAH SANI BIN ABDUL HAMID [KAPAR] minta **MENTERI KEWANGAN** menyatakan apakah rasional memberikan pinjaman tanpa cagaran kepada syarikat judi dengan jumlah RM2.51 bilion sedangkan masih ada ramai pemain Industri Kecil dan Sederhana (IKS) tempatan yang masih bergelut untuk bangkit semula dan memerlukan pinjaman atau suntikan modal.

JAWAPAN

Tan Sri Yang di-Pertua,

Setiap institusi perbankan mempunyai proses usaha wajar (*due diligence*) dan penilaian kredit oleh Jawatankuasa Kredit masing-masing bagi menilai keupayaan bakal peminjam untuk membayar balik pinjaman mereka. Institusi perbankan terus mengekalkan tahap peruntukan yang tinggi dan penampakan modal yang kukuh justeru menunjukkan daya tahan mereka untuk menangani potensi risiko kredit yang lebih tinggi. Potensi kerugian akibat dedahan kepada Kumpulan Genting HK berada dalam kadar kerugian yang mampu ditanggung oleh institusi perbankan terbabit. Ujian tekanan turut mengesahkan keupayaan sistem perbankan untuk berhadapan dengan potensi kejutan dalam keadaan ekonomi makro dan kewangan yang buruk.

Berdasarkan penerimaan awal laporan kewangan untuk tahun kewangan berakhir 31 Disember 2021 daripada ketiga-tiga bank yang terlibat dengan pemberian pinjaman kepada Kumpulan Genting HK, BNM mendapati institusi perbankan berkaitan mencatatkan prestasi kewangan yang mantap berbanding tahun sebelumnya sejajar dengan pemulihan ekonomi pasca pandemik. Berdasarkan pencapaian kedudukan kewangan yang kukuh, Kerajaan berpandangan ianya tidak memberi impak yang ketara kepada pemegang saham terbesar institusi perbankan terbabit.

Aktiviti pemberian pinjaman oleh bank-bank terus menyokong keperluan pembiayaan IKS dengan keupayaan tambahan daripada pelbagai langkah bantuan pembiayaan. Untuk makluman, pembiayaan terkumpul kepada IKS mencakupi 46% daripada jumlah pinjaman kepada perniagaan pada 31 Disember 2021. Pembiayaan terkumpul untuk IKS mencatatkan pertumbuhan sebanyak 4.9% bagi tahun 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SHAHARIZUKIRNAIN BIN ABD.
KADIR [SETIU]**

TARIKH : 24 MAC 2022 (KHAMIS)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI KOMUNIKASI DAN MULTIMEDIA** menyatakan rancangan Kerajaan menggubal akta khusus bagi menapis isi kandungan internet di platform media sosial serta penstriman langsung seperti TikTok, Netflix dan Youtube bagi mengelakkan penularan budaya kuning dan *softporn* dalam masyarakat.

JAWAPAN

Tuan Yang Dipertua,

Perkhidmatan kandungan berbayar melalui platform Over-the-Top (OTT) seperti Netflix dan lain-lain, melibatkan syarikat-syarikat yang berpangkalan di luar negara yang tidak tertakluk kepada rangka kerja pelesenan di bawah Akta Komunikasi dan Multimedia 1998 dan pemakaian Kod Kandungan.

Oleh yang demikian, pada masa ini, Suruhanjaya Komunikasi dan Multimedia Malaysia (SKMM) telah mengambil tindakan secara pentadbiran seperti mengeluarkan notis menurunkan kandungan, laporan penyalahgunaan kepada penyedia atau pentadbir platform laman web atau media sosial dan menyekat akses kepada laman web atau kandungan di akaun media sosial yang berkenaan.

Walau bagaimanapun, tindakan pentadbiran ini masih tertakluk kepada terma dan syarat perkhidmatan yang ditetapkan oleh platform yang berkenaan. Ini merupakan satu cabaran yang dihadapi oleh semua negara, terutama bagi perkhidmatan penstriman yang bersifat OTT.

Buat masa ini, tumpuan terarah kepada usaha melaksana program advokasi bagi memastikan wujud kematangan dalam pemilihan rancangan atau program yang mahu ditonton dalam platform OTT. Tindakan kawal sendiri perlu dipraktikkan oleh masyarakat semasa menggunakan perkhidmatan OTT. Sebagai contoh, perkhidmatan OTT, terutama Netflix telah pun menyediakan klasifikasi umur (13+, 16+, 18+) dan sinopsis maklumat (*audience advisory*) berkenaan kandungan yang disediakan seperti bahasa, aksi ganas, seks/ berahi, agama, dadah, dan sebagainya supaya penonton boleh membuat keputusan sebelum memilih dan menonton kandungan tersebut.

Oleh itu, para ibu bapa atau penjaga adalah digalakkan untuk melaksanakan *parental controls* dengan meletakkan pin akses bagi setiap profil penonton isi rumah untuk memastikan anak-anak di bawah umur tidak dapat mengakses semua kandungan yang tidak sesuai.

Untuk makluman Ahli Yang Berhormat, cadangan pindaan kepada Akta Komunikasi dan Multimedia 1998 adalah turut melibatkan pengawasan regulatori terhadap OTT bagi menangani isu kandungan dan penggunaan media sosial dan dalam proses semakan di peringkat Kementerian dan Jabatan Peguam Negara (AGC).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 24 MAC 2022 (KHAMIS)

SOALAN

TUAN MA'MUN BIN SULAIMAN [KALABAKAN] minta **MENTERI KANAN PENDIDIKAN** menyatakan kesediaan Kementerian memberi keutamaan untuk menggantikan bangunan-bangunan kelas belajar sekolah yang sudah ditakrifkan sebagai daif, uzur dan kurang selamat untuk terus digunakan terutamanya bangunan kelas daif yang terdapat di SMK Kalabakan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam usaha menyediakan prasarana dan kemudahan infrastruktur pendidikan kepada semua murid di seluruh negara.

Untuk maklumat Ahli Yang Berhormat, penetapan projek pembangunan semula atau menaik taraf bangunan sekolah yang daif adalah berdasarkan analisis *score grade impact* bagi menentukan tahap keadaan komponen fizikal ataupun fasiliti bangunan sekolah. Skor ini mempunyai tujuh tahap skala. Skala satu hingga empat merujuk kepada keadaan bangunan yang masih berfungsi dan selamat digunakan manakala skala lima adalah bangunan yang dilaporkan oleh pihak sekolah sebagai tidak selamat dan memerlukan penyelenggaraan. Skala enam pula merujuk kepada bangunan yang tidak selamat dengan pengesahan daripada pihak teknikal PPD atau JPN manakala skala tujuh merujuk kepada bangunan yang tidak selamat dengan pengesahan dari Jabatan Kerja Raya (JKR). Keutamaan KPM adalah kepada bangunan yang berada pada skala enam dan skala tujuh untuk dibaik pulih, dinaik taraf atau dibina bangunan gantian mengikut keperluan.

Merujuk kepada status bangunan daif di SMK Kalabakan, tapak tanah sekolah sedia ada masih belum berstatus hakmilik Pesuruhjaya Tanah Persekutuan (PTP). Sehubungan itu, proses pemutihan tapak sekolah sedang dilaksanakan sebelum sebarang permohonan penggantian bangunan SMK Kalabakan dikemukakan untuk pertimbangan dan kelulusan agensi pusat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MUHAMMAD BAKHTIAR BIN
WAN CHIK [BALIK PULAU]**

TARIKH : 24 MAC 2022 (KHAMIS)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan perancangan Kementerian serta usaha menambah lokasi, mutu dan kualiti dalam sektor pelancongan desa di Malaysia agar ianya menyuburkan lagi sumber ekonomi buat komuniti setempat selain daripada Kampung Batu Puteh, Sabah.

JAWAPAN

Tuan Yang di-Pertua,

1. Inap desa atau dikenali sebagai Program Pengalaman Homestay Malaysia merupakan salah satu daripada produk pelancongan desa di bawah Kementerian Pelancongan, Seni dan Budaya (MOTAC) yang berjaya mendapat perhatian pelancong di peringkat antarabangsa. Sektor pelancongan desa kini amat berpotensi dalam menyumbang kepada pembangunan sosioekonomi terutamanya bagi masyarakat luar bandar seperti yang dapat dilihat dengan perkembangan ekonomi pelancongan di Kampung Batu Puteh, Sabah.

2. Menerusi Dasar Pelancongan Negara 2020-2030, MOTAC telah mengenalpasti pelancongan desa atau '*rural tourism*' sebagai salah satu segmen pelancongan yang menyumbang kepada ekonomi setempat, menerusi aktiviti-aktiviti seperti homestay, kampungstay, perusahaan kraftangan, pemprosesan makanan, agropelancongan dan sebagainya.

3. Bagi tahun 2022, MOTAC telah menetapkan halatuju Program Pengalaman Homestay Malaysia dalam mempergiat sektor pelancongan desa bagi pelan jangka masa pendek dan pelan jangka masa panjang melalui Program Kolaborasi dengan Institut Keusahawanan Negara (INSKEN), Pelaksanaan Kursus *Enriching Homestay Experience* dan *Refresher Homestay* dalam memberikan latihan perniagaan kepada pengusaha program ini.
4. Kerajaan juga sentiasa membantu penyediaan program ini melalui Bantuan Kewangan *One-Off* sebanyak RM1,800 kepada pengusaha program dan Pemberian Geran Bagi Tujuan Pembaikan Inap Desa (homestay) bagi mempertingkatkan kualiti dan perkhidmatan produk inap desa agar setanding dengan premis penginapan yang lain. Selain daripada Kampung Batu Puteh, terdapat beberapa homestay yang juga mempunyai standard setaraf dengannya iaitu Kampung Mangkuk Setiu di Terengganu dan Kampung Minyak di Kudat, Sabah yang turut dicalonkan untuk anugerah *Best Tourism Village* (UNWTO).
5. Selain itu, Garis Panduan Program Pengalaman Malaysia juga telah ditambah baik dan diperluaskan konsepnya iaitu bagi menarik minat pengusaha inap desa (homestay) bagi menyertai konsep di bawah program ini. Perluasan ini juga adalah untuk menarik perhatian golongan pelapis menyertainya dengan idea baharu untuk mengekalkan budaya dan persekitaran luar bandar.
6. Pelbagai usaha promosi dilakukan oleh MOTAC melalui agensi Tourism Malaysia bertujuan untuk meningkatkan jumlah pengunjung ke kawasan pelancongan luar bandar. Antara program promosi yang dilaksanakan adalah mengadakan lawatan suaikenal media ke kawasan luar bandar bagi merasai sendiri pengalaman aktiviti-aktiviti pelancongan yang terdapat diluar bandar seperti homestay, kampungstay, produk pelancongan agro dan sebagainya. Tourism Malaysia juga menghasilkan *content* media sosial secara konsisten bagi mempromosikan produk-produk pelancongan luar bandar.
7. MOTAC menerusi Kraftangan Malaysia telah menyediakan pelbagai inisiatif bagi manfaat usahawan kraf dalam mendepani pandemik COVID-19. Antara usaha-usaha yang sedang dibuat secara berterusan agar dapat membangun dan memperkasakan usahawan

kraf untuk terus bertahan dalam industri adalah Inisiatif Pendigitalan Kraf melalui E-Kraf seperti E-Kraf Bazar (EKB) bagi mempromosi dan memasarkan produk kraf tempatan dalam bidang tekstil, hasil rimba, hasil tanah, hasil logam dan aneka kraf menerusi platform dalam talian.

8. Kraftangan Malaysia juga melaksanakan Program Kemahiran dan Peningkatan Kemahiran (PENJANA) bagi mendepani cabaran untuk memastikan usahawan kraf terus berdaya tahan dan berdaya saing dalam industri dalam mendepani pandemik COVID-19. Program ini dilaksanakan menerusi dua (2) aktiviti utama iaitu Program Pembangunan Perantisan Kemahiran (PPPK) dan Program Pembangunan Kemahiran Komuniti (PPKK).

9. Bagi Program Pembangunan Perantisan Kemahiran (PPPK), ianya dilaksanakan untuk membantu usahawan kraf mendapatkan tenaga kerja dan memastikan perusahaan dapat diusahakan secara berterusan manakala, Program Pembangunan Kemahiran Komuniti (PPKK) pula bertujuan untuk memberi penekanan membangun dan memperkasa komuniti kraf bagi melibatkan diri secara langsung dalam perusahaan kraf untuk menjana pendapatan.

Sekian, terima kasih.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 24 MAC 2022 (KHAMIS)

SOALAN

DATIN PADUKA DR. TAN YEE KEW [WANGSA MAJU] minta **MENTERI PENGAJIAN TINGGI** menyatakan sejauh manakah pihak industri berkepentingan didedahkan dengan penemuan kajian saintifik yang dihasilkan oleh penyelidik IPT. Senaraikan projek-projek kerjasama antara IPT dan industri swasta.

JAWAPAN

Tan Sri Yang di-Pertua,

Penyelidikan Fundamental di bawah Dana Penyelidikan Kementerian Pengajian Tinggi Malaysia (DP KPT) yang diselia oleh Jabatan Pendidikan Tinggi (JPT) dilaksanakan bagi menyokong dan menggalakkan penyelidikan asas yang berkualiti tinggi bagi meneroka penemuan ilmu baharu beracuan Malaysia yang mampu menyumbang kepada pembangunan ekonomi.

Menyedari kepentingan jalinan kolaborasi bersama industri, semua permohonan geran di bawah DP KPT disyaratkan serta digalakkan untuk mempunyai kerjasama penyelidikan dengan industri bermula tahun 2020. Untuk makluman, antara projek-projek di bawah DP KPT yang mempunyai kerjasama strategik dengan pihak industri adalah:

- i. projek bertajuk "*Early Warning and Real-Time Monitoring System of Landslide Using Distributed Optical Fibre Strain Sensing*". Projek ini diketuai oleh penyelidik dari Universiti Teknologi Petronas (UTP) dan telah memperoleh perjanjian perlesenan (*Licencing agreement*) daripada *Smart Sensing Technology Sdn. Bhd.*
- ii. projek "Kesan perubahan suhu dan tekanan kepada prestasi elektrolisis air penghasilan hidrogen bertekanan tinggi" dari Universiti Kebangsaan Malaysia (UKM), *Petronas Research Sdn. Bhd* telah menganugerahkan geran penyelidikan bernilai RM 8 juta kepada UKM untuk projek penyelidikan kolaboratif.
- iii. projek bertajuk "*Scaling-up the extraction of anti-cancer Zingiberaceae bioactives from hot compressed water and sonic-assisted water extraction*" dari Universiti Teknologi Malaysia (UTM) pula telah menjalinkan kerjasama dengan Syarikat Am Zaideen Ventures Sdn. Bhd. bagi tujuan pengkomersialan.

- iv. projek bertajuk "*Caiser: Complex Event Processing Development Tool for Engineering and Scientific Application*" dari Universiti Kebangsaan Malaysia (UKM) juga telah berjaya dikomersialkan dan memperoleh perjanjian perlesenan dari Enomatrix Solutions Sdn. Bhd. dan Data Intelek Sdn. Bhd.

Selain itu, data *Malaysia Research Assessment* (MyRA) bagi tahun 2019 hingga 2020 menunjukkan terdapat sebanyak 802 kerjasama di antara Universiti Awam (UA) dan industry. Bilangan kerjasama ini melibatkan penyelidikan oleh UA dan industri swasta yang direkodkan berdasarkan kepada bilangan *Memorandum of Agreement* (MoA) yang ditandatangani dan disetem.

Untuk makluman Ahli Yang Berhormat juga, KPT juga telah menjalankan satu program inovatif yang dinamakan *Public-Private Research Network* (PPRN) yang merupakan satu model kerjasama strategik antara industri dan akademik dengan sokongan perantara yang terdiri daripada KPT dan agensi-agensi Kerajaan yang lain. PPRN bertujuan untuk meningkatkan produktiviti dan mengukuhkan pertumbuhan ekonomi Malaysia melalui program inovasi dan pengkomersialan yang berpacuan permintaan. PPRN dibiayai oleh geran yang dikeluarkan oleh kerajaan dan dipadankan dengan sumbangan daripada syarikat Perusahaan Mikro, Kecil & Sederhana (PMKS) atau industri yang ingin menyelesaikan masalah teknologi yang dihadapi oleh mereka. PMKS akan dibantu oleh penyelidik daripada Institusi pendidikan tinggi (IPT) serta Institusi Penyelidikan Awam (PRI).

Semenjak tahun 2015 sehingga kini, sebanyak 667 projek kerjasama melibatkan syarikat daripada pelbagai sektor industri dan kumpulan penyelidik telah dilaksanakan di bawah inisiatif PPRN. Daripada 667 projek, sebanyak 471 projek telah ditamatkan dengan jayanya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGKAL KEEMPAT
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 24 MAC 2022 (KHAMIS)

SOALAN

TUAN NGA KOR MING [TELUK INTAN] minta **MENTERI KANAN PENDIDIKAN** menyatakan:-

- (a) apakah langkah-langkah yang sedang diambil oleh Kementerian untuk memupuk kemajuan pendidikan dalam subjek Sains, Teknologi, English dan Matematik (STEM) di peringkat sekolah rendah dan menengah; dan
- (b) apakah langkah-langkah yang sedang diambil oleh Kementerian Pendidikan supaya kedudukan murid-murid negara kita setanding dengan murid sekolah Singapura khususnya di peperiksaan antarabangsa Programme For International Student Assesment (PISA).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited untuk memupuk kemajuan pendidikan dalam mata pelajaran bidang *Science, Technology, Engineering and Mathematics* (STEM) pada peringkat sekolah rendah dan menengah. KPM telah mengambil langkah dari empat aspek iaitu:

- i. meningkatkan minat dan kemahiran murid dalam STEM;
- ii. menyediakan pilihan mata pelajaran dalam bidang STEM;
- iii. meningkatkan kompetensi dan kebolehan guru dalam pengajaran dan pembelajaran (PdP); serta
- iv. meningkatkan kesedaran murid dan orang awam terhadap STEM.

KPM telah melaksanakan pelbagai aktiviti dan program untuk meningkatkan minat sekaligus meningkatkan penguasaan murid dalam bidang STEM. Antara aktiviti dan program yang telah dilaksanakan ialah Program STEM *Hackathon*, STEM4ALL, Persidangan Antarabangsa Pendidikan STEM (ICSTEM), serta *Virtual Tour* ke University of Tsukuba, Kyushu University dan Nagoya University, Jepun. Pelbagai pendekatan pembelajaran yang memberi tumpuan kepada kemahiran berfikir aras tinggi (KBAT) juga dilaksanakan seperti pembelajaran berasaskan inkuiri, pembelajaran berasaskan projek dan pembelajaran berasaskan masalah. Dalam Program STEM *Executive Consultation* (STEMEC) sebagai contoh, murid berpeluang untuk mengintegrasikan pengetahuan, kemahiran dan nilai daripada pelbagai disiplin ilmu untuk menyelesaikan masalah yang kompleks dalam konteks dunia sebenar. Program STEMEC dilaksanakan melalui pembelajaran berasaskan projek yang berupaya meningkatkan inkuiri dan kemahiran berfikir murid dalam menganalisis, menilai secara kritis, membuat hipotesis dan membuat keputusan. Secara tidak langsung, murid dapat melihat kepentingan pengetahuan dan kemahiran bukan hanya dalam satu bidang ilmu tetapi dalam pelbagai bidang ilmu secara interdisiplin.

KPM juga telah menawarkan pelbagai mata pelajaran bidang STEM iaitu Sains, Matematik dan Reka Bentuk Teknologi (RBT) di peringkat sekolah rendah manakala mata pelajaran Sains, Matematik, Biologi, Fizik, Kimia, Sains Tambahan, Matematik Tambahan, RBT, Asas Sains Komputer (ASK) dan Sains Komputer di peringkat sekolah menengah. Teknologi Maklumat dan Komunikasi (TMK) turut dilaksanakan secara merentas kurikulum. Kurikulum mata pelajaran yang tersebut di atas direka bentuk dengan menerapkan elemen Revolusi Perindustrian 4.0 (4IR) seperti pemikiran komputasional dan pemikiran mereka bentuk selain menggunakan alat teknologi seperti komputer dan perisian dinamik.

KPM juga berusaha untuk meningkatkan kompetensi dan kebolehan guru dalam pendekatan PdP menerusi program pembangunan profesionalisme guru. Antara program pembangunan profesionalisme guru yang dilaksanakan termasuklah Pendidikan Sains Berasaskan Inkuiri (*Inquiry-Based Science Education*), Pendidikan Matematik Secara Inkuiri (*Inquiry-Based Mathematics Education*), Pendidikan Sains Komputer Menggunakan Pendekatan IBSE dan Program STEMEC.

Di samping itu, KPM juga menjalinkan kerjasama dengan agensi kerajaan lain, seperti Kementerian Sains, Teknologi dan Inovasi (MOSTI), institusi pendidikan tinggi serta sektor swasta bagi memupuk kemajuan pendidikan dalam mata pelajaran bidang STEM.

Tuan Yang di-Pertua,

(b) KPM telah merujuk dapatan *Programme For International Student Assessment* (PISA) dalam merangka strategi untuk menambah baik pelbagai program dan inisiatif sebagai usaha bagi memastikan kedudukan murid negara kita setanding dengan negara lain. Perancangan program dan inisiatif ini telah mengambil kira pencapaian murid pada pelbagai aras, kaedah dan teknik penyampaian guru dalam bilik darjah.

Untuk makluman Ahli Yang Berhormat, antara inisiatif yang telah diberi penekanan ialah:

- i. penyemakan semula kurikulum kebangsaan dengan mengambil kira kerangka pentaksiran PISA agar selaras dengan kualiti dan piawaian penandaarasan peringkat antarabangsa. Penambahbaikan memberi fokus kepada pengajaran dan pembelajaran secara mendalam agar pengetahuan, kefahaman dan penguasaan murid dalam Literasi Matematik dan Literasi Saintifik dapat dipertingkatkan;
- ii. penerapan dan penekanan berterusan Kemahiran Berfikir Aras Tinggi (KBAT) dalam Pengajaran dan Pembelajaran (PdP) dengan mengguna pakai pelbagai kaedah PdP bagi mengaplikasi pengetahuan dan kemahiran murid berbanding pendekatan teknik hafalan;
- iii. penambahbaikan reka bentuk Pentaksiran Kebangsaan dan pentaksiran dalam bilik darjah (PBD) agar selaras dengan kualiti dan piawaian penandaarasan peringkat antarabangsa. Ini termasuk melatih guru teknik pembinaan item “ala PISA” dalam pentaksiran kebangsaan;
- iv. pembangunan profesionalisme guru secara berstruktur dan berterusan untuk meningkatkan kecekapan guru dalam penguasaan kandungan dan penguasaan kemahiran dengan merujuk kepada kompetensi guru bidang Sains dan Matematik.
- v. pengukuhan pendidikan STEM bagi memantapkan penguasaan murid dalam mata pelajaran STEM serta meningkatkan minat murid dalam bidang STEM;
- vi. penumpuan kepada usaha untuk meningkatkan pencapaian murid dalam Literasi Bacaan yang mendasari Literasi Matematik dan Literasi Saintifik. Ini dilaksanakan melalui program galakan aktiviti

membaca dalam kalangan murid dan kaedah pembelajaran yang mengupayakan murid menyelesaikan masalah yang kompleks dari pelbagai perspektif; dan

- vii. pembangunan bahan sumber PdP yang menggunakan pelbagai pendekatan pembelajaran serta mengambil kira kerangka pentaksiran PISA bagi meningkatkan KBAT dan penguasaan kandungan kurikulum sains dan matematik dalam kalangan murid.

Melalui pelbagai usaha yang telah dan sedang dilaksanakan, KPM berharap pencapaian murid dalam pentaksiran antarabangsa akan menjadi lebih baik. KPM akan terus berusaha untuk memastikan pencapaian murid negara kita berada di kelompok sepertiga teratas sebagaimana dihasratkan dalam Pelan Pembangunan Pendidikan Malaysia (PPPM) 2013-2025.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI ABDUL AZEEZ BIN ABDUL
RAHIM [BALING]**

TARIKH : 24 MAC 2022 (KHAMIS)

SOALAN

Dato' Sri Abdul Azeez bin Abdul Rahim [Baling] minta **MENTERI KOMUNIKASI DAN MULTIMEDIA** menyatakan bagaimanakah Pusat Ekonomi Digital Keluarga Malaysia (PEDi) yang dilancarkan oleh YAB Perdana Menteri baru-baru ini boleh meningkatkan hasil pendapatan para usahawan mikro, kecil dan sederhana di luar bandar.

JAWAPAN

Tuan Yang Dipertua,

Kementerian melalui Suruhanjaya Komunikasi dan Multimedia Malaysia (SKMM) telah mendirikan sejumlah 909 Pusat Internet Komuniti di bawah inisiatif Pemberian Perkhidmatan Sejagat (PPS) sejak tahun 2007 yang kini telah dijenamakan semula sebagai Pusat Ekonomi Digital Keluarga Malaysia (PEDi) pada 21 November 2021.

Selain daripada itu, sebanyak 39 Pusat Internet Desa (PID) di bawah seliaan Kementerian Komunikasi dan Multimedia Malaysia (K-KOMM) juga telah diserahkan kepada SKMM untuk dinaik taraf sebagai PEDi. Majlis pelancaran PEDi telah disempurnakan oleh YAB Perdana Menteri, YAB Dato' Sri Ismail Sabri bin Yaakob di Bangunan Anjung Warisan, Kampung Durian Tawar, Bandar Bera, Pahang.

Fokus pelaksanaan PEDi tertumpu di kawasan yang kurang mendapat liputan jalur lebar seperti di kawasan luar bandar dan pedalaman serta masyarakat yang tinggal di kawasan perumahan kos rendah di kawasan bandar. Objektif utama PEDi adalah untuk menyediakan capaian Internet secara kolektif kepada masyarakat dan kawasan yang kurang mendapat liputan jalur lebar. Selain kemudahan capaian internet, pelbagai kursus dan latihan berasaskan teknologi maklumat dan komunikasi (ICT) turut disediakan.

Masyarakat setempat boleh mengambil bahagian dalam program-program berkaitan e-dagang yang disediakan dan aktiviti yang menggalakkan penciptaan digital serta penyebaran dan penguasaan ilmu pengetahuan digital. Program/aktiviti ini boleh meningkatkan tahap kesedaran dan penglibatan komuniti ke arah peningkatan taraf sosio-ekonomi dan seterusnya memperkasa modal insan dalam kalangan masyarakat. Ia secara tidak langsung merapatkan jurang digital di antara masyarakat bandar dan luar bandar.

Terkini, SKMM telah mengaktifkan sebanyak 600 PEDi di seluruh negara sebagai *One Stop Center* (OSC) melalui Program Pemerkasaan

Pendigitalan Usahawan Kecil (PUPUK) bagi program-program keusahawanan anjuran pelbagai agensi kerajaan seperti Malaysia Digital Economy Corporation (MDEC), Small and Medium Enterprise Corporation Malaysia (SME Corp. Malaysia) MYNIC Berhad, Institut Keusahawanan Negara (INSKEN), Human Resource Development Corporation (HRD Corp), Bank Negara Malaysia serta syarikat-syarikat swasta seperti Shopee Mobile Malaysia Sdn. Bhd., AEON Co (M) Berhad dan Telekom Malaysia Berhad yang akan bertindak sebagai agensi pelaksana bagi pelbagai program pendigitalan ekonomi di PEDi seluruh negara.

Sebagai contoh, hasil usaha sama bersama Shopee, pihak SKMM telah membantu 10,893 usahawan digital untuk menjalankan perniagaan atas talian dengan nilai jualan sebanyak RM11.8 juta. Ini adalah satu usaha bagi merealisasikan sasaran MyDIGITAL dan Rancangan Malaysia Ke-12. Hasrat dan usaha ini akan diteruskan bagi membantu usahawan tempatan khususnya usahawan mikro untuk menyertai ekonomi digital.

Selain daripada itu, melalui kerjasama antara MDEC dan SKMM, Perkhidmatan e-Dagang Setempat atau nama singkatannya PeDAS merupakan inisiatif yang dilaksanakan oleh MDEC untuk membantu perniagaan mikro, kecil dan sederhana (PMKS) luar bandar mahupun miskin bandar bagi memasarkan produk mereka melalui platform e-dagang.

Program ini dilaksanakan di lima buah PEDi bagi memberi peluang dan ruang kepada PMKS luar bandar serta komuniti di kawasan miskin bandar bagi mengasah kemahiran dalam perniagaan e-dagang dan seterusnya mengguna pelbagai aplikasi dan peralatan digital untuk memperkembangkan perniagaan mereka. Modul yang ditawarkan di bawah PeDAS mempunyai 3 tahap iaitu:

- (i) Tahap pertama ialah perniagaan digital, yang mana peserta mempelajari asas-asas keusahawanan digital, seperti pengurusan perniagaan, pengurusan kewangan, kandungan

kreatif, *copywriting* dan pengetahuan asas lain yang berkaitan dengan media sosial;

- (ii) Tahap kedua ialah, e-Dagang, di mana peserta boleh belajar cara menggunakan iklan Facebook untuk meningkatkan jualan dan juga belajar cara menggunakan produk mereka di pasaran seperti Shopee dan Lazada;
- (iii) Pada tahap ketiga, peserta boleh belajar cara membina laman web mereka sendiri dan belajar cara mengurus perniagaan mereka daripada pembungkusan, logistik, penjenamaan dan gerbang pembayaran.

Pada tahun 2022, MDEC menyasarkan untuk meluaskan pelaksanaan program PeDAS di 30 buah PEDi terpilih yang akan dikenal pasti dalam masa terdekat. MDEC juga menyasarkan untuk melatih seramai 5,000 usahawan dan mencapai jumlah jualan sebanyak RM15 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
(LEDANG)**

TARIKH : 24 MAC 2022 (KHAMIS)

SOALAN

**TUAN SYED IBRAHIM BIN SYED NOH [LEDANG] minta MENTERI
PENGANGKUTAN menyatakan :-**

- (a) hala tuju perancangan Kementerian terkait perkembangan aspek keselamatan jalan raya pasca Deklarasi Stockholm 2020 ; dan
- (b) kerjasama rentas Kementerian bagi memenuhi aspirasi Deklarasi Stockholm 2020.

JAWAPAN

Tuan Yang di-Pertua,

1. Kementerian Pengangkutan serta agensi di bawahnya telah membangunkan Pelan Keselamatan Jalan Raya Malaysia (PKJRM) 2022-2030 berpandukan Deklarasi Stockholm dan juga berdasarkan pemetaan yang telah dilaksanakan dalam dasar-dasar semasa Kerajaan seperti Dasar Pengangkutan Negara 2019-2030, Dasar Automotif Negara, Pelan Induk Keselamatan dan Kesihatan Pekerjaan (OSHMP) 2021-2025, dan Malaysian ITS Blueprint. Pelan ini telah dibangunkan hasil kerjasama dan libat urus yang telah diadakan bersama pelbagai agensi kerajaan, pihak swasta dan juga Pertubuhan Bukan Kerajaan (NGO).

2. PKJRM 2022-2030 telah menetapkan sasaran untuk mencapai pengurangan jumlah kematian akibat nahas jalan raya sekurang-kurangnya pada kadar 50% pada tahun 2030. Hala tuju ini juga adalah selaras dengan Deklarasi Stockholm dan sasaran resolusi 74/299, Persatuan Bangsa-Bangsa Bersatu (PBB), yang mengisytiharkan tahun 2021-2030, sebagai dekad tindakan keselamatan yang kedua sejurus tamatnya dekad yang pertama pada tahun 2020 yang lalu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 24 MAC 2022 (KHAMIS)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI PERTANIAN DAN INDUSTRI MAKANAN** menyatakan sejauh mana pelaksanaan Kempen Jihad Memerangi Orang Tengah dalam urusan jual beli di industri pertanian.

JAWAPAN

Tuan Yang Di Pertua,

Untuk makluman Ahli Yang Berhormat, Kempen Jihad Memerangi Orang Tengah telah mula dilaksanakan oleh Kementerian Pertanian pada tahun 2014 bagi mengurangkan kebergantungan yang tinggi kepada orang tengah sekaligus mengelakkan manipulasi ke atas petani. Antara program yang dilaksanakan melalui kempen ini termasuklah menjadikan Pertubuhan Peladang Kawasan (PPK) sebagai Pusat Belian Padi (PBP) (jualan terus kepada PBP), menyediakan dana pinjaman mudah bagi kebajikan kepada petani, program jualan terus hasil tangkapan ikan kepada Persatuan Nelayan Kebangsaan (PNK) dan NEKMAT, penyediaan Tabung Pinjaman Mudah oleh TEKUN Nasional, program penyertaan nelayan di Pasar Nelayan, program landasan pepadanan perniagaan, jaminan pasaran dan harga lantai bagi buah-buahan dan sayuran, memperluas program ladang kontrak bagi usahawan buah-buahan dan sayuran, program jualan terus dari ladang serta penyediaan kemudahan pembiayaan Agrobank kepada pengeluar dan pemasar melalui sistem kredit pengeluaran makanan.

Kementerian juga telah melaksanakan program-program bagi memendekkan rantai nilai pemasaran dengan menggalakkan pengeluar pertanian memasarkan produk mereka terus kepada pasaran runcit atau pengguna samada melalui pemasaran secara konvensional mahupun digital. Selain itu, Kementerian turut membangunkan outlet-outlet peruncitan sebagai ruang pasaran terus dari ladang kepada pengeluar pertanian.

Bagi tujuan itu, Kementerian menggalakkan petani, penternak dan nelayan untuk menjual hasil pengeluaran mereka terus kepada pengguna. Antara langkah yang telah dilaksanakan termasuklah menyediakan akses terus kepada pasaran seperti Pasar Nelayan dan outlet-outlet jualan seperti Pasar Tani Kekal, Agrobazaar Kedai Rakyat, Gera! Buah-buahan Segar dan *MyFarm Outlet* serta memperkukuhkan Program Jualan Terus Dari Ladang (JTDL). Sehingga 31 Januari 2022, terdapat sebanyak 135 buah Pasar Nelayan dengan penglibatan seramai 640 orang peserta di seluruh negara, 34 buah Pasar Tani Kekal (termasuk RTC dan Medan Niaga Satok), 341 buah Agrobazaar Kedai Rakyat, 198

SOALAN NO : 44

buah Gerai Buah-buahan Segar, 177 Agrobazaar Rakyat dan 7 buah *MyFarm Outlet*.

Dalam hal ini, FAMA turut mengambil inisiatif untuk membangunkan usahawan pemasar dalam kalangan pengeluar untuk mengumpul hasil pengeluaran daripada kumpulan pengeluar melalui Program Rakan Pemasar Kontrak Pemasaran (RPKP). Melalui Rancangan Malaysia Ke-12 (RMKe-12), Kementerian mensasarkan pewujudan dan pembangunan seramai 70 usahawan RPKP dengan kuantiti belian 22,500 tan metrik yang bernilai RM51.75 juta.

Dalam masa yang sama, Kementerian juga menggalakkan usahawan pertanian untuk memasarkan hasil pengeluaran mereka melalui platform pemasaran digital. Bagi tujuan itu, Kementerian membangunkan platform pemasaran digital seperti *Agrobazaar Online* (ABO) dan *NekmatBiz* serta menyediakan kursus pemasaran online bagi meningkatkan kadar penggunaan urusaniaga atas talian dalam kalangan petani. Sepanjang tahun 2021, ABO telah mencatatkan nilai jualan sebanyak RM1.27 juta, manakala platform *NekmatBiz* telah menjana jualan sebanyak RM44,861.75. Selain itu, kerjasama strategik dengan platform e-dagang swasta seperti Shopee, Lazada dan Airasia Farm turut membantu meningkatkan kadar peralihan usahawan ke pasaran dalam talian. Sepanjang tahun 2021, nilai jualan yang dicatatkan melalui program kerjasama ini adalah sebanyak RM76.36 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 24 MAC 2022 (KHAMIS)

SOALAN

**TUAN WILLIAM LEONG JEE KEEN [SELAYANG] minta MENTERI
PERTANIAN DAN INDUSTRI MAKANAN menyatakan :-**

- (a) langkah-langkah yang diambil untuk mengawal kenaikan harga makanan; dan
- (b) untuk menyelesaikan kekurangan bekalan makanan saka dan keperluan keselamatan makanan.

JAWAPAN

Tuan Yang di-Pertua,

- (a) Untuk makluman Ahli Yang Berhormat, kawalan kenaikan harga adalah di bawah tanggungjawab Kementerian Perdagangan Dalam Negeri dan Hal Ehwal Pengguna (KPDNHEP) namun Kementerian Pertanian dan Industri Makanan (MAFI) bekerjasama rapat dengan KPDNHEP dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari semasa ke semasa tanpa gagal. Kementerian juga sentiasa memantau kos-kos input di pasaran agar kerajaan dapat mengenalpasti punca kenaikan harga di setiap peringkat perniagaan.

Antara langkah yang diambil adalah mengadakan Skim Harga Maksimum Musim Perayaan dan Skim Harga Maksimum Keluarga Malaysia bagi menetapkan harga maksimum untuk barangan tertentu pada tempoh tertentu. Kerajaan turut melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini. Kerajaan juga melaksanakan Program Jualan Keluarga Malaysia (PJKM) di seluruh negara di lokasi tertentu yang menawarkan barangan pada jualan pada harga yang berpatutan bagi barang keperluan pengguna.

MAFI melihat aspek kebolehcapaian menerusi Pelan Tindakan Dasar Sekuriti Makanan Negara 2021-2025 yang dirangka dengan bermatlamatkan pengukuhan sistem makanan negara bagi menjamin kelangsungan bekalan makanan yang cukup, selamat, bernutrisi dan mampu beli kepada rakyat.

Ini termasuklah usaha-usaha untuk memastikan harga makanan adalah bertepatan dengan kuasa beli rakyat yang dilaksanakan dan

dipantau menerusi Kluster Kebolehcapaian di bawah Kementerian Perdagangan Dalam Negeri dan Hal Ehwal Pengguna (KPDNHEP).

MAFI telah mengatur langkah strategik dalam meningkatkan produktiviti dan efisiensi sepanjang rantai nilai sektor agromakanan bagi memenuhi permintaan pasaran tempatan dalam usaha untuk menstabilkan harga makanan antaranya menerusi:

- (i) pelaksanaan Program *Smart* Sawah Berskala Besar (*Smart* SBB) yang menyasarkan peningkatan purata hasil padi per hektar daripada 3.5 tan metrik kepada 7.0 tan metrik dalam tempoh Rancangan Malaysia Kedua Belas (RMK-12) melalui pelbagai kaedah pelaksanaan seperti pertanian kontrak, sewaan dan sebagainya;
- (ii) pembangunan makanan ternakan alternatif dan pembangunan industri benih tempatan bagi mengurangkan kebergantungan negara kepada import input pertanian selain menyumbang kepada kestabilan harga makanan;
- (iii) pembangunan dan pemeraksanaan platform pemasaran produk agromakanan secara e-dagang bagi mengurangkan peranan orang tengah menerusi FAMA dan LKIM seperti Agrobazaar Online dan NEKMATBIZ serta kerjasama strategik dengan platform swasta; dan
- (iv) pemberian insentif kepada pengeluaran makanan yang selamat dan sihat bagi meningkatkan ketersediaan makanan berkhasiat dengan harga berpatutan di pasaran.

MAFI yakin inisiatif-inisiatif tersebut dapat menyumbang dalam memastikan penawaran makanan di pasaran munasabah harganya serta mampu dibeli oleh rakyat.

- (b) Tanaman saka merupakan tanaman buah-buahan kekal seperti durian, rambutan, nangka dan lain-lain tanaman yang berbatang keras, mempunyai jangka hayat yang panjang dan mampu

mengeluarkan hasil untuk tempoh hayat yang lama. Kebanyakan tanaman saka utama telah mencapai tahap sara diri (SSL) melebihi 100% kecuali mangga iaitu 32.1%. Bagi terus meningkatkan bekalan makanan saka, Kementerian melalui Jabatan dan Agensi akan melaksanakan pelbagai program dan projek di bawah RMK-12. Bagi tahun 2021-2025, Jabatan Pertanian telah diluluskan 10 projek pembangunan pertanian melibatkan peruntukan sebanyak RM41.5 juta. Projek ini melibatkan agihan pelbagai insentif dan bantuan dalam bentuk in-kind seperti input pertanian (benih, baja dan racun), peralatan kecil pertanian, penyediaan kawasan, penyediaan sistem pengairan dan geran pepadanan bagi menggalakkan pengeluaran hasil tanaman oleh petani. Selain itu, Dasar Agromakanan Negara 2021-2030 (DAN 2.0) memberikan tumpuan khusus kepada pembangunan subsektor tanaman buah-buahan dan sayur-sayuran melalui strategi berikut:

- (i) mempergiat penyelidikan penyuntingan genom dan penggunaan bioteknologi;
- (ii) meningkatkan kecekapan pengurusan tanah jangka panjang yang melibatkan semua penggerak industri merentasi rantai nilai;
- (iii) menggalakkan amalan pertanian dan pengeluaran makanan secara mampan; dan
- (iv) melonjakkan pertumbuhan tanaman buah-buahan dan sayur-sayuran bernilai tinggi.

Melalui strategi di atas, pengeluaran buah-buahan dan sayur-sayuran akan dapat dipertingkatkan dan mencapai tahap sara diri (SSL) yang disasarkan masing-masing pada 83% dan 79% menjelang tahun 2030.

Sekian, terima kasih.

**PEMBERITAHUAN PERTANYAAN LISAN DI BAWAH PERATURAN
MESYUARAT 22 (5) DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 24 MAC 2022 (KHAMIS)

SOALAN

PUAN TEO NIE CHING [KULAI] minta **MENTERI KANAN PENDIDIKAN** menyatakan status pemilikan tanah sekolah bagi sekolah berikut dan tarikh memperoleh kelulusan penubuhan/pembinaan SJKC Kuek Ho Yao, Johor, SJKC Sim Mow Yu, Johor, SJKC Poay Chai, Johor dan SJKC Tun HS Lee, Johor.

JAWAPAN

Tuan Yang di-Pertua,

Untuk makluman Ahli Yang Berhormat, status pemilikan tanah dan tarikh kelulusan penubuhan serta pembinaan adalah seperti berikut:

Bil	Nama Sekolah	Status hakmilik tanah	Tarikh kelulusan penubuhan	Tarikh kelulusan pembinaan
1	SJKC Kuek Ho Yao, Johor	Permohonan pemberimilikan tanah telah dikemukakan kepada Pejabat Pentadbiran Tanah Johor Bahru pada 23 Disember 2020.	26 Oktober 2017	8 Oktober 2020
2	SJKC Sim Mow Yu, Johor	Belum berstatus Pesuruhjaya Tanah Persekutuan.	26 Oktober 2017	Tiada permohonan pembinaan sehingga kini.
3	SJKC Poay Chai, Johor	Selesai bayaran notis 5A pada 24 Ogos 2020.	Kelulusan pindah lokasi sekolah pada 26 Oktober 2017	6 Januari 2020
4	SJKC Tun HS Lee, Johor	Belum berstatus Pesuruhjaya Tanah Persekutuan.	26 Oktober 2017	Tiada permohonan pembinaan sehingga kini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB DATUK HAJI SHABUDIN BIN
YAHAYA [TASEK GELUGOR]**

TARIKH : 24 MAC 2022 (KHAMIS)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian berhasrat menyelaraskan NGO yang menjalankan aktiviti kebajikan bagi mengelakkan penipuan atau pihak menyalahgunakan dana bantuan.

JAWAPAN

Tuan Yang di-Pertua,

NGO kebajikan yang memberikan perkhidmatan **penjagaan, perlindungan dan pemulihan kepada kumpulan sasar Jabatan iaitu warga emas, orang kurang upaya dan kanak-kanak yang menerima bantuan kewangan daripada Jabatan akan dilakukan pemantauan secara berkala** oleh pegawai daripada Jabatan.

NGO tersebut juga **perlu mengemukakan laporan perbelanjaan peruntukan** yang diterima secara tahunan kepada Jabatan. Ini adalah bagi memastikan NGO membelanjakan peruntukan yang diterima mengikut kelulusan yang telah dimeterai.

Jabatan hanya menyelaraskan NGO yang menerima bantuan kewangan daripada JKM sahaja. NGO kebajikan yang tidak menerima bantuan kewangan daripada JKM adalah bukan di bawah bidang kuasa JKM. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN LIM KIT SIANG
[ISKANDAR PUTERI]**

TARIKH : 24 MAC 2022 (KHAMIS)

SOALAN

TUAN LIM KIT SIANG [ISKANDAR PUTERI] minta **MENTERI KEWANGAN** menyatakan perkembangan terkini pelaburan pemulihan Dana Impak yang diuruskan oleh Khazanah Nasional Berhad.

JAWAPAN

Tan Sri Yang Di Pertua,

Sejajar dengan mandat Khazanah Nasional Berhad (Khazanah), Lembaga Pengarah Khazanah telah meluluskan strategi keseluruhan Dana Impak pada 27 November 2021.

Dana Impak, iaitu peruntukan berjumlah RM6 bilion untuk tempoh lima (5) tahun akan datang, bertujuan memangkin bidang pertumbuhan baharu, membangun daya saing ekonomi Malaysia serta meningkatkan daya tahan, sambil memacu hasil sosio-ekonomi utama negara. Berikut adalah enam (6) tema utama yang akan menjadi tumpuan Dana Impak:

- **Masyarakat Digital dan Hab Teknologi:** Memanfaatkan pendigitalan dan pembangunan teknologi untuk meningkatkan produktiviti dan pertumbuhan ekonomi;

- **Kesihatan dan Pendidikan Berkualiti:** Memastikan akses yang sama kepada kesihatan dan pendidikan dalam persekitaran demografi global yang kian berubah;
- **Pekerjaan yang Baik/ Wajar dan Mobiliti Sosial:** Merapatkan jurang pendapatan dan kekayaan untuk memastikan kestabilan sosial di masa hadapan;
- **Jaminan Makanan dan Tenaga:** Memastikan ketersediaan dan keselamatan sumber kritikal seperti makanan dan tenaga;
- **Ketahanan Iklim:** Memelihara dan melindungi alam sekitar; dan
- **Meningkatkan Daya Saing dalam Pasaran Global:** Menyokong Malaysia untuk kekal berdaya saing dalam landskap geopolitik dan ekonomi global semasa.

Bagi menjamin kejayaannya, Dana Impak memerlukan penglibatan dan sokongan daripada pelbagai pihak berkepentingan termasuk Kerajaan, sektor swasta, sektor sosial dan entiti asing.

Khazanah kini sedang bekerjasama dengan beberapa syarikat sektor swasta yang berkaitan serta pihak berkepentingan awam merentasi ekosistem bagi inisiatif utama Dana Impak untuk memahami cabaran sedia ada dalam setiap tema yang dikenal pasti serta membina kerjasama strategik untuk membangunkan penyelesaian berpotensi bagi merapatkan jurang kritikal ini.

Antara inisiatif yang telah diperkenalkan oleh Khazanah di bawah Dana Impak adalah Cabaran Inovasi Impak Khazanah (KIIC) yang tertumpu kepada pencarian penyelesaian inovatif oleh usahawan tempatan bagi membantu komuniti warga emas di Malaysia. Khazanah berhasrat untuk terus meneroka lebih banyak program KIIC dalam pelbagai tema di seluruh negara. Khazanah akan terus membuat pengumuman berkaitan pelaburan dan inisiatif bawah Dana Impak dari semasa ke semasa. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJAH RUBIAH BINTI HAJI WANG
[KOTA SAMARAHAN]**

TARIKH : 24 MAC 2022 (KHAMIS)

SOALAN

DATUK HAJAH RUBIAH BINTI HAJI WANG [KOTA SAMARAHAN] minta **MENTERI KANAN PENDIDIKAN** menyatakan bilangan Pegawai Perkhidmatan Pendidikan gred DG41 yang telah dilantik menerusi pengambilan khas *one off* September 2021 khususnya di negeri Sarawak.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* bagi mengisi kekosongan guru di sekolah KPM termasuk di Negeri Sarawak. Urusan pengambilan PPP ini adalah di bawah bidang kuasa Suruhanjaya Perkhidmatan Pendidikan (SPP) selaku Pihak Berkuasa Melantik.

Untuk makluman Ahli Yang Berhormat, sehingga 19 Februari 2022, seramai 13,760 orang calon telah berjaya di dalam temu duga SPP dan telah ditawarkan lantikan tetap PPP DG41. Daripada jumlah tersebut, KPM telah menempatkan seramai 1,674 guru ke negeri Sarawak. Daripada jumlah tersebut juga, seramai 901 orang adalah guru kelahiran Sarawak.

Sekian, terima kasih.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG LING BIU (SARIKEI)

TARIKH : 24 MAC 2022 (KHAMIS)

SOALAN

TUAN WONG LING BIU (SARIKEI) minta **MENTERI PENGAJIAN TINGGI** menyatakan apakah jumlah maksimum dan minimum yang boleh dipinjam oleh seorang pelajar dari pihak PTPTN. Adakah terdapat perubahan dalam kriteria pada waktu pandemik COVID-19 ini.

JAWAPAN

Tan Sri Yang di-Pertua,

Untuk makluman Ahli Yang Berhormat, penetapan kadar atau jumlah pembiayaan PTPTN telah ditentukan (*predetermined*) berdasarkan pendapatan keluarga, peringkat pengajian, mod pengajian, serta jenis institusi pendidikan tinggi (IPT) sama ada Institut Pendidikan Tinggi Awam (IPTA) atau Institut Pendidikan Tinggi Swasta (IPTS), yang tidak bersandarkan kepada kadar yuran pengajian yang dikenakan oleh IPT.

Secara umumnya, jumlah minimum dan maksimum pinjaman PTPTN adalah di antara RM2,380 (program Diploma IPTA) sehingga RM50,000 (program Sarjana Muda Perubatan IPTS). Pada masa kini, kadar atau jumlah pinjaman PTPTN adalah masih kekal sebagaimana sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 24 MAC 2022 (KHAMIS)

SOALAN

TUAN LUKANISMAN BIN AWANG SAUNI [SIBUTI] minta **MENTERI KANAN PENDIDIKAN** menyatakan adakah pihak Kementerian membuat kajian potensi pelajar menghadapi kemurungan dan kegelisahan (*Anxiety*) setelah sesi persekolahan bersemuka bermula.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin dan peka terhadap psikososial serta kebajikan murid. KPM dengan kerjasama Kementerian Kesihatan Malaysia (KKM) telah melaksanakan Program Minda Sihat Di Sekolah Dalam Kebiasaan Baharu bagi memperkasa psikososial, menyokong kesejahteraan sosioemosi murid dan melaksanakan intervensi dalam menguruskan emosi mereka dengan baik semasa sesi persekolahan bermula. Melalui program ini, Saringan Minda Sihat dilaksanakan sebagai pengesanan awal untuk mengenal pasti murid yang mempunyai isu berkaitan emosi.

Untuk makluman Ahli Yang Berhormat, seramai 818,430 orang murid Tahun Lima dan Tahun Enam di sekolah rendah telah mengambil bahagian dalam saringan ini bagi tempoh Jun hingga Ogos 2021. Berdasarkan dapatan saringan tersebut, terdapat 87.45 peratus murid dikategorikan tidak berisiko iaitu tidak menunjukkan perasaan sedih berpanjangan, murung dan kurang minat apabila melakukan kerja-kerja lebih. Manakala 12.55 peratus murid dikategorikan sebagai berisiko dengan menunjukkan perasaan sedih berpanjangan, murung dan kurang minat melakukan kerja-kerja lebih.

Murid sekolah rendah yang dikenal pasti berisiko diberikan intervensi khusus melalui aktiviti teknik relaksasi, *mindfulness*, sesi bimbingan dan kaunseling serta konsultasi ibu bapa/ penjaga bagi meningkatkan kemahiran gaya daya tindak (coping skill) murid berkenaan. Ini kerana murid didapati kurang kemahiran mengurus emosi dengan baik apabila menghadapi situasi mencabar. Manakala murid yang dikenal pasti berada dalam kategori tidak berisiko diberikan intervensi umum seperti panduan amalan gaya hidup sihat.

Untuk makluman Ahli Yang Berhormat, murid sekolah menengah bermula daripada kelas peralihan sehingga Tingkatan Enam berjumlah 1,737,755 orang juga telah mengambil bahagian dalam saringan ini. Isu psikososial yang dikenal pasti berdasarkan saringan tersebut bagi murid sekolah menengah ialah tanda awal kebimbangan dan kemurungan.

Bagi murid sekolah menengah yang dikenal pasti mempunyai tanda awal kebimbangan dan kemurungan, mereka perlu menjalani intervensi menggunakan Modul Minda Sihat KPM dan Modul Kesihatan Mental Remaja KKM. Intervensi ini bertujuan untuk meningkatkan kemahiran menangani stres, kemahiran menyelesaikan masalah dan menguruskan emosi dengan baik bagi membantu murid berada dalam persekitaran yang selamat.

Di samping itu, bagi murid sekolah rendah yang berisiko, sokongan daripada ibu bapa, guru serta rakan diberikan secara berterusan bagi meningkatkan kemahiran gaya daya tindak (*coping skill*). Manakala murid sekolah menengah yang menunjukkan tanda kecelaruan emosi seperti kemurungan dan kebimbangan yang teruk dan sangat teruk, pihak sekolah akan berbincang bersama-sama ibu bapa/penjaga untuk merujuk murid berkenaan kepada pakar perubatan di klinik kesihatan atau hospital berdekatan.

KPM akan terus memberi perhatian kepada pengurusan kesihatan mental murid untuk memberi sokongan kepada kesejahteraan minda mereka.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 24 MAC 2022 (KHAMIS)

SOALAN

TUAN FONG KUI LUN [BUKIT BINTANG] minta **MENTERI PELANCONGAN, SENI DAN BUDAYA** menyatakan sambutan dan masalah yang timbul berikutan pelancaran Gelembung Pelancongan Langkawi dan usaha merancakkan semula industri pelancongan.

JAWAPAN

Tuan Yang di-Pertua,

1. Kerajaan telah bersetuju dengan cadangan Projek Rintis Gelembung Pelancongan Domestik di Langkawi bermula 16 September 2021 sehingga kebenaran rentas negeri pada 11 Oktober 2021 dan diikuti Projek Rintis Gelembung Pelancongan Antarabangsa Langkawi (LITB) bermula 15 November 2021.
2. Projek rintis Gelembung Pelancongan Domestik telah mencatatkan kehadiran lebih 720,000 pelancong domestik ke Langkawi dalam tempoh 16 September sehingga 31 Disember 2021. Sementara itu, pelaksanaan LITB selama tiga (3) bulan juga telah mencatatkan kehadiran lebih 5,800 orang pelancong asing dan menjana pendapatan melebihi RM28 juta kepada ekonomi Pulau Langkawi.
3. Data-data ini telah membuktikan bahawa inisiatif gelembung pelancongan tersebut telah berupaya menghidupkan semula aktiviti pelancongan di Langkawi yang sememangnya bergantung kepada para pelancong samada domestik atau antarabangsa. Perkembangan positif

ini membawa nafas baru kepada syarikat-syarikat agensi pelancongan, operator-operator produk pelancongan, pemandu-pemandu pelancong, pengusaha-pengusaha bot pelancongan, pengusaha-pengusaha restoran serta penduduk-penduduk tempatan di Langkawi, yang kebanyakannya bergantung kepada aktiviti pelancongan sebagai punca pendapatan utama.

4. Sungguhpun begitu, kejayaan projek rintis ini tidak hadir tanpa sebarang cabaran. Antara isu yang perlu ditangani Kementerian Pelancongan, Seni dan Budaya (MOTAC) di awal pelaksanaan Projek Rintis Gelembung Pelancongan Langkawi adalah untuk memastikan semua pihak yang merangkumi pelbagai pihak seperti syarikat penerbangan, agensi pelancongan, pihak kedutaan di luar negara dan sebagainya untuk memahami segala prosedur operasi standard dan kemudiannya untuk dimaklumkan kepada pelancong asing. Cabaran ini telah ditangani oleh MOTAC dengan kerjasama semua pihak, seterusnya membawa kepada beberapa penambahbaikan, terutamanya yang melibatkan SOP perjalanan.

5. Selain daripada itu, LITB juga berhadapan dengan cabaran kekurangan penerbangan terus (*direct flight*) dari luar negara ke Langkawi. Para pelancong antarabangsa akan mendarat di KLIA sebelum menyambung perjalanan ke Langkawi menggunakan penerbangan tempatan. Terdapat jurang perbezaan antara kapasiti penerbangan antarabangsa berbanding kapasiti penerbangan tempatan antara KLIA ke Langkawi. Jurang ini sedikit sebanyak akan mengganggu kelancaran perjalanan yang memungkinkan pelancong antarabangsa terpaksa menunggu penerbangan sambungan (*connecting flight*) dengan lebih lama.

6. Pada bulan Februari 2022, Kerajaan telah bersetuju untuk melanjutkan LITB sehingga sempadan negara dibuka. Seiring dengan persetujuan tersebut, SOP kemasukan pengembara asing ke Malaysia melalui LITB juga telah diselaraskan mengikut ketetapan dan garis panduan terkini yang dikeluarkan oleh Kementerian Kesihatan Malaysia (KKM). Penambahbaikan ke atas SOP ini akan menjadi penanda aras ke atas SOP pembukaan sempadan negara sepenuhnya kelak.

7. Pada masa ini, MOTAC sentiasa bersedia untuk mempromosi negara menerusi pelbagai inisiatif bagi menarik minat pelancong ke Malaysia seperti kempen "*Book Now and Travel Later*" yang dijalankan oleh Tourism Malaysia dengan kerjasama syarikat-syarikat/agensi-agensi pelancongan. MOTAC juga sedia bekerjasama dengan Kementerian dan Agensi Kerajaan yang berkaitan seperti Kementerian Luar Negeri, Kementerian Kesihatan, Kementerian Pengangkutan dan Jabatan Imigresen Malaysia dalam merangka strategi, pelan tindakan dan rundingan bagi mewujudkan *Vaccinated Travel Lane* (VTL) dan Gelembung Perjalanan (*Travel Bubble*) dengan negara-negara yang berpotensi.

8. Antara inisiatif yang dilaksanakan dalam merencanakan Pelancongan Domestik termasuklah:

- (i) pemberian baucar diskaun/rebat sebanyak RM20juta bertujuan meningkatkan promosi pelancongan Malaysia dan juga kuasa membeli (*purchasing power*) pengguna ke atas produk-produk pelancongan, seni dan budaya;
- (ii) pemberian dana sokongan sebanyak RM5juta bagi aktiviti promosi dan penggiat pelancongan dalam bentuk bantuan kewangan kepada persatuan/ kelab/ syarikat/ agensi pelancongan; dan
- (iii) Geran Sokongan Pelancongan, Seni dan Budaya (GSPSB) berjumlah RM25juta.

9. Di samping itu, Kerajaan juga bersetuju dengan cadangan MOTAC untuk melaksanakan Gelembung Pelancongan Domestik Langkawi yang telah dilancarkan semasa Perintah Kawalan Pergerakan (PKP) dan larangan aktiviti rentas negeri masih berkuatkuasa. Ini dilaksanakan sebagai langkah untuk melonjakkan semula aktiviti pelancongan domestik setelah sekian lama terhenti sepenuhnya.

10. Pada tahun 2020 dan 2021, MOTAC telah memperuntukkan sebanyak RM61juta bagi penyaluran bantuan kewangan kepada lebih 20,000 pengusaha pelancongan yang berdaftar dengan MOTAC iaitu syarikat/agensi pelancongan (TOBTAB), ejen Syarikat Malaysia My

SOALAN NO : 52

Second Home (MM2H), pengusaha inap desa, pemandu pelancong dan pengusaha spa serta pusat urut kaki di seluruh negara.

11. Pada tahun 2022, Kerajaan akan terus menyalurkan bantuan-bantuan menerusi Bajet 2022 bagi membantu kelangsungan syarikat-syarikat pelancongan yang terjejas, antaranya:

- (i) Skim Pembiayaan Pelancongan PENJANA yang diselaraskan oleh Bank Negara Malaysia dengan kerjasama 12 institusi bank;
- (ii) Program Subsidi Upah yang akan memanfaatkan lebih 26 ribu majikan dan 330 ribu pekerja;
- (iii) RM85juta bagi Bantuan Khas Tunai kepada pengusaha pelancongan yang berdaftar dengan MOTAC;
- (iv) RM30juta pemberian geran padanan bagi tujuan pembaikan kepada hotel bajet serta geran pembaikan kepada lebih 3,300 pengusaha inap desa yang berdaftar dengan MOTAC;
- (v) pelanjutan beberapa galakan cukai termasuk pengecualian cukai pendapatan kepada penganjur aktiviti kesenian dan kebudayaan serta pertandingan sukan dan rekreasi bertaraf antarabangsa sehingga tahun taksiran 2025; dan
- (vi) pelanjutan pengecualian cukai pelancongan sehingga 31 Disember 2022.

12. Di samping itu, MOTAC turut melanjutkan tempoh kelonggaran hal-hal berkaitan fi lesen dan kompaun kepada TOBTAB dan pemandu pelancong berlesen sehingga Jun 2022 bagi membantu penggiat industri pelancongan yang terkesan daripada penularan COVID-19, antaranya:

- (i) kelonggaran berkaitan kompaun;
- (ii) pengecualian fi kepada TOBTAB dan pemandu pelancong; dan
- (iii) kelonggaran syarat lesen kepada TOBTAB.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HAJI TAJUDDIN BIN
ABDUL RAHMAN [PASIR SALAK]**

TARIKH : 24 MAC 2022 (KHAMIS)

SOALAN

DATO' SRI HAJI TAJUDDIN BIN ABDUL RAHMAN [PASIR SALAK] minta **MENTERI PELANCONGAN, SENI DAN BUDAYA** menyatakan mengenai status membaik pulih Kompleks Sejarah Pasir Salak. Jika kompleks ini dapat dibaik pulih, ianya dapat memberi manfaat kepada sektor pelancongan di Parlimen Pasir Salak.

JAWAPAN

Tuan Yang di-Pertua,

1. Untuk makluman, Kompleks Sejarah Pasir Salak adalah di bawah pentadbiran Kerajaan Negeri Perak dan bukannya di bawah pentadbiran Jabatan Muzium Malaysia, sebuah agensi di bawah Kementerian Pelancongan, Seni dan Budaya (MOTAC).
2. Pada masa ini, pewartaan Kompleks Sejarah Pasir Salak di bawah Akta Warisan Kebangsaan 2005 [Akta 645] belum merangkumi keseluruhan kompleks tersebut. Sehingga kini, hanya Tugu Birch Pasir Salak yang berada di kompleks tersebut yang telah diwartakan di bawah Akta 645 bagi kategori monumen. Sementara itu, Rumah Dato' Maharajalela kini telah disenaraikan dalam Inventori Jabatan Warisan Negara (JWN). Ia kini melalui kajian terperinci untuk dinilai kriteria yang berkaitan bagi tujuan pewartaan.
3. Untuk makluman Ahli Yang Berhormat, di bawah Rancangan Malaysia Ke-11, MOTAC telah memperuntukkan sebanyak RM100,000 bagi menaik taraf anjung dan lantai kayu di Kompleks Sejarah Pasir Salak.
4. Bagi cadangan pembangunan projek pelancongan di bawah RMK-12 yang akan datang, MOTAC akan bekerjasama dengan agensi-agensi kerajaan negeri seperti Unit Perancang Ekonomi Negeri (UPEN) Perak dan Pihak Berkuasa Tempatan (PBT) yang terlibat berhubung sebarang cadangan pembangunan pelancongan di Negeri Perak amnya dan di Pasir Salak khususnya. Hal ini bagi memastikan produk pelancongan di Malaysia dapat dibangunkan yang bukan sahaja dapat memberi manfaat kepada masyarakat tempatan malah menyumbang kepada penjanaaan ekonomi negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
(MACHANG)**

TARIKH : 24 MAC 2022 (KHAMIS)

SOALAN

DATUK HAJI AHMAD JAZLAN BIN YAAKUB (MACHANG) Minta **MENTERI TENAGA DAN SUMBER ASLI** menyatakan adakah Kementerian telah melaksanakan perbincangan meja bulat bersama pemain industri sebelum menaikkan kadar tarif elektrik yang berkuatkuasa 1 Febuari lalu. Adakah Kementerian sedar bahawa tindakan menaikkan kadar lebih daripada 15 peratus atau 25 peratus di luar waktu puncak amat membebankan dan akan mengganggu rantai bekalan serta kos barangan. Apakah tindakan Kementerian bagi mengatasi masalah ini.

JAWAPAN

Tuan Yang di-Pertua,

1. Pelarasan tarif elektrik di Semenanjung di bawah mekanisme *Imbalance Cost Pass-Through* (ICPT) disemak setiap enam bulan sekali dengan mengambil kira harga bahan api di pasaran dunia serta kos-kos penajaan yang lain untuk tempoh enam bulan ke belakang. Dalam hal ini, pemain industri telah menjangkakan kenaikan tarif elektrik berikutan kenaikan harga bahan api di pasaran dunia terutamanya harga arang batu yang meningkat sebanyak 45% dan perkara ini adalah di luar kawalan Kerajaan.
2. Gabungan Persatuan-persatuan Pengguna Malaysia atau FOMCA melalui kenyataan media pada 29 Januari 2022 menyambut baik keputusan Kerajaan tersebut dan tidak menafikan akan ada kenaikan harga barang di pasaran kerana peningkatan kos operasi yang perlu ditanggung oleh pihak industri. Dalam sesi tersebut, FOMCA telah menyarankan agar Kerajaan menyediakan inisiatif-inisiatif yang dapat membantu mengurangkan kos operasi pihak industri.
3. Kementerian menyedari kekusaran pemain industri mengenai surcay yang dikenakan melalui ICPT pada kali ini. Maka, pengguna-pengguna terutamanya daripada kategori komersial dan industri digalakkan untuk melanggan inisiatif *Green Electricity Tariff* (GET) yang bukan sahaja boleh membantu mengurangkan bil elektrik kerana pelanggan GET akan dikecualikan daripada membayar surcay untuk tempoh setahun, malah mereka akan turut memiliki *Renewable Energy Certificate* (REC) yang menyokong agenda Tenaga Boleh Baharu negara.
4. Selain itu, pengguna-pengguna bukan domestik juga dicadangkan untuk menerokai potensi solar melalui pemasangan sistem solar bagi kegunaan sendiri (*self-consumption* – SelCo) atau menyertai Program Net Energy Metering 3.0 (NEM 3.0). Kementerian juga menyarankan pemain industri untuk mengamalkan penggunaan elektrik secara cekap dan menggunakan peralatan cekap tenaga yang mendapat penarafan 4 atau 5 bintang oleh Suruhanjaya Tenaga.

5. Bagi pemilik-pemilik syarikat yang merupakan pengguna elektrik di bawah kategori industri atau komersial yang menggunakan lebih 3 juta kWj dalam tempoh enam bulan berturut-turut di premis mereka dan berdaftar di bawah Peraturan Tenaga Elektrik 2008 boleh memohon dana melalui “Program Geran Audit Tenaga Bersyarat dan Pengurusan Tenaga dalam Sektor Industri dan Komersial” untuk melaksanakan audit tenaga secara kolaborasi dengan Syarikat Perkhidmatan Tenaga – *Energy Service Company* (ESCO) bagi mengenal pasti potensi penjimatan tenaga elektrik di premis dan pemasangan mereka.

6. Inisiatif-inisiatif tersebut bukan sahaja dapat membantu mengurangkan bil elektrik bagi pengguna bukan domestik, malah ia dapat dilihat sebagai usaha ke arah melestarikan perniagaan masing-masing dalam memenuhi komitmen ESG mereka.

7. Selain itu, ST juga telah dan akan mengadakan beberapa sesi libat urus bagi menerangkan dengan lebih lanjut berkenaan proses penetapan tarif elektrik di Malaysia melalui mekanisma *Incentive-Based Regulation* (IBR) dan pelarasan tarif yang dilaksanakan setiap enam (6) bulan melalui mekanisme *Imbalance Cost Pass-Through* (ICPT). Sesi libat urus tersebut diadakan secara berfasa bermula pada 27 Januari 2022 hingga 9 Mac 2022 yang melibatkan *SME Association*, *Federation of Malaysian Manufacturers* (FMM) dan *Malaysian Investment Development Authority* (MIDA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : Y.B. DATUK DR. SHAHRUDDIN BIN MD
SALLEH [SRI GADING]**

TARIKH : 24 MAC 2022 (KHAMIS)

SOALAN

DATUK DR. SHAHRUDDIN BIN MD SALLEH [SRI GADING] minta **MENTERI KEWANGAN** menyatakan adakah Kerajaan berhasrat untuk memperkenalkan peraturan baharu terhadap bank di Malaysia dalam memberi pinjaman kepada syarikat besar di dalam dan luar negara.

JAWAPAN

Tan Sri Yang di-Pertua,

Pemberian pinjaman oleh institusi kewangan kepada mana-mana pihak merupakan keputusan berdasarkan pertimbangan komersial melalui penilaian kredit dan kesanggupan mengambil risiko yang diketahui oleh institusi tersebut, tanpa perlu mendapatkan sebarang kelulusan dari Bank Negara Malaysia (BNM), Kementerian Kewangan atau pemegang saham.

Penilaian kredit oleh institusi perbankan adalah berdasarkan pertimbangan mengenai kemampuan peminjam membayar balik pinjaman. Setelah permohonan pinjaman diterima, bank akan membuat penilaian kredit terhadap peminjam dengan mengambil kira keupayaan peminjam membayar balik pinjaman yang merangkumi perkara-perkara berikut:

- Kedudukan kewangan yang mantap
- Profil risiko peminjam
- Prospek ekonomi dan prospek khusus industri
- Daya maju projek dan perniagaan
- Analisis aliran tunai bagi memastikan keupayaan peminjam memenuhi obligasi hutang jangka pendek dan jangka panjang mereka

Jika bank-bank berpuas hati, mereka boleh memberikan kemudahan tanpa cagaran. Bank-bank boleh meluluskan pinjaman tanpa cagaran berdasarkan kesanggupan bank tersebut mengambil risiko pada peringkat dalaman, penilaian kredit yang memuaskan semasa permohonan dibuat dan kelulusan dibuat mengikut proses tadbir urus dalaman.

Pengurusan risiko kredit dan amalan peruntukan (*provisioning practices*) oleh institusi perbankan adalah berpandukan kepada dokumen dasar BNM mengenai risiko kredit (*policy document on Credit Risk*), dokumen dasar mengenai had dedahan pihak tunggal lain yang berkenaan (*policy document on Counterparty Exposure Limit*) dan dokumen dasar mengenai ujian tekanan (*policy document on Stress Test*). Dari semasa ke semasa, BNM akan mengkaji semula peraturan sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
(SETIU)**

TARIKH : 24 MAC 2022 (KHAMIS)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI PERTANIAN DAN INDUSTRI MAKANAN** menyatakan kerosakan dan jumlah kerugian golongan petani dan penternak akibat banjir besar pada penghujung tahun lalu serta jumlah bantuan yang telah disalurkan kepada golongan sasaran.

JAWAPAN:

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa prihatin dalam menyantuni golongan sasaran seperti pesawah, pekebun-pekebun kecil, penternak dan lain-lain terutama yang mengalami kerugian akibat ditimpa bencana, termasuklah bencana banjir yang melanda negara baru-baru ini. Dua (2) bentuk bantuan yang disediakan oleh MAFI kepada golongan sasaran yang terkesan akibat bencana ialah Program Pembangunan Semula Projek Agromakanan (PPSPA) dan Tabung Bencana Tanaman Padi (TBTP).

Berikutan daripada bencana banjir yang berlaku pada Disember 2021, MAFI telah mengaktifkan Bilik Gerakan Banjir MAFI sejeurus selepas kejadian banjir tersebut dilaporkan. Bilik gerakan tersebut beroperasi selama tujuh (7) hari seminggu dengan objektif untuk mengenal pasti dan mengumpul maklumat golongan sasaran Kementerian (Wira Agro) iaitu petani, penternak dan nelayan yang terjejas akibat banjir melalui laporan harian daripada Jabatan dan Agensi di bawah MAFI termasuk cawangan di peringkat negeri.

Berdasarkan pelaporan yang diterima, anggaran kasar kerugian agromakanan (selain padi) yang telah dikenal pasti oleh Jabatan dan Agensi di bawah MAFI adalah sejumlah RM90.6 juta. Jumlah ini dijangka akan dimuktamadkan secara berperingkat selepas penilaian menyeluruh yang sedang dilakukan oleh MAFI dan Jabatan / Agensi di peringkat Negeri dan Daerah dan permohonan bantuan akan dipertimbangkan dalam Mesyuarat Jawatankuasa Induk PPSPA bagi bantuan di bawah PPSPA.

Sejumlah RM21.18 juta bantuan PPSPA telah diluluskan pada Januari 2022 yang melibatkan sejumlah 1,821 golongan sasaran yang terkesan akibat bencana banjir baru-baru ini.

Selain daripada bantuan PPSPA, Tabung Bencana Tanaman Padi (TBTP) merupakan salah satu bantuan segera berbentuk *touchpoint* kepada pesawah yang terjejas atau mengalami kemerosotan pengeluaran padi di luar jangka. Bantuan khusus yang disalurkan kepada pesawah dan pengusaha padi di bawah Tabung TBTP dinilai berdasarkan pelbagai faktor seperti serangan penyakit, bencana alam dan lain-lain faktor yang tidak dapat dielakkan. Kategori bencana juga boleh ditakrifkan seperti berikut:

- I. Kejadian bencana alam seperti banjir, ribut taufan, gempa bumi, tsunami, El-nino, ombak besar, kemarau dan tanah runtuh;
- II. Kejadian empangan/takungan air pecah;
- III. Penyakit tanaman padi yang bukan disebabkan oleh kecuaiian manusia; dan
- IV. Lain-lain kejadian bencana yang akan diperaku dan diisytiharkan Jabatan Teknikal dan Jawatankuasa Teknikal (TBTP).

Kadar bantuan yang diberikan adalah berdasarkan tahap kerosakan serta usia tanaman padi yang terjejas. Secara umumnya, kadar bantuan adalah antara RM876.00 hingga RM1,800.00 sehektar dengan keluasan maksimum tiga (3) hektar sahaja. Sehingga 10 Disember 2021, seramai 9,082 orang pesawah dengan keluasan kawasan 10,846.82 hektar telah mendapat manfaat melalui TBTP melibatkan bantuan berjumlah RM13,637,896.65.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : Y.B. DATO' HAJI MAHFUZ BIN HAJI
OMAR [POKOK SENA]**

TARIKH : 24 MAC 2022 (KHAMIS)

SOALAN

DATO' HAJI MAHFUZ BIN HAJI OMAR [POKOK SENA] minta
MENTERI KEWANGAN menyatakan:

(a) apakah aspek penilaian risiko yang dijalankan dan kriteria yang ditetapkan oleh bank-bank yang Kerajaan memiliki kepentingan di dalamnya seperti Maybank, CIMB, RHB, Affin Bank dan lain-lain sebelum memberikan kemudahan pinjaman tanpa cagaran/sekuriti sebagaimana pinjaman yang diberikan kepada Genting Hong Kong Limited sebelum ini; dan

(b) apakah langkah-langkah yang dijalankan Kerajaan dalam memantau urusan pemberian pinjaman tanpa cagaran oleh bank-bank milik Kerajaan bagi mengelakkan berulangnya kerugian besar kepada bank-bank ini seperti yang terjadi di dalam kes pinjaman BMF kepada Carrian Group pada tahun 80an.

JAWAPAN

Tan Sri Yang di-Pertua,

Pemberian pinjaman oleh institusi kewangan kepada mana-mana pihak merupakan keputusan berdasarkan pertimbangan komersial melalui penilaian kredit dan kesanggupan mengambil risiko yang

diketahui oleh institusi tersebut, tanpa perlu mendapatkan sebarang kelulusan dari Bank Negara Malaysia (BNM), Kementerian Kewangan atau pemegang saham.

Penilaian kredit oleh institusi perbankan adalah berdasarkan pertimbangan mengenai kemampuan peminjam membayar balik pinjaman. Setelah permohonan pinjaman diterima, bank akan membuat penilaian kredit terhadap peminjam dengan mengambil kira kemampuan peminjam membayar balik pinjaman yang merangkumi perkara-perkara berikut:

- Kedudukan kewangan yang mantap
- Profil risiko peminjam
- Prospek ekonomi dan prospek khusus industri
- Daya maju projek dan perniagaan
- Analisis aliran tunai bagi memastikan kemampuan peminjam memenuhi obligasi hutang jangka pendek dan jangka panjang mereka

Jika bank-bank berpuas hati, mereka boleh memberikan kemudahan tanpa cagaran. Bank-bank boleh meluluskan pinjaman tanpa cagaran berdasarkan kesanggupan bank tersebut mengambil risiko pada peringkat dalaman, penilaian kredit yang memuaskan semasa permohonan dibuat dan kelulusan dibuat mengikut proses tadbir urus dalaman.

Pengurusan risiko kredit dan amalan peruntukan (*provisioning practices*) oleh institusi perbankan adalah berpandukan kepada dokumen dasar BNM mengenai risiko kredit (*policy document on Credit Risk*), dokumen dasar mengenai had dedahan pihak tunggal lain yang berkenaan (*policy document on Counterparty Exposure Limit*) dan dokumen dasar mengenai ujian tekanan (*policy document on Stress Test*). Dari semasa ke semasa, BNM akan mengkaji semula peraturan sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : Y.B. DATUK ROBERT LAWSON CHUAT
[BETONG]**

TARIKH : 24 MAC 2022 (KHAMIS)

SOALAN

DATUK ROBERT LAWSON CHUAT [BETONG] minta **MENTERI KEWANGAN** menyatakan dengan kelulusan Rang Undang-undang Perlembagaan (Pindaan) 2021 berkaitan Perjanjian Malaysia 1963 (MA63), apakah Kerajaan mempunyai perancangan untuk melantik wakil dari Sarawak dalam Lembaga Hasil Dalam Negeri (LHDN). Kalau tidak, kenapa.

JAWAPAN

Tan Sri Yang di-Pertua,

Untuk makluman Ahli Yang Berhormat, tiada peruntukan di dalam Akta Lembaga Hasil Dalam Negeri Malaysia (LHDNM) 1995 [Akta 533] yang menghalang wakil daripada Kerajaan Negeri Sabah dan Kerajaan Negeri Sarawak menjadi Anggota Lembaga. Ini bermakna, cadangan pelantikan wakil daripada Kerajaan Negeri Sabah dan Kerajaan Negeri Sarawak juga boleh dipertimbangkan. Namun demikian, keanggotaan Lembaga pada masa kini telah dipenuhi berdasarkan peruntukan sub seksyen 6(1) Akta 533, khususnya sub seksyen 6(1)(d) dan 6(1)(e).

Pelantikan Anggota Lembaga LHDNM di bawah sub seksyen 6(1)(d) adalah tidak lebih daripada dua (2) orang dan ia boleh juga dipertimbangkan Kerajaan sekiranya wujud keperluan untuk pelantikan wakil dari Kerajaan Negeri Sabah dan Kerajaan Negeri Sarawak. Ketika ini, keanggotaan di bawah sub seksyen 6(1)(d) telah pun diisi oleh wakil daripada Kementerian Kewangan (MOF) dan Jabatan Akauntan Negara (JAN).

Perkara yang sama juga terpakai sekiranya pelantikan wakil Kerajaan Negeri Sabah dan Kerajaan Negeri Sarawak ingin dilaksanakan di bawah sub seksyen 6(1)(e). Pada masa ini, pelantikan di bawah sub seksyen 6(1)(e) telah pun diisi oleh YBhg. Dato' Sri Paddy bin Abd Halim, YBhg. Dato' Sri (Dr.) Zukri bin Samat dan YBhg. Tan Sri Datuk Wira Dr. Hj. Mohd Shukor bin Mahfar, berdasarkan pengalaman luas ketiga-tiga mereka dalam bidang percukaian negara. Pelantikan ini turut sejajar dengan sub seksyen 6(2) Akta 533 iaitu "*Anggota yang dilantik di bawah perenggan 6(1)(e) hendaklah di kalangan orang yang berkedudukan atau berpengalaman dalam perkara kewangan, komersial, percukaian atau undang-undang*".

Kenggotaan Lembaga ditadbir oleh Akta 533 di mana ia menyatakan bahawa fungsi dan kuasa Anggota Lembaga LHDNM adalah terhad kepada pengurusan sumber manusia, kewangan serta risiko dan tidak melibatkan pengurusan percukaian. Pengurusan

percukaian adalah merupakan kuasa Ketua Pengarah Hasil Dalam Negeri (KPHDN) di bawah sub seksyen 134(1) Akta Cukai Pendapatan (ACP) 1967.

Selain itu, Anggota Lembaga LHDNM juga mempunyai tanggungjawab fidusiari untuk memastikan prinsip semak dan imbang kekal terjamin dan terlaksana demi kepentingan enititi yang bertanggungjawab terhadap pengurusan dan pentadbiran cukai langsung negara. MOF berpandangan bilangan keanggotaan Ahli Lembaga LHDNM pada masa ini adalah mencukupi dan memadai berdasarkan mandat asal penubuhan LHDNM seperti yang termaktub di dalam Akta 533 antaranya iaitu memberi khidmat nasihat berkaitan dengan dasar-dasar dan hal ehwal percukaian.

Walau bagaimanapun, MOF bersedia menimbang cadangan pindaan Rang Undang-Undang LHDNM bagi menambah keanggotaan sedia ada termasuk meneliti keperluan meletakkan wakil dari Kerajaan Negeri Sabah dan Kerajaan Negeri Sarawak dalam Lembaga LHDNM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : Y.B. DATO' WIRA HAJI AMIRUDDIN BIN
HAJI HAMZAH [KUBANG PASU]**

TARIKH : 24 MAC 2022 (KHAMIS)

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI KEWANGAN** menyatakan anggota Lembaga Pemegang Amanah Yayasan MySDG, halatuju strategik dana dan contoh projek-projek yang akan dilaksanakan yang terangkum didalamnya mereka yang terjejas akibat pandemik dan krisis alam sekitar.

JAWAPAN

Tan Sri Yang di-Pertua,

Kerajaan telah melancarkan penubuhan Yayasan Matlamat Pembangunan Mampan Malaysia (MySDG) pada 27 Januari 2022 untuk menguruskan Tabung Amanah MySDG.

Bagi memastikan pengurusan Yayasan yang holistik dan teratur dan berasaskan keperluan kelestarian, Kerajaan telah mencadangkan supaya Lembaga Pemegang Amanah Yayasan MySDG dianggotai oleh pakar-pakar kelestarian (*sustainability champion*) yang memahami keperluan dan ekosistem kewangan negara serta mempunyai kepakaran dan pengalaman bersesuaian untuk memberikan pandangan menyeluruh mengenai isu dan pelaksanaan program dan projek ke arah pencapaian SDG negara. Sehubungan itu, anggota Lembaga Pemegang Amanah

Yayasan MySDG dipengerusikan oleh YBhg. Tan Sri Abdul Wahid Omar, Presiden *Malaysia Sustainable Finance Group* dan Pengerusi Bursa Malaysia dan dianggotai oleh:

- YBhg. Tan Sri Mazlan binti Othman
Senior Fellow Akademi Sains Malaysia;
- YBhg. Tan Sri Jamaluddin Ibrahim
Pengerusi Prasarana Malaysia Group Berhad;
- YBhg. Tan Sri Dr. Ngau Boon Keat
Pengasas dan *Trustee MyKasih Foundation*;
- YBhg. Tun Panglima Richard Malanjum
Mantan Ketua Hakim Negara;
- YBhg. Prof Emeritus Tan Sri Dzulkifli bin Abdul Razak
Rektor Universiti Islam Antarabangsa Malaysia (UIAM);
- YBhg. Datuk Yogeesvaran
Bekas Ketua Setiausaha Perusahaan Perladangan dan Komoditi;
- YBhg. Tan Sri Sharifah Hapsah binti Syed Hassan Shahabudin
Pengerusi *National Council of Women's Organisation (NCWO Malaysia)*;
- Ketua Setiausaha Perbendaharaan (*ex-officio*);
- Ketua Pengarah Unit Perancang Ekonomi (*ex-officio*); dan
- UN Residence Coordinator (*ex-officio*).

Pada masa ini, Lembaga Pemegang Amanah sedang mengatur mesyuarat pertama Lembaga bagi menentukan halatuju strategik, keutamaan dan penentuan kriteria pemilihan cadangan program dan projek yang akan dibiayai oleh Tabung Amanah MySDG. Melalui usaha kolaborasi bersama Pejabat Pertubuhan Bangsa-bangsa Bersatu di Malaysia, Yayasan MySDG akan memanfaatkan pengalaman dan kepakaran sistem pembangunan badan dunia tersebut dalam menguruskan mekanisme pembiayaan terkumpul yang inovatif dengan secara cekap, berkesan, telus dan bertanggungjawab, dalam usaha memacu pencapaian Matlamat Pembangunan Mampan (SDG) di Malaysia.

Bagi tahun pertama, Yayasan akan memfokuskan pelaksanaan program dan projek berasaskan 3 Tema dan Sektor seperti berikut:

- Program atau projek yang bertujuan untuk memastikan keterangkuman golongan yang mudah terjejas dan kumpulan yang kerap tercicir, termasuk mereka yang terjejas akibat pandemik dan krisis alam sekitar;
- Program atau projek bagi menangani krisis iklim, kepupusan biodiversiti dan peningkatan pencemaran serta kesannya terhadap kehidupan dan mata pencarian; dan
- Program atau projek yang mengguna pakai pendekatan senegara (*whole-of-nation*) dalam mencapai SDG.

Hala tuju bagi Yayasan MySDG adalah untuk membantu negara dalam mencapai SDG dengan melaksanakan tindakan strategik dan substantif bagi menyokong keutamaan negara, terutamanya dengan menyasarkan kumpulan dan sektor yang jauh ketinggalan. Ia juga menyasarkan pengurangan jurang pembiayaan program dan projek SDG serta memudahkan pelaksanaan inisiatif bersama oleh pelbagai pihak berkepentingan dalam menterjemah aspirasi SDG kepada tindakan praktikal. Secara keseluruhannya, Yayasan akan memfokus kepada pencapaian 3 outcome menyeluruh seperti berikut:

- Mendapatkan sumber pembiayaan bagi penyampaian SDG – melalui Tabung Amanah MySDG dan memangkin peluang pembiayaan SDG yang lain;
- Memperkukuhkan kerjasama dengan pelbagai pemegang taruh bagi menggalakkan sinergi, usaha sama dan impak merentas kesemua 17 SDG; dan
- Menangani keutamaan SDG di Malaysia dengan fokus untuk memastikan bahawa tiada sesiapa yang akan ketinggalan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB PUAN HAJAH NATRAH BINTI ISMAIL
[SEKIJANG]**

TARIKH : 24 MAC 2022 (KHAMIS)

SOALAN

Puan Hajah Natrah binti Ismail [Sekijang] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik ibu tunggal di bawah pendapatan garis kemiskinan di negara ini dan apakah perancangan pihak Kementerian dalam membantu golongan ini dalam usaha untuk meningkatkan pendapatan keluarga.

JAWAPAN

Tuan Yang di-Pertua,

Kerajaan telah membangunkan Sistem eKasih sebagai pangkalan data kemiskinan nasional pada tahun 2008 bertujuan untuk mendaftarkan golongan miskin di Malaysia berdasarkan Pendapatan Garis Kemiskinan (PGK). Sehingga 15 Februari 2022, statistik Ketua Isi Rumah (KIR) bagi ibu tunggal yang berdaftar dengan eKasih adalah sebanyak **90,026 KIR** yang terdiri daripada 41,348 KIR berstatus Miskin Tegar dan 48,678 KIR berstatus Miskin.

Bagi menyokong usaha Keluarga Malaysia untuk membantu golongan sasar menikmati kehidupan yang lebih baik, Kementerian Pembangunan Wanita, Keluarga dan Masyarakat melalui Jabatan Pembangunan Wanita (JPW) melaksanakan Inisiatif Wanita Bangkit@KPWKM yang bertujuan untuk memberi fokus kepada aktiviti penjanaan pendapatan dengan menghubungkan wanita kepada platform yang menawarkan peluang pekerjaan, perniagaan atau keusahawanan.

Inisiatif Wanita Bangkit@KPWKM lahir daripada situasi pandemik COVID-19 yang telah memberi kesan kepada kehidupan masyarakat termasuk golongan wanita dalam pelbagai aspek terutamanya penjanaan pendapatan. Ramai yang terputus pendapatan sama ada dalam sektor formal mahupun informal dan terpaksa mencari pelbagai alternatif bagi meneruskan kehidupan. Inisiatif ini telah memberi manfaat kepada wanita terutamanya daripada golongan suri rumah, B40, M40, wanita yang menjadi Ketua Isi Rumah termasuk ibu tunggal mahupun wanita yang ingin membantu keluarga mencari pendapatan yang lebih.

Pada tahun 2021, **sejumlah 5,135 wanita** berjaya dihubungkan kepada peluang-peluang untuk menjana pendapatan melalui perniagaan kecil-kecilan dan peluang pekerjaan di dalam sektor formal. Pelaksanaan inisiatif Wanita Bangkit dapat membantu wanita mencari jalan keluar daripada kesempitan hidup dan bangkit untuk maju dalam membantu keluarga meningkatkan taraf ekonomi.

Inisiatif ini disifatkan sangat tepat dilaksanakan pada masanya. Sebagai kesinambungan kepada usaha murni ini, pihak Kementerian merancang untuk menghubungkan peserta keusahawanan kepada pihak-pihak yang menyediakan dana untuk kemudahan jangka masa panjang. Usaha ini kelak diharap dapat membantu golongan wanita terus menjana pendapatan bagi memperkukuhkan sistem sokongan terutamanya dalam bidang ekonomi. bidang ekonomi.

Selain itu, KPWKM melalui JPW turut melaksanakan program pembangunan kapasiti yang menyasarkan semua golongan wanita tanpa mengira latar belakang. Program ini meliputi pengukuhan kemahiran dan pengurusan kewangan, pengurusan keseimbangan (life balance) dan juga pembangunan kepimpinan wanita. Sepanjang tahun 2021, sebanyak 1,906 program telah dilaksanakan yang melibatkan 856,323 peserta di seluruh negara. Program-program ini dilaksanakan secara dalam talian dan juga fizikal selaras dengan norma baharu. Program-program ini juga akan diteruskan pada tahun ini juga.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB TUAN STEVEN CHOONG SHIAU
YOON [TEBRAU]**

TARIKH : 24 MAC 2022 (KHAMIS)

SOALAN

Tuan Steven Choong Shiau Yoon [Tebrau] minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan dan jenis penerima bantuan kebajikan pada tahun 2019, 2020 dan 2021 di kawasan Parlimen Tebrau dan adakah Kementerian mempunyai langkah-langkah yang efektif bagi mengurangkan penerima-penerima bantuan kebajikan secara berperingkat.

JAWAPAN

Tuan Yang di-Pertua,

Berdasarkan statistik Jabatan Kebajikan Masyarakat (JKM), jumlah **penerima bantuan bulanan bagi kawasan Parlimen Tebrau bagi tahun 2019 adalah 2,175 klien (RM6.4 juta), tahun 2020 sejumlah 2,184 klien (RM7.4 juta) dan pada tahun 2021 sejumlah 2,358 klien (RM10.5 juta).** Secara keseluruhannya bagi **tempoh 3 tahun tersebut sejumlah RM24.4 juta** telah disalurkan ke Parlimen Tebrau.

Kementerian melalui Jabatan Kebajikan Masyarakat telah melaksanakan beberapa program pembangunan klien penerima bantuan terutamanya klien yang produktif sebagai usaha untuk mengurangkan penerima-penerima bantuan kebajikan secara berperingkat. Program-program yang dilaksanakan adalah seperti berikut:

- i) ***Program 2Years Exit Programme*** - di bawah RMK-11, *Program 2Years Exit Programme* dilaksanakan bertujuan membantu penerima bantuan ke arah hidup berdikari dan *survival*, menjana pendapatan sendiri, tidak bergantung kepada bantuan selamanya dengan memperkasa klien bagi meneruskan kehidupannya sendiri serta menggiatkan program-program ke arah pembangunan modal insan. Berdasarkan statistik pada tahun **2019 sehingga 2021, seramai 3,608 orang penerima terlibat dalam program 2Years Exit Programme ini.** Daripada jumlah tersebut, **seramai 691 (19.2%) berjaya ditamatkan bantuan.**
- ii) **Penubuhan Koperasi ProWell Berhad** – Koperasi ini ditubuhkan pada April 2020 khusus untuk kumpulan sasar JKM dan bertindak sebagai *catalyst* dalam **menyelesaikan isu dalam kalangan penerima sekaligus menjadi satu sistem sokongan ke arah *exit policy* kepada mereka.** Sebagai anggota Koperasi, mereka layak untuk menerima manfaat dari Koperasi atau agensi lain khususnya Suruhanjaya Koperasi Malaysia. Sehingga

Disember 2021, seramai **dua ratus satu (201)** orang kumpulan **sasar Jabatan** telah berdaftar menjadi anggota koperasi.

- iii) **Program MyKasih Kapital** - bantuan berbentuk **keusahawanan sosial dan kebajikan produktif yang diberikan kepada rakyat Malaysia khususnya kepada golongan wanita pencari nafkah utama keluarga yang sedang bergelut dengan masalah kewangan**. Pemberian insentif ini melalui bantuan asas modal perniagaan ini diberikan secara *one-off* sebagai usaha permulaan untuk menggalakkan wanita berniaga menggunakan platform e-dagang atau *dropship* dan lain-lain perniagaan yang memerlukan modal niaga yang kecil. **Pada tahun 2021, sejumlah 4,000 orang wanita** yang berkecayaan telah menerima insentif ini.
- iv) Inisiatif Wanita Bangkit@KPWKM yang bertujuan untuk memberi fokus kepada **aktiviti penajaan pendapatan dengan menghubungkan wanita kepada platform yang menawarkan peluang pekerjaan, perniagaan atau keusahawanan**. **Pada tahun 2021, sejumlah 5,135 wanita** berjaya dihubungkan kepada peluang-peluang untuk menjana pendapatan melalui perniagaan kecil-kecilan dan peluang pekerjaan di dalam sektor formal.
- v) **Program Penjagaan Ibu Selepas Bersalin (MamaCare)** - bertujuan untuk **meningkatkan kesejahteraan dan kesihatan wanita dan keluarga serta memperkasakan ekonomi wanita** melalui program pembangunan kapasiti MamaCare. **Dari tahun 2013 sehingga 2020**, program ini telah berjaya mewujudkan profesion pekerjaan kepada **seramai 1,431 wanita** sebagai Pengamal MamaCare di seluruh negeri dengan **jumlah pendapatan yang diperolehi sebanyak RM51 juta**. Sebanyak **390,963 orang klien** telah menerima manfaat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' MOHD. AZIS BIN JAMMAN
[SEPANGGAR]

TARIKH : 24 MAC 2022 (KHAMIS)

SOALAN

DATO' MOHD. AZIS BIN JAMMAN [SEPANGGAR] minta **MENTERI PERTANIAN DAN INDUSTRI MAKANAN** menyatakan secara terperinci cadangan pembangunan ladang mega ternakan lembu dengan mengguna pakai konsep Pusat Fidlot Nasional (NFC) dan adakah Kementerian akan mempertimbangkan Sabah sebagai lokasi ladang mega tersebut memandangkan kelebihan yang dimiliki serta kedudukan yang strategik

JAWAPAN

Tuan Yang di-Pertua,

Untuk makluman Ahli Yang Berhormat, Kementerian amat komited dan sentiasa berusaha untuk meningkatkan pengeluaran daging dalam negara. Ini selari dengan Dasar Agromakanan Negara 2021 – 2030 (DAN 2.0) untuk mencapai sasaran tahap sara diri (*self-sufficiency level* – SSL) bagi daging lembu/kerbau sebanyak 50% pada tahun 2030.

Bagi menjamin bekalan daging tersebut, Kementerian telah melaksanakan langkah-langkah seperti berikut -

- (i) mewujudkan Program Peningkatan Ruminan di bawah Rancangan Malaysia Kedua Belas (RMK-12) - Projek ini

bertujuan meningkatkan populasi lembu di kawasan ladang sawit secara penternakan integrasi menerusi Program Peningkatan Ruminan di bawah Rancangan Malaysia Kedua Belas (RMK-12). Insentif berbentuk geran padanan ini ditawarkan kepada penternak lembu integrasi berskala komersil menerusi konsep kerjasama pintar 50% kerajaan: 50% penternak dengan jumlah peruntukan sebanyak RM40 juta untuk tempoh lima (5) tahun. Program ini dijangka dapat meningkatkan sebanyak 10,400 ekor ternakan di 13 kawasan integrasi meliputi 13 buah syarikat peneraju dan 65 orang penternak yang bernaung di bawah syarikat-syarikat peneraju tersebut;

- (ii) membangunkan kemudahan infrastruktur di Taman Kekal Pengeluaran Makanan (TKPM) dan Taman Kekal Pengeluaran Ruminan (TKPR) - Melalui program ini, MAFI membangunkan sebanyak 72 unit kandang lembu fidlot di Taman Kekal Pengeluaran Makanan (TKPM) dan 15 unit kandang lembu tenusu di Taman Kekal Pengeluaran Ruminan (TKPR) di tujuh (7) buah negeri iaitu di Kedah, Terengganu, Kelantan, Pahang, Perak, Negeri Sembilan dan Johor. Semua kandang yang dibina sejak RMK-11 hingga RMK-12 yang bernilai RM188.6 juta ini dilengkapi dengan kemudahan infrastuktur asas dan kawasan untuk penanaman pastura. Ini adalah usaha Kementerian untuk menggalakkan penglibatan pemain-pemain industri supaya menceburi bidang penternakan ruminan dengan kos awal operasi yang minima. Dijangkakan inisiatif ini dapat menampung pengeluaran sebanyak 44,600 ekor ternakan setahun.
- (iii) pengeluaran daging melalui kaedah *"Beef in Dairy Line"* menerusi Program Peningkatan Tenusu Negara - MAFI menggalakkan penglibatan penternak tenusu dalam pengeluaran daging melalui kaedah *"Beef in Dairy Line"* di mana anak jantan akan dihasilkan secara bersistematik dan digemukkan bagi tujuan penyembelihan. Menerusi program ini, sejumlah RM42 juta diperuntukkan di bawah RMK-12 dengan

sasaran pembangunan seramai 300 orang penternak berskala kecil dan 20 buah syarikat tenusu berskala besar menjelang 2025. Sebanyak lapan (8) buah Lembah Tenuku juga sedang dibangunkan di seluruh negara yang bakal memberikan manfaat kepada penternak tenusu dan masyarakat setempat.

- (iv) Perkhidmatan nasihat teknikal veterinar - DVS melalui Pusat Pengembangan Veterinar (VetEC) dan Pejabat Perkhidmatan Veterinar Daerah memberikan perkhidmatan teknikal seperti aspek pemakanan ternakan, pembiakbakaan, pengurusan kesihatan, pengurusan ladang, dan ekonomi ladang..

Kementerian juga melihat Sabah sebagai salah satu negeri yang sesuai untuk industri penternakan lembu. Ini adalah kerana negeri Sabah mempunyai kawasan ladang kelapa sawit yang luas iaitu 1.54 juta hektar. Dengan mengambilkira keadaan topografi tanah, dianggarkan 25% atau 385,000 hektar daripada keluasan keseluruhan ladang kelapa sawit tersebut adalah sesuai untuk dijadikan kawasan penternakan lembu secara integrasi yang mampu menempatkan kira-kira 96,250 ekor induk.

Di samping itu, status bebas penyakit kuku dan mulut (FMD) telah memberi kelebihan kepada industri pedaging di negeri Sabah untuk berkembang dan meneroka ke pasaran antarabangsa. Sebagai contoh, syarikat ladang kelapa sawit seperti Sawit Kinabalu Sdn. Bhd. telah berjaya mengusahakan penternakan lembu secara integrasi dengan populasi semasa berjumlah 14,244 ekor ternakan dan berpotensi untuk diperkembangkan lagi pada masa hadapan.

Berdasarkan konsep "*Beef in Dairy Line*", Kementerian turut mengadakan kerjasama dengan Kerajaan Negeri Sabah bagi meningkatkan pengeluaran daging melalui industri tenusu menerusi pembangunan Lembah Tenuku Borneo yang dijangka dibuka pada tahun 2023 hingga 2024 dan terletak di Sabah dan Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 24 MAC 2022 (KHAMIS)

SOALAN

DATUK DR. HASAN BIN BAHROM [TAMPIN] minta **MENTERI PERTANIAN DAN INDUSTRI MAKANAN** menyatakan bagaimana inisiatif Kementerian membantu usahawan agro makanan dari bergantung import makanan ternakan dari luar negara. Apakah Kementerian mempunyai usaha yang tuntas dalam menghapuskan kebergantungan import makanan yang menjadi alasan pengusaha untuk menaikkan harga.

JAWAPAN

Tuan Yang di-Pertua,

Untuk makluman Ahli Yang Berhormat, purata keperluan ayam dalam negara adalah sebanyak 2.09 juta ekor sehari atau 62.9 juta ekor sebulan. Data pengeluaran ayam yang dikeluarkan oleh Jabatan Perkhidmatan Veterinar (DVS) pada bulan Oktober 2021 adalah sebanyak 52.05 juta ekor menurun kepada 51.4 juta ekor pada bulan November 2021. Manakala pengeluaran ayam pada bulan Disember 2021 adalah sebanyak 61.1 juta ekor berbanding 62.9 juta ekor mengikut keperluan sebenar. Ini menunjukkan terdapat kekurangan bekalan di pasaran. Antara faktor-faktor yang menyebabkan berlakunya penurunan bekalan ayam tersebut adalah seperti berikut:

- (i) pengurangan pengeluaran ayam oleh pihak industri bagi mengelakkan kerugian berikutan peningkatan kos operasi pengeluaran ayam. Kos makanan ternakan menyumbang kepada 70% daripada kos pengeluaran. Komposisi makanan ayam terdiri daripada bahan mentah utama iaitu jagung dan *soybean meal* (SBM). Pada bulan Mac 2022, harga jagung telah meningkat sebanyak 110.99% kepada RM1,920/tan, berbanding bulan RM910.00/tan pada Januari 2020. Manakala harga SBM telah meningkat sebanyak 83.45% kepada RM3,070/tan pada Mac 2022, berbanding RM1,673.50/tan pada bulan Januari 2020. Kenaikan harga import bahan mentah ini disebabkan oleh kenaikan harga pasaran dunia dan kadar tukaran matawang di luar kawalan pengimport. Faktor lain yang mempengaruhi kenaikan harga ayam adalah peningkatan kos operasi di sepanjang rantai seperti kos logistik, kos pekerja dan kadar tukaran matawang asing;
- (ii) peningkatan permintaan yang mendadak berikutan pembukaan semula sektor ekonomi terutamanya perhotelan, restoran dan katering pasca Perintah Kawalan Pergerakan (PKP) mulai Oktober 2021;

- (iii) bencana banjir pada penghujung tahun 2021 yang menjejaskan industri ternakan ayam; dan
- (iv) pengurangan kemasukan anak ayam oleh pihak industri semasa musim hujan bagi mengurangkan risiko penyakit berjangkit seperti sampar ayam (*Newcastle Disease*).

Bagi memenuhi permintaan tempatan serta meringankan beban penternak, Kerajaan melaksanakan langkah jangka pendek dan jangka panjang seperti berikut:

(a) Jangka pendek

- (i) memberi kebenaran mengimport (*approved permit – AP*) kepada 36 buah syarikat untuk mengimport ayam sebanyak 36,030 tan metrik bagi tempoh Disember 2021 hingga Mei 2022 tertakluk kepada syarat-syarat yang ditetapkan;
- (ii) memberi subsidi sebanyak RM0.60/kg pada harga borong ayam hidup di ladang dan RM0.05/biji bagi telur gred A, B dan C bermula dari 5 Februari hingga 5 Jun 2022. Usaha ini dijangka memberi manfaat kepada 2,061 penternak ayam pedaging dan 194 penternak ayam penelur. Rakyat pula dapat menikmati harga ayam bulat lebih rendah iaitu RM8.90/kg dan harga telur antara RM0.39 hingga RM0.43 sebiji mengikut gred. Jumlah keseluruhan subsidi yang ditanggung oleh Kerajaan ialah sebanyak RM528.52 juta. Permohonan subsidi telah dibuka mulai 28 Februari sehingga 6 Jun 2022 melalui DVS Negeri. Untuk mendapatkan bantuan subsidi tersebut, penternak perlu mengemukakan permohonan melalui borang yang boleh didapati di laman sesawang Jabatan Perkhidmatan Veterinar www.dvs.gov.my. Semua permohonan yang dikemukakan penternak akan dinilai di peringkat lapangan di negeri dan dipertimbangkan oleh Jawatankuasa di

peringkat Putrajaya untuk kelulusan tuntutan. Bagi permohonan yang berjaya, tuntutan subsidi akan dikreditkan ke dalam akaun penternak melalui Agrobank dalam tempoh satu (1) hingga tiga (3) hari;

- (iii) memberi insentif makanan ternakan ruminan kepada penternak kecil ruminan melalui skim harga bersubsidi dedak isirung kelapa sawit (PKC) yang berjumlah RM10 juta. Dianggarkan seramai 30,000 orang penternak akan menerima bantuan dalam bentuk tunai sebanyak RM300/penternak.

(b) Jangka panjang

- (i) mengurangkan kebergantungan kepada sumber jagung import sebanyak 30% menerusi inisiatif penanaman jagung bijian dalam negara yang berkeluasan sehingga 80,000 hektar dengan sasaran pengeluaran jagung bijian tempatan sebanyak 1.44 juta tan metrik menjelang tahun 2033;
- (ii) menjalankan kajian bagi menghasilkan bahan mentah gantian dari sumber tempatan berasaskan isirung sawit seperti PKC/PKE; dan
- (iii) menawarkan pinjaman mudah sebanyak RM200 juta kepada penternak melalui Agrobank bagi membantu penternak mengatasi masalah modal pusingan kewangan yang terjejas akibat kenaikan kos pengeluaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : Y.B. TUAN SYED SADDIQ BIN SYED
ABDUL RAHMAN [MUAR]**

TARIKH : 24 MAC 2022 (KHAMIS)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KEWANGAN** menyatakan jumlah kerugian terbaru sehingga kini disebabkan banjir yang berlaku pada bulan Disember 2021, secara langsung dan tidak langsung. Apakah langkah Kerajaan untuk membantu rakyat terjejas menguruskan ganti rugi yang dialami, dan tindakan Kerajaan khususnya dalam menangani kerugian tempat kediaman, kenderaan dan premis perniagaan.

JAWAPAN

Tan Sri Yang Di Pertua,

Bantuan Banjir Keluarga Malaysia yang diumumkan oleh Yang Amat Berhormat Perdana Menteri pada 29 Disember 2021 merupakan sebuah pakej bantuan yang komprehensif, berkesan dan menyeluruh serta dengan izin *unprecedented*. Kerajaan ini amat komited dalam melaksanakan pelbagai bantuan dan kemudahan kepada mangsa-mangsa banjir dengan **nilai keseluruhan kini melebihi RM2 bilion** mengambil kira pelaksanaan pelbagai bantuan di samping keperluan pembaikan rumah dan fasiliti awam.

Kerajaan telah menyediakan bantuan langsung sehingga RM61,000 bagi setiap Ketua Isi Rumah (KIR) merangkumi bantuan-bantuan seperti berikut:

- **Bantuan Wang Ihsan (BWI)**

Bantuan Wang Ihsan (BWI) merupakan sumbangan tunai yang Kerajaan akan salurkan kepada mangsa-mangsa banjir setiap kali berlakunya bencana banjir. Kadar BWI telah ditingkatkan daripada RM500 kepada RM1,000 bagi setiap Ketua Isi Rumah atau KIR yang terjejas akibat banjir termasuk kepada mereka yang tidak berpindah ke Pusat Pemindahan Sementara atau PPS. Kadar BWI untuk kematian buat waris mangsa juga dinaikkan daripada RM5,000 kepada RM10,000 dan mangsa-mangsa yang terjejas akibat banjir boleh menuntut BWI setiap **kali bencana menimpa** berbanding sebelum ini hanya sekali sahaja semasa berlakunya Monsun Timur Laut. Sehingga 28 Februari 2022, seramai 152,780 KIR telah menerima bantuan BWI dengan jumlah peruntukan sebanyak RM153 juta.

- **Diskaun pembelian peralatan elektrik**

Kerajaan ini juga telah menyediakan baucar diskaun pembelian peralatan elektrik kepada mangsa-mangsa banjir bagi pembelian barangan elektrik yang telah rosak. Melalui inisiatif ini, setiap KIR yang layak akan mendapat baucar diskaun pembelian peralatan

elektrik bernilai RM500 semasa membuat pembelian sama ada secara fizikal di kedai berdaftar atau di platform e-dagang yang diiktiraf oleh Kementerian Tenaga dan Sumber Asli, KETSA. Kelayakan ditentukan melalui alamat kawasan terjejas banjir serta data penerima BWI. Sehingga 28 Februari 2022, sebanyak 62,651 penebusan telah dibuat oleh mangsa banjir dari 9 buah negeri iaitu Selangor, Pahang, Negeri Sembilan, Kelantan, Wilayah Persekutuan Kuala Lumpur, Melaka, Johor, Terengganu dan Perak. Nilai keseluruhan rebat yang telah ditebus adalah sebanyak RM31.2 juta.

- **Bantuan tunai pembaikan kecil rumah**

Kerajaan juga memperkenalkan bantuan tunai Pembaikan Kecil Rumah sehingga RM5,000. Sehingga 28 Februari 2022, sebanyak 5,758 KIR telah dikenalpasti layak menerima bantuan sebanyak RM5,000 manakala, bagi mana-mana KIR yang dikenal pasti mengalami kerosakan rumah dengan nilai melebihi RM5,000 pula, Kerajaan akan melantik kontraktor dengan kadar sehingga RM15,000 ribu untuk baik pulih rumah dan sehingga RM56,000 untuk bina baharu rumah kediaman. Sehingga 28 Februari 2022, sebanyak 84 buah rumah sedang dalam pelaksanaan bina baharu dan 2,241 sedang dalam pembaikan manakala 131 buah rumah telah selesai pembaikan.

- **Bantuan Barangan Keperluan Asas**

Kerajaan juga menyediakan bantuan Barangan Keperluan Asas sebanyak 2,500 ringgit kepada KIR yang dikenal pasti. Semua Ketua Isi Rumah yang menerima Bantuan wang Ihsan adalah layak mendapat bantuan ini kecuali rumah bertingkat atau kediaman strata bertingkat yang langsung tidak terjejas. Penentuan dan pemeriksaan kelayakan akan dibuat oleh Pihak Berkuasa Tempatan dan Pejabat daerah masing-masing bagi melayakkan penyaluran bantuan sebanyak RM2,500 ini dibuat sama ada secara tunai atau ke secara electronic funds transfer ke akaun Ketua Isi Rumah yang layak. Sehingga 28 Februari 2022, seramai 26,455 KIR telah menerima bantuan dengan jumlah Implikasi Kewangan sebanyak RM66 juta.

- **Bantuan Automotif Keluarga Malaysia**

Kerajaan juga telah bekerjasama dengan syarikat PROTON dan PERODUA untuk memberikan perkhidmatan tunda secara percuma dan diskaun ke atas alat ganti sebanyak 50% di pusat-pusat servis mereka yang berdaftar. Bagi syarikat kereta lain pula, semua telah bersetuju menyediakan perkhidmatan tunda secara percuma dan diskaun sekurang-kurangnya 25% ke atas alat tukar ganti. Sebagai Kerajaan turut menyediakan Bantuan Automotif Keluarga Malaysia sebanyak RM1,000 untuk kegunaan mangsa banjir sama ada bagi tujuan pembaikan kereta atau pembelian baharu akibat kenderaan yang telah rosak total. Kenderaan akan diperiksa dan pengesahan kerosakan akibat banjir akan dibuat oleh pusat servis berdaftar tersebut dan mangsa banjir terus layak menerima diskaun serta merta.

Selain itu, tuntutan bayaran balik juga boleh dibuat oleh mangsa banjir yang menghantar kenderaan mereka ke pusat servis tidak berdaftar melalui dalam talian di www.bantuanautomotif.hasil.gov.my atau di mana-mana pusat kawalan operasi bencana secara manual. Bayaran balik akan dikreditkan ke akaun penerima selepas proses semak silang dibuat dengan data KIR yang telah menerima BWI. Sehingga 28 Februari 2022, lebih 7,000 kenderaan telah menikmati diskaun pembaikan ini.

Bagi menambah akses tunai kepada mangsa banjir yang memerlukan, Bank Simpanan Nasional buat pertama kalinya telah menawarkan pembiayaan pada kadar 0 peratus termasuk moratorium bayaran balik selama enam bulan untuk jumlah pinjaman sehingga 10 ribu ringgit. Pada asalnya, inisiatif ini diumumkan dengan penyediaan dana sebanyak 100 juta ringgit. Untuk makluman, setakat 28 Februari 2022, BSN telah meluluskan permohonan dengan nilai pinjaman lebih dari RM200 juta.

Selain itu, bantuan berbentuk geran RM3,000 turut disediakan di bawah TEKUN untuk diberikan kepada peniaga informal dan mikro yang mana premis perniagaan mereka terjejas akibat banjir pada Disember 2021 dan Januari 2022 bagi memulihkan perniagaan dan beroperasi semula. Sehingga 28 Februari 2022, 9,341 permohonan telah diluluskan dengan nilai keseluruhan mencecah RM28 juta.

Kerajaan juga memperuntukkan sejumlah RM200 juta bagi menggerakkan kerja-kerja pengurusan pascabanjir. Peruntukan ini antaranya digunakan bagi melaksanakan urusan pembaikan dan pembersihan rumah dan fasiliti awam yang rosak. Bagi mempercepat dan memudahkan proses perolehan, MOF telah melonggarkan kaedah perolehan supaya pengurusan pascabanjir dapat dilaksanakan dengan segera dan berkesan. Antaranya, MOF telah melonggarkan syarat perolehan iaitu bagi perolehan kerja sehingga RM200,000, kini dibenarkan dilaksanakan secara lantikan terus dan mana-mana yang melebihi RM200,000 dibuat secara proses sebut harga. Selain itu, bagi perkhidmatan sokongan sehingga RM50,000 dalam suatu kontrak, dibenarkan untuk dilaksanakan secara pembelian terus. Selain itu, pengecualian AP182 juga diberikan bagi memberi ruang kepada agensi pelaksana mempercepat pelaksanaan projek tanpa perlu merujuk atau menunggu keputusan penilaian daripada agensi teknikal.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MUHAMMAD BAKHTIAR BIN
WAN CHIK [BALIK PULAU]**

TARIKH : 24 MAC 2022 (KHAMIS)

SOALAN

TUAN MUHAMMAD BAKHTIAR BIN WAN CHIK [BALIK PULAU]
minta **MENTERI PELANCONGAN, SENI DAN BUDAYA** menyatakan :-

- (a) berapa ramai pengusaha wanita di dalam sektor kraf yang terpaksa menutup perniagaan berikutan COVID-19 ; dan
- (b) apakah perancangan Kementerian berkenaan pekerja wanita yang terlibat dalam industri pelancongan berkurangan dua peratus kepada 48.3% pada 2020 berbanding 50.3% pada 2019.

JAWAPAN

Tuan Yang di-Pertua,

1. Sehingga 31 Januari 2022, keseluruhan bilangan usahawan kraf di Malaysia adalah seramai 6,365 orang. Daripada jumlah tersebut, 4,041 orang merupakan usahawan wanita. Penularan wabak COVID-19 sejak tahun 2020 telah memberi kesan kepada 66 orang usahawan wanita berdaftar yang telah bertukar bidang perniagaan.
2. Umum mengetahui industri pelancongan, seni dan budaya terjejas teruk akibat pandemik COVID-19. Sektor pelancongan, seni dan budaya tersedia menawarkan peluang perniagaan dan pekerjaan kepada golongan wanita. Selain pembuatan kraf tangan, golongan wanita juga kini ada giat secara langsung terlibat dalam industri pelancongan. Antaranya adalah sebagai pemandu pelancong wanita, yang kini telah melahirkan Persatuan Pemandu Pelancong Wanita (MWTGA) yang bertanggungjawab menjaga kebajikan dan memastikan pemandu pelancong wanita supaya sentiasa mendapat pengetahuan dan pengalaman berterusan di dalam industri pelancongan serta dapat terus kekal bersaing dalam industri ini. Melalui Persatuan Pemandu Pelancong Wanita (MWTGA), terdapat seramai hampir 6,000 orang Pemandu Pelancong wanita yang kini berdaftar dengan Kementerian Pelancongan, Seni dan Budaya (MOTAC).
3. Selain itu, penglibatan wanita dalam bidang spa dan kesihatan juga dilihat amat penting, dengan bidang ini mendapat sambutan tinggi dalam kalangan wanita dan telah menghasilkan ramai usahawan wanita yang berkemahiran dan berjaya dalam bidang spa. Maklumat yang diperolehi daripada *Association of Malaysian Spas (AMSPA)* dan *Malaysian Association of Wellness & Spa (MAWSpa)* menunjukkan seramai 118 orang usahawan spa dan pusat urutan kaki yang terdiri daripada wanita telah berdaftar dengan dua (2) persatuan ini sehingga bulan Februari 2022.

SOALAN NO : 65

4. Dalam pada itu, MOTAC dimaklumkan bahawa Kementerian Pembangunan Wanita, Keluarga dan Masyarakat (KPWKM) melalui Jabatan Pembangunan Wanita (JPW) turut memainkan peranan dalam melaksanakan program-program yang mensasarkan wanita secara keseluruhan terutamanya daripada golongan suri rumah, B40, M40, wanita yang menjadi Ketua Isi Rumah dan ibu tunggal. Program-program yang dilaksanakan adalah berteraskan Model Pemerkasaan Wanita 4K termasuklah program-program kemahiran yang boleh digunakan oleh wanita sebagai set nilai dan keupayaan membangun jati diri supaya mampu berdikari.

5. Oleh yang demikian, program-program ini boleh diperluaskan kepada pengusaha-pengusaha wanita dalam sektor kraf di bawah MOTAC bagi membantu golongan sasar wanita untuk turut menyumbang kepada industri pelancongan di samping meneruskan kelangsungan hidup pada masa mencabar ini. MOTAC percaya melalui inisiatif-inisiatif yang dijalankan dapat meningkatkan kembali jumlah penglibatan wanita dalam sektor-sektor dan bidang-bidang yang berkaitan.

Sekian, terima kasih.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
(SIMPANG RENGAM)**

TARIKH : 24 MAC 2022 (KHAMIS)

SOALAN

DR. MASZLEE BIN MALIK (SIMPANG RENGAM) minta **MENTERI
PENGAJIAN TINGGI** menyatakan: -

- (a) apakah usaha bersama KPT dan KPM untuk mengeratkan hubungan antara IPT dengan sekolah seperti yang pernah dilakukan oleh pihak KPM pada tahun-tahun 2018-2019 melalui inisiatif bersama pelbagai; dan
- (b) apakah adanya usahasama antara kedua-dua Kementerian melalui *single entry admittance* (jalan kemasukan tunggal) untuk memastikan peluang dan permohonan kemasukan para pelajar ke IPT dapat diselaraskan agar dapat dielakkan sebarang pertindihan permohonan oleh para pelajar.

JAWAPAN

Tan Sri Yang di-Pertua,

(a)

Bagi mengeratkan hubungan antara sekolah dan Institusi Pendidikan Tinggi (IPT), terdapat beberapa inisiatif dilaksanakan bersama antara Kementerian Pengajian Tinggi (KPT) dan Kementerian Pendidikan Malaysia (KPM). Antara inisiatif-inisiatif yang dilaksanakan ke atas sekolah oleh Universiti Awam (UA) adalah seperti berikut:

- i. **Penganjuran program-program atau aktiviti-aktiviti yang diselaraskan oleh *MySTEM Ambassador* di UA sempena Bulan STEM Kebangsaan.**
- ii. **Pelaksanaan Program Sekolah Angkat** di mana UA seperti Universiti Tun Hussein Onn Malaysia (UTHM), UniSZA dan Universiti Sains Islam Malaysia (USIM) menggunakan kepakaran masing-masing untuk melaksanakan inisiatif dengan sekolah terpilih bagi menyumbang kepada pembangunan sekolah serta perpindahan ilmu;
- iii. **Pelaksanaan program/ aktiviti bersama pelajar sekolah bagi mengeratkan hubungan antara universiti dan sekolah seperti:**
 - a. **Kuiz Literasi Kelautan** oleh Universiti Malaysia Terengganu (UMT); dan
 - b. ***Program 3T(Teen Tuition Teen)*** melibatkan aktiviti pengajaran oleh mahasiswa UniSZA kepada pelajar-pelajar sekolah komuniti miskin bandar di Kuala Terengganu.

Selain itu, KPT dengan kerjasama KPM juga turut melaksanakan **program-program promosi kemasukan ke politeknik dan kolej komuniti kepada pelajar-pelajar sekolah** seperti Program Gerak Gempur SPM, dan Sembang Santai Halatuju Selepas SPM (secara dalam talian).

(b)

Pada sesi akademik 2020/2021, Kementerian telah melaksanakan konsep *Single Window Single Offer* (SWSO) bersama Institusi Pendidikan Tinggi Awam (IPTA), KPT, Institut Pendidikan Guru Malaysia (IPGM) dan Bahagian Matrikulasi di bawah KPM dan Institusi Latihan Kemahiran Awam (ILKA) melalui platform *UPUOnline* selaras dengan keputusan Mesyuarat Pengurusan Tertinggi Kementerian Pendidikan Malaysia Bil. 8/2019 pada 12 Jun 2019.

Berhubung perkara ini, KPM telah memperincikan cabaran yang dihadapi oleh IPGM dan Bahagian Matrikulasi (BMKPM) melalui dasar kemasukan tunggal SWSO pada pengambilan tahun 2020. Sehubungan itu, Mesyuarat Pasca Kabinet KPM pada 9 November 2020 telah memutuskan agar pengambilan pelajar ke IPG dilaksanakan oleh IPGM dan tidak melalui sistem *UPUonline*. Keputusan ambilan IPG dan KM secara berasingan ini telah mendapat sokongan YB Menteri Kanan Pendidikan pada 18 Januari 2021.

Selain itu, BMKPM telah melaksanakan pengurusan penawaran dan pengambilan murid ke Program Matrikulasi KPM mulai tahun 2021 untuk memberi pilihan yang lebih luas kepada murid lepasan SPM meneruskan pengajian ke peringkat pra-universiti. KPM dan KPT sentiasa berkerjasama dalam memastikan semua murid pra-universiti di Institusi Pendidikan KPM berpeluang untuk meneruskan pengajian ke IPT mengikut kelayakan dan minat mereka.

Justeru, bermula sesi akademik 2021/2022, pengambilan pelajar bagi mengikuti Program Ijazah Sarjana Muda Perguruan (PISMP) di IPG Dan Program Matrikulasi KPM adalah melalui KPM iaitu dilaksanakan secara berasingan daripada *UPUOnline* di KPT selaras dengan pengasingan dua Kementerian ini pada tahun 2020.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 24 MAC 2022 (KHAMIS)

SOALAN

TUAN SU KEONG SIONG [KAMPAR] minta **MENTERI PELANCONGAN, SENI DAN BUDAYA** menyatakan status terkini berkenaan pelan pewartaan tapak Green Ridge - Battle of Kampar sebagai tapak warisan bersejarah. Apakah halangan-halangan atau isu yang dihadapi dalam proses pewartaan ini.

JAWAPAN

Tuan Yang di-Pertua,

1. Adalah dimaklumkan bahawa perkara ini sedang dalam pertimbangan mahkamah (Saman Pemula No: AA-24NCVC-208-08/2021).
2. Sehubungan dengan itu, Peraturan 23(1)(g), Peraturan-Peraturan Majlis Mesyuarat Dewan Rakyat, adalah terpakai.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN CHANG LIH KANG
(TANJONG MALIM)**

TARIKH : 24 MAC 2022 (KHAMIS)

SOALAN

TUAN CHANG LIH KANG [TANJONG MALIM] minta **MENTERI LUAR NEGERI** menyatakan pendirian Malaysia dalam kes Amerika Syarikat membekukan aset Afghanistan sebanyak \$7 bilion dan menggunakan separuh daripadanya untuk bayar pampasan keluarga mangsa peristiwa 11 September.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Tanjong Malim atas pertanyaan yang dikemukakan.

Tuan Yang di-Pertua,

2. Sebagaimana saya telah maklumkan di dewan sebelum ini, saya telah menghadiri Mesyuarat Luar Biasa OIC di peringkat Menteri-Menteri Luar Negeri bagi membincangkan situasi di Afghanistan secara fizikal di Islamabad, Pakistan pada 19 Disember 2021.

3. Semasa mesyuarat tersebut, saya telah menggesa masyarakat antarabangsa supaya bertindak untuk mengelakkan keruntuhan ekonomi secara menyeluruh (total collapse) Afghanistan. Dalam hal ini, Malaysia telah menyeru OIC supaya bertindak untuk menangani dan menyelesaikan isu pembekuan lebih USD9 bilion rizab Afghanistan. Rizab tersebut adalah milik rakyat Afghanistan.

4. Kesemua negara OIC dan negara bukan OIC yang hadir di mesyuarat tersebut telah sebulat suara bersetuju membantu menyelesaikan krisis kemanusiaan di Afghanistan dengan kadar segera serta mengambil langkah sewajarnya untuk mencegah keruntuhan ekonomi Afghanistan.

5. Pada masa sama, Kementerian Luar Negeri akan terus mengadakan usaha libat urus bagi membantu rakyat Afghanistan yang sedang di landa krisis kemanusiaan dan ekonomi. Dalam hal ini, Kementerian Luar Negeri akan terus menjadi pemudah cara kepada syarikat swasta, korporat mahupun pertubuhan bukan kerajaan (NGO) Malaysia dalam usaha untuk menyalurkan bantuan-bantuan kemanusiaan kepada rakyat Afghanistan yang memerlukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB PUAN JUNE LEOW HSIAD HUI
[HULU SELANGOR]**

TARIKH : 24 MAC 2022 (KHAMIS)

SOALAN

PUAN JUNE LEOW HSIAD HUI [HULU SELANGOR] minta **MENTERI PENGANGKUTAN** menyatakan menyatakan apakah impak negatif yang ditanggung oleh Kementerian dan rakyat lanjutan daripada penamatan Projek KVDT Fasa 2 dan apakah kesannya terhadap kawasan Hulu Selangor.

JAWAPAN

Tuan Yang Di-Pertua,

1. Untuk makluman Yang Berhormat, dari segi kontrak Projek KVDT Fasa 2, Kerajaan masih belum menandatangani perjanjian kontrak dengan pihak syarikat. Berdasarkan perkembangan semasa, penamatan dan tender semula dibuat dengan tujuan untuk mendapatkan nilai terbaik dari segi pulangan kewangan untuk Kerajaan. Kesan daripada penamatan ini akan berlaku sedikit kelewatan ke atas *headway* dan kekerapan perkhidmatan KTMB secara keseluruhan. Walau bagaimanapun, impak adalah pada tahap yang minimum dan dalam kawalan pihak KTMB.

2. Jajaran Projek KVDT Fasa 2 melibatkan tiga sektor iaitu sektor 1 (Jajaran Salak Selatan – Seremban), sektor 2 (Jajaran Simpang Pelabuhan Klang (SPK) – Pelabuhan Klang) dan sektor 3 (Jajaran Bypass Simpang Pelabuhan Klang). Jajaran Projek KVDT Fasa 2 tidak melibatkan kawasan Hulu Selangor. Jajaran KVDT yang paling dekat dengan Hulu Selangor adalah Rawang. Projek KVDT Fasa 2 tidak memberi kesan secara langsung kepada kawasan Hulu Selangor.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK RAZMAN BIN ISLI [LABUAN]

TARIKH : 24 MAC 2022 (KHAMIS)

SOALAN

DATUK ROZMAN BIN ISLI [LABUAN] minta **MENTERI PERTANIAN DAN INDUSTRI MAKANAN** menyatakan pelaksanaan segera ekosistem rantai bekalan makanan tempatan yang lebih sistematik dalam mendepani ketidaktentuan penawaran di peringkat global.

JAWAPAN

Tuan Yang di-Pertua,

Untuk makluman Ahli Yang Berhormat, pemulihan ekonomi domestik telahpun bermula kesan dari pelbagai inisiatif Kerajaan yang dijangka akan menyumbang kepada pencapaian sasaran 5.8% KDNK negara pada tahun 2022. Dalam hal ini, Kementerian Pertanian dan Industri Makanan (MAFI) juga terus giat melaksanakan pelbagai inisiatif bagi memacu pertumbuhan sektor pertanian Negara. Langkah-langkah berterusan yang diambil oleh MAFI untuk memastikan ekosistem rantai bekalan makanan tempatan yang lebih sistematik merangkumi elemen seperti berikut:

1. memperkukuh aspek pengeluaran – dengan menambahbaik infrastruktur dan kemudahan seperti jalan dan fasiliti ladang, pengaliran dan saluran kawasan sawah padi serta kompleks dan jeti pendaratan ikan melalui pelaksanaan projek di bawah Rancangan

Malaysia Kedua Belas (RMKe-12). Dalam usaha merancakkan aktiviti pengeluaran makanan, MAFI turut menyediakan pelbagai program bantuan berbentuk subsidi, insentif, geran dan kemudahan pembiayaan mudah serta pemberian input tanaman.

2. memperkukuh akses pasaran runcit – dengan mempertingkatkan kerjasama strategik dengan usahawan sektor peruncitan melalui pembangunan outlet pemasaran untuk meningkatkan akses kepada pengeluar. MAFI mensasarkan sekurang-kurangnya sebanyak 875 outlet pemasaran runcit akan dinaiktaraf serta dibangunkan sepanjang RMKe-12. Kepelbagaian segmen pasaran ini mampu mengukuhkan permintaan domestik dan memperluas akses pasaran, selain mengurangkan kebarangkalian berlakunya manipulasi harga di dalam rantai sehingga merugikan pengeluar tempatan.
3. mempergiat akses pasaran digital – dengan memperluas akses jaringan pasaran dan menggalakkan penyertaan usahawan dalam platform e-dagang dan platform kerjasama strategik dengan pihak swasta seperti Lazada dan Shoppe. Selain itu, platform *e-commerce Agrobazaar Online (ABO)* sedang dinaiktaraf bagi memenuhi keperluan sebanyak 6,198 pekedai aktif untuk mencapai sasaran nilai jualan sekurang-kurangnya RM2 juta bagi tahun 2022. Inisiatif ini bertujuan untuk memangkin transformasi usahawan terutamanya usahawan mikro, kecil dan sederhana ke arah pendigitalan agar dapat memanfaatkan peluang mempelbagaikan perniagaan dalam ekonomi digital.
4. membangun infrastuktur pemasaran – dengan meningkatkan kecekapan rantai bekalan melalui pembinaan dan penaiktarafan pusat pengumpulan, penyimpanan, pemprosesan, pengedaran dan pemasaran serta kemudahan logistik dan pengangkutan. Dalam hal ni, Program Pemantapan Jaminan Bekalan Makanan Negara telah diluluskan secara *one-off* sebanyak RM20 juta di bawah bajet MAFI untuk tahun 2022. Antara skop yang akan dilaksanakan di bawah bajet tersebut adalah menaiktaraf keperluan baharu logistik sebanyak RM7.79 juta dan pembangunan infrastruktur pemasaran

bagi pembinaan Pusat Penyimpanan Bekalan Makanan Berteknologi Tinggi sebanyak RM3.35 juta. Usaha ini bagi memastikan peningkatan kapasiti penyimpanan sehingga 587.3 matrik tan (MT) pada satu-satu masa.

5. memperkukuh rantai pembekalan – melalui Program Pembangunan Khidmat Pemasaran MAFI (Program Ladang Kontrak 2.0), pengukuhan *forward agreement* diberikan tumpuan bagi memastikan konsistensi dan keupayaan bekalan memenuhi permintaan pasaran. Pada tahun 2022, disasarkan sebanyak 3,752 *forward agreement* akan ditandatangani dengan jangkaan bekalan 53,374 matrik tan (MT) bernilai RM111 juta. Sekurang-kurangnya dianggarkan 35,000 tan metrik (MT) hasil pengeluaran akan dipasarkan melalui kerjasama strategik dengan usahawan pemasar, pasaraya, pengeksport dan pemproses produk agromakanan.
6. Memperkenalkan inisiatif pembiayaan – melalui Agrobank dengan menawarkan program pembiayaan dan pendanaan sebagai sokongan berterusan (*infrastructure, trade and supply chain financing*) kepada usahawan yang terlibat dalam sektor pertanian dan aktiviti pengeluaran makanan dalam memastikan pengukuhan ekosistem rantai bekalan makanan tempatan. Antaranya termasuklah Program Agromakanan (PENJANA), Program Pertanian Pintai-i, Skim Pembiayaan Agropreneur Muda (Agro-YES), Tabung Untuk Makanan (3F), Program Pembiayaan Berjangka-i, Machinery & Equipment Financing-i (MAEF-i) dan program-program pembiayaan seperti Kredit Program Peningkatan Had (CLEP), Program Agropreneur Muda (PAM), Program Pembiayaan Kumpulan (GFP), Program Pembiayaan Dana TERAS, Skim Jaminan Kredit Islam Enhancer (Enhancer-i), Skim Pembiayaan Bot Perikanan-i (SPBP-i), Skim Usahawan Tani Komersial Siswazah-i (SUTKS-i), Skim Kredit Pengeluaran Makanan-i (SKPM-i), Masyarakat Perdagangan & Perindustrian Bumiputera (MPPB - HUB), Masyarakat Perdagangan & Perindustrian Bumiputera (MPPB - DPUP), EPP8 (Food

Park/Incubator) dan Program Dana Pertanian Komersial (DPK-DANA GLC)

Kementerian sentiasa mengambil kira isu dan cabaran semasa termasuk keperluan transformasi sistem makanan untuk memastikan industri pertanian terutamanya sektor agromakanan kekal signifikan dan relevan dalam pembangunan sosioekonomi negara. Selain itu, kerangka dasar bagi elemen pemodenan dan pertanian pintar, pengukuhan akses pasaran dan produk, pembangunan modal insan, pewujudan ekosistem perniagaan dan tadbir urus yang kondusif akan terus diberi penekanan khusus. Kerajaan juga komited untuk meningkatkan pelaburan swasta dalam projek berimpak tinggi seiring dengan perkembangan Revolusi Perindustrian 4.0 (IR4.0).

Kementerian yakin melalui kolaborasi antara agensi kerajaan pusat, kerajaan negeri serta sokongan penggerak industri pertanian, ekosistem rantai bekalan makanan tempatan akan menjadi lebih mampan, berdaya tahan dan kompetitif dalam memacu pertumbuhan ekonomi, meningkatkan pendapatan pengeluar makanan serta meningkatkan tahap sara diri (SSL) setiap komoditi agromakanan. Ini sejajar dengan aspirasi, hala tuju, strategi dan pelan tindakan yang terkandung dalam Dasar Agromakanan Negara 2021-2030 (DAN 2.0) dan prinsip Agenda Pembangunan Mampan 2030 (SDG 2030).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB DATUK HAJI HASANUDDIN
BIN MOHD YUNUS [HULU LANGAT]**

TARIKH : 24 MAC 2022 (KHAMIS)

SOALAN

Datuk Haji Hasanuddin Bin Yunus [Hulu Langat] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Jabatan Kebajikan Masyarakat mempunyai rancangan untuk mewujudkan unit khas bencana di negeri-negeri agar lebih terfokus berbanding kini seorang staf melakukan pelbagai tugas termasuk bencana dan urusan lain seperti menjaga OKU atau NGO.

JAWAPAN

Tuan Yang di-Pertua,

Pengurusan bencana di setiap negeri dikendalikan oleh Jawatankuasa Pengurusan Bencana Negeri (JPBN) yang dipengerusikan oleh Setiausaha Kerajaan Negeri (SUK). Ketua Polis Negeri berperanan sebagai Komander Operasi Bencana dan Pengarah Bomba Negeri sebagai Timbalan Komander Operasi Bencana. JPBN dianggotai oleh semua agensi penyelamat utama, agensi penyelamat sokongan serta agensi-agensi dan badan-badan sukarela yang bertanggungjawab dalam memberi bantuan dan pemulihan kepada mangsa bencana.

Pengarah Kebajikan Masyarakat Negeri menganggotai JPBN sebagai agensi yang bertanggungjawab dalam memberi bantuan dan pemulihan kepada mangsa bencana. Manakala di peringkat Daerah, pengurusan

bencana diuruskan oleh Jawatankuasa Pengurusan Bencana Daerah (JPBD) yang dipengerusikan oleh Pegawai Daerah.

Sehubungan itu, Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) bertanggungjawab dalam pengurusan bencana seperti yang termaktub di bawah Arahan No 20 Majlis Keselamatan Negara (MKN 20) melibatkan pengurusan kebajikan mangsa bencana iaitu :

- 1) Menyedia dan menyelenggarakan Pusat Pemindahan Sementara (PPS) untuk mangsa bencana;
- 2) Menyedia dan mengedarkan makanan, pakaian dan barang keperluan asas untuk mangsa bencana;
- 3) Mendaftarkan mangsa bencana bagi tujuan Pemulihan;
- 4) Menjalankan bimbingan/kaunseling kepada mangsa bencana yang memerlukan.

Di bawah rasionalisasi fungsi perkhidmatan jabatan, peranan pengurusan bencana secara khusus yang melibatkan jabatan akan diberi perhatian termasuk penelitian bagi mewujudkan Unit Khas Bencana. Kementerian melalui JKM sentiasa mendapat sokongan dan kerjasama baik dari agensi-agensi lain yang terlibat serta sukarelawan dalam memainkan peranan memberi bantuan sewajarnya kepada mangsa bencana khususnya di pusat-pusat pemindahan sementara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 24 MAC 2022 (KHAMIS)

SOALAN

TUAN CHOW KON YEOW [TANJONG] minta **MENTERI KANAN PENDIDIKAN** menyatakan perincian jumlah peruntukan yang disalurkan kepada Sekolah Jenis Kebangsaan Cina (SJKC), Sekolah Menengah Jenis Kebangsaan (SMJK), Sekolah Menengah Cina Persendirian, sekolah mubaligh, Sekolah Jenis Kebangsaan Tamil (SJKT) dan sekolah Punjabi mengikut pecahan negeri sejak tahun 2018 hingga kini. Apakah kriteria pemilihan/kelayakan penerimaan bantuan disalurkan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha untuk menyediakan prasarana dan kemudahan infrastruktur pendidikan kepada semua murid di seluruh negara. Sepanjang tahun 2018 sehingga kini, KPM telah menyalurkan peruntukan untuk penyelenggaraan mengikut jenis sekolah seperti berikut:

Jenis Sekolah	Tahun 2018 (RM)	Tahun 2019 (RM)	Tahun 2020 (RM)	Tahun 2021 (RM)
Sekolah Jenis Kebangsaan Cina	49,689,537.45	50,131,416.86	30,011,556.81	52,403,145.50
Sekolah Jenis Kebangsaan Tamil	13,640,164.00	21,067,117.84	40,232,977.00	16,126,483.00
Sekolah Menengah Jenis Kebangsaan	11,710,000.00	11,600,000.00	19,503,243.15	3,583,729.00
Sekolah Mubaligh	43,150,710.00	42,880,000.00	45,170,778.00	21,195,215.00
Jumlah	118,190,411.45	125,678,534.70	134,918,554.96	93,308,572.50

Bagi tahun 2022, KPM memperuntukkan pecahan agihan untuk peruntukan penyelenggaraan SJKC, SJKT, Sekolah Mubaligh dan Sekolah Menengah Jenis Kebangsaan adalah seperti berikut:

- i. RM86.03 juta bagi Sekolah Jenis Kebangsaan Cina berstatus sekolah kerajaan dan sekolah bantuan kerajaan;
- ii. RM34.79 juta bagi Sekolah Jenis Kebangsaan Tamil berstatus sekolah kerajaan dan sekolah bantuan kerajaan;
- iii. RM24.03 juta bagi Sekolah Mubaligh berstatus sekolah kerajaan dan sekolah bantuan kerajaan; dan
- iv. RM4.77 juta bagi Sekolah Menengah Jenis Kebangsaan berstatus sekolah kerajaan dan sekolah bantuan kerajaan.

Untuk makluman Ahli Yang Berhormat, KPM telah menyediakan peruntukan bagi tujuan penyelenggaraan untuk Sekolah Kerajaan (SK) dan Sekolah Bantuan Kerajaan (SBK). Peruntukan untuk tujuan penyelenggaraan akan disalurkan berdasarkan kepada permohonan dan susunan keutamaan mengikut tahap kerosakan yang perlu dibaiki. Bagi SK, peruntukan disalurkan kepada Jabatan Pendidikan Negeri (JPN) dan Jabatan Kerja Raya (JKR) untuk pelaksanaan kerja-kerja penyelenggaraan. Bagi SBK pula, peruntukan disalurkan secara terus ke Lembaga Pengelola Sekolah (LPS) tertakluk kepada permohonan dan garis panduan yang ditetapkan.

Selain daripada peruntukan penyelenggaraan, KPM turut menampung bayaran bil utiliti mengikut bil sebenar atau sehingga maksimum RM5,000 bagi sekolah bantuan kerajaan (SBK). Bayaran utiliti ini adalah untuk bil elektrik, air dan pementungan. Bagi sekolah persendirian atau sekolah swasta, tiada sebarang peruntukan yang disalurkan oleh KPM selaras dengan perundangan dan peraturan semasa yang berkuatkuasa.

Sekian, terima kasih.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DR. AZMAN BIN ISMAIL
[KUALA KEDAH]**

TARIKH : 24 MAC 2022 (KHAMIS)

SOALAN

DR. AZMAN BIN ISMAIL [KUALA KEDAH] minta **MENTERI
PENGAJIAN TINGGI** menyatakan komitmen Kementerian untuk memastikan bahawa semua kursus-kursus di institusi pendidikan tinggi kita mencapai tahap yang memuaskan bagi pengiktirafan di persada antarabangsa.

JAWAPAN

Tan Sri Yang di-Pertua,

Kementerian Pengajian Tinggi (KPT) dengan kerjasama Universiti Awam (UA) melalui penubuhan Jawatankuasa Transformasi Program Akademik Universiti Awam telah melaksanakan transformasi penawaran program akademik UA. Transformasi ini bertujuan untuk memastikan program akademik yang hendak ditawarkan merupakan program yang relevan, terkini dan mempunyai kadar kebolehpasaran graduan yang tinggi selari dengan IR 4.0 seperti *2u2i Work Based Learning* dan sebagainya.

Transformasi program akademik ini juga dapat menjadikan UA sebagai universiti yang menyediakan pendidikan kelas dunia melalui struktur kurikulum yang berkualiti serta berdaya saing bagi memenuhi

keperluan pasaran, pembangunan sosial dan menggalakkan kemakmuran global. Dalam hal berkaitan, program kerjasama boleh dijalankan antara UA dengan institut pengajian dalam dan juga luar negara secara model pesisir, francais, Ijazah Bersama, Ijazah Dual, dan Ijazah Berganda.

Pelaksanaan program kerjasama melalui model ini merupakan satu pengiktirafan bagi program akademik di peringkat antarabangsa dan dapat menonjolkan reputasi keserjanaan UA khususnya melalui penerokaan penyelidikan, penemuan dan pengembangan ilmu serta menghasilkan teknologi dan inovasi untuk mencapai kemakmuran masyarakat dan kemajuan negara.

Selain itu, Politeknik dan Kolej Komuniti juga tidak terkecuali dalam melaksanakan transformasi penawaran program pengajian. Program-program pengajian ini diiktiraf dan diperaku oleh Agensi Kelayakan Malaysia (MQA) dan juga badan professional iaitu Lembaga Teknologis Malaysia (MBOT) dan Lembaga Jurutera Malaysia (BEM). Pengiktirafan di peringkat nasional, program TVET yang ditawarkan di Politeknik dan Kolej Komuniti juga mendapat pengiktirafan di peringkat antarabangsa. Pengiktirafan ini dilaksanakan melalui kerjasama Lembaga Jurutera dengan badan pengiktirafan antarabangsa iaitu *Sydney Accord* dan *Dublin Accord* yang juga secara tidak langsung menjadi pemangkin kepada pembangunan bakat graduan TVET yang setanding dengan kualiti antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : DR. LEE BOON CHYE [GOPENG]

TARIKH : 24 MAC 2022 (KHAMIS)

SOALAN

DR. LEE BOON CHYE [GOPENG] minta **MENTERI KEWANGAN** menyatakan jumlah hasil daripada cukai makmur setakat ini.

JAWAPAN

Tan Sri Yang di-Pertua,

Untuk makluman Ahli Yang Berhormat, melalui pembentangan Bajet 2022 Kerajaan telah melaksanakan Cukai Makmur secara *one-off* terpakai hanya kepada syarikat yang memperoleh pendapatan bercukai melebihi seratus juta ringgit (RM100 juta). Cukai pada kadar 33 peratus akan dikenakan ke atas jumlah pendapatan bercukai yang melebihi seratus juta ringgit (RM100 juta) bagi tahun taksiran 2022 sahaja. Kerajaan mensasarkan sekurang-kurangnya 3.9 bilion ringgit hasil tambahan daripada Cukai Makmur.

Memandangkan pengenaan Cukai Makmur adalah bagi tahun taksiran 2022, maka jumlah hasil dari cukai tersebut hanya boleh ditentukan setelah syarikat membuat pelaporan cukai dalam Borang Nyata Cukai Pendapatan (BNCP) bagi tahun taksiran 2022 dalam tempoh tujuh (7) bulan dari tempoh akhir tahun perakaunan syarikat. Oleh itu, jumlah hasil daripada Cukai Makmur seperti yang diminta tidak dapat dikemukakan buat masa ini. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 24 MAC 2022 (KHAMIS)

SOALAN

TUAN LOKE SIEW FOOK [SEREMBAN] minta **MENTERI KEWANGAN** menyatakan status terkini dan hala tuju syarikat Transit Acquirer Sdn Bhd yang merupakan sebuah syarikat MOF Incorporated untuk melaksanakan sistem pembayaran tanpa tunai bersepadu (ICPS) dan jumlah modal yang disuntik oleh kerajaan serta liabiliti semasa yang ditanggung oleh kerajaan.

JAWAPAN

Tan Sri Yang Di Pertua,

Pada 16 Jun 2021, Kerajaan telah memutuskan supaya Transit Acquirer Sdn Bhd (TASB) diberikan hak eksklusif untuk membangun dan mengoperasikan projek *Integrated Common Payment System* (ICPS) di Lembah Klang. Selain itu, Kerajaan turut memutuskan supaya penyertaan ekuiti pihak swasta dalam TASB bagi pelaksanaan projek ICPS dipertimbang melalui kaedah *Request for Proposal* (RFP) yang dijalankan secara tender terbuka.

Pada masa ini, proses RFP bagi penyertaan ekuiti pihak swasta dalam TASB dan pembangunan serta pengoperasian ICPS di Lembah Klang sedang dilaksanakan dan diklasifikasikan sebagai maklumat terperingkat bertaraf sulit. RFP ini dilaksanakan bagi memastikan pembida terbaik dipilih untuk membangunkan dan mengoperasikan ICPS. Kaedah ini akan dapat memastikan projek ICPS dibangunkan dan beroperasi tanpa melibatkan peruntukan Kerajaan memandangkan keutamaan Kerajaan pada masa ini adalah untuk memastikan kesejahteraan rakyat, menyokong komuniti perniagaan serta memastikan pemulihan ke arah ekonomi yang makmur dan mampan.

Selepas Kerajaan memutuskan supaya Menteri Kewangan Diperbadankan (MKD) mengambil alih TASB daripada SPAD mulai Januari 2019, Kerajaan telah menyalurkan peruntukan berjumlah RM29.22 juta dalam bentuk geran kepada TASB bagi tujuan menyelesaikan tuntutan daripada pihak kontraktor dan juga perunding projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI TIONG KING SING
[BINTULU]**

TARIKH : 24 MAC 2022 (KHAMIS)

SOALAN

DATO' SERI TIONG KING SING [BINTULU] minta **MENTERI
PERTANIAN DAN INDUSTRI MAKANAN** menyatakan:

- a) Apakah langkah-langkah pihak Kerajaan terhadap kenaikan harga makanan dunia sebanyak 28% pada tahun 2021?
- b) Apakah rancangan Kerajaan untuk menggalakkan hasil tanaman dalam negara?

JAWAPAN

Tuan Yang di-Pertua,

Untuk makluman Ahli Yang Berhormat, MAFI telah mengatur langkah strategik dalam meningkatkan produktiviti dan efisiensi sepanjang rantai nilai sektor agromakanan bagi memenuhi permintaan pasaran tempatan dalam usaha untuk menstabilkan harga makanan antaranya menerusi:

- (i) pelaksanaan Program *Smart* Sawah Berskala Besar (*Smart* SBB) yang menyasarkan peningkatan purata hasil padi per hektar daripada 3.5 tan metrik kepada 7.0 tan metrik dalam tempoh Rancangan Malaysia Kedua Belas (RMK-12) melalui pelbagai kaedah pelaksanaan seperti pertanian kontrak, sewaan dan sebagainya;
- (ii) pembangunan makanan ternakan alternatif dan pembangunan industri benih tempatan bagi mengurangkan kebergantungan negara kepada import input pertanian selain menyumbang kepada kestabilan harga makanan;
- (iii) pembangunan dan pemeraksanaan platform pemasaran produk agromakanan secara e-dagang bagi mengurangkan peranan orang tengah menerusi FAMA dan LKIM seperti Agrobazaar Online dan NEKMATBIZ serta kerjasama strategik dengan platform swasta; dan
- (iv) pemberian insentif kepada pengeluaran makanan yang selamat dan sihat bagi meningkatkan ketersediaan makanan berkhasiat dengan harga berpatutan di pasaran.

Selain itu, pelaksanaan Program *Contract Farming* di bawah MAFI juga merupakan antara inisiatif yang berteraskan usaha untuk mengawal harga ladang menerusi penetapan harga lantai. MAFI yakin inisiatif-inisiatif tersebut dapat menyumbang dalam memastikan penawaran

makanan di pasaran munasabah harganya serta mampu dibeli oleh rakyat.

Bagi menggalakkan hasil tanaman dalam negara, MAFI melalui Jabatan dan Agensi akan melaksanakan pelbagai program dan projek di bawah RMK-12. Bagi tahun 2021-2025, Jabatan Pertanian telah diluluskan 10 projek pembangunan pertanian melibatkan peruntukan sebanyak RM41.5 juta. Projek ini melibatkan agihan pelbagai insentif dan bantuan dalam bentuk *in-kind* seperti input pertanian (benih, baja dan racun), peralatan kecil pertanian, penyediaan kawasan, penyediaan sistem pengairan dan geran pemadanan bagi menggalakkan pengeluaran hasil tanaman oleh petani. Selain itu, Dasar Agromakanan Negara 2021-2030 (DAN 2.0) memberikan tumpuan khusus kepada pembangunan subsektor tanaman buah-buahan dan sayur-sayuran melalui strategi berikut:

- (i) mempergiat penyelidikan penyuntingan genom dan penggunaan bioteknologi;
- (ii) meningkatkan kecekapan pengurusan tanah jangka panjang yang melibatkan semua penggerak industri merentasi rantai nilai;
- (iii) menggalakkan amalan pertanian dan pengeluaran makanan secara mampan; dan
- (iv) melonjakkan pertumbuhan tanaman buah-buahan dan sayur-sayuran bernilai tinggi.

Melalui strategi di atas, pengeluaran buah-buahan dan sayur-sayuran akan dapat dipertingkatkan dan mencapai tahap sara diri (SSL) yang disasarkan masing-masing pada 83% dan 79% menjelang tahun 2030.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG HON WAI (BUKIT BENDERA)

TARIKH : 24 MAC 2022 (KHAMIS)

SOALAN

TUAN WONG HON WAI (BUKIT BENDERA) minta **MENTERI TENAGA DAN SUMBER ASLI** menyatakan apakah hasil penyertaan Malaysia di Persidangan ke-15 Konvesyen Biodiversiti (*15th Conference of the Parties of the Convention on Biological Diversity COP15*) yang diadakan pada tahun 2021 di Kunming, China.

JAWAPAN

Tuan Yang di-Pertua,

1. Untuk makluman Ahli Yang Berhormat, pandemik COVID-19 yang melanda dunia telah menyebabkan Persidangan *Conference of the Parties* ke-15 (COP15) yang sepatutnya diadakan pada 2021 telah dijadualkan semula secara fizikal pada 25 April hingga 8 Mei 2022 di Kunming, Republik Rakyat China.
2. COP15 dijangka akan memuktamadkan Pelan Strategik Biodiversiti 2021-2030 yang dikenali sebagai *Post-2020 Global Biodiversity Framework* (Post-2020 GBF) di mana ia telah melalui pelbagai perundingan bersama pelbagai pihak termasuk negara-negara parti, badan bukan kerajaan (NGO) dan masyarakat sivil (CSO).
3. Setelah Post-2020 GBF dimuktamadkan, dokumen ini akan menjadi asas kepada semakan semula Dasar Kepelbagaian Biologi Kebangsaan 2016-2025 (DKBK) yang menjadi panduan kepada pemeliharaan dan pemuliharaan biodiversiti merentas semua kementerian dan agensi di peringkat persekutuan, kerajaan negeri dan kerajaan tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN ANYI NGAU [BARAM]

TARIKH : 24 MAC 2022 (KHAMIS)

SOALAN

TUAN ANYI NGAU [BARAM] minta **MENTERI PERTANIAN DAN INDUSTRI MAKANAN** menyatakan langkah-langkah strategik selain bantuan kewangan yang diambil oleh pihak Kerajaan akibat kesan ekonomi COVID-19 terhadap masyarakat kawasan pedalaman/golongan B40 yang selama ini bergantung kepada kegiatan pertanian kecil-kecilan sebagai sumber pendapatan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) mengambil berat impak dialami oleh masyarakat yang terjejas dari pandemik COVID-19. MAFI telah melaksanakan pelbagai inisiatif seperti Pakej Rangsangan Ekonomi (PRE) (RM60 juta), Pakej Rangsangan Ekonomi Prihatin Rakyat (PRIHATIN) (RM190 juta), Pelan Jana Semula Ekonomi Negara (PENJANA) (RM400 juta) dan Dana Jaminan Makanan (RM490 juta). Inisiatif-inisiatif tersebut dilaksanakan bagi merancakkan semula aktiviti pertanian dan pengeluaran makanan serta mendatangkan pendapatan kepada para pengusaha.

Selain daripada peruntukan kewangan, Kementerian juga melaksanakan pelbagai inisiatif lain yang turut dapat memanfaatkan masyarakat kawasan pedalaman/golongan B40 yang menjalankan kegiatan pertanian kecil-kecilan sebagai sumber pendapatan seperti berikut:

- i. Penyediaan insentif-insentif yang bersesuaian di bawah Projek Pembangunan Jabatan/Agensi:
 - a. Perolehan input pertanian seperti anak benih, baja kimia dan organan, racun rumpai dan perosak;
 - b. Penyediaan infrastruktur ladang (pembersihan kawasan, perparitan, pagar, jalan ladang dan sistem pengairan);
 - c. Perolehan peralatan pertanian;
 - d. Bantuan pemasaran seperti tempat penyimpanan, pembungkusan dan pelabelan; dan
 - e. Prasarana pemasaran.

- ii. Galakan penggunaan platform pemasaran digital (e-dagang) dengan kerjasama dengan pihak industri. Antaranya termasuklah kerjasama dengan Shopee, Lazada, AirAsia Farm, Grab, Food Panda serta beberapa platform digital baharu seperti e-Agro. Dalam masa yang sama, MAFI juga menggalakkan para petani memasarkan hasil pertanian menggunakan platform e-dagang Agrobazaar Online (ABO) yang telah ditambahbaik. Penggunaan platform ini akan meningkatkan kebolehpasaran hasil pertanian, memperoleh capaian potensi pelanggan yang lebih besar dan dapat memberikan harga yang lebih baik tanpa melalui orang tengah.
- iii. Pelaksanaan projek-projek ekonomi merangkumi sub sektor tanaman, ternakan, perikanan, pemprosesan produk dan perniagaan tani bagi kumpulan sasaran yang berpendapatan rendah seperti Program Rezeki Tani.
- iv. Pelaksanaan kursus-kursus jangka pendek dan sederhana yang turut melibatkan kemahiran teknikal dan pembangunan produk meliputi latihan pengendalian lepas tuai, latihan teknikal pertanian dan kemahiran *softskill* di sepanjang rantai pengeluaran juga diberikan kepada golongan sasaran yang berkecukupan. Jabatan turut menawarkan khidmat nasihat teknikal dan latihan bagi pembangunan produk hiliran kepada petani yang berminat.

Sekian, terima kasih.

**PEMBERITAHUAN PERTANYAAN LISAN PM 22(5) DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 24 MAC 2022 (KHAMIS)

SOALAN

TUAN CHAN MING KAI [ALOR SETAR] minta **MENTERI KANAN PENDIDIKAN** menyatakan bilangan sekolah yang mempunyai kelas pra-PPKI di setiap negeri dan daerah serta jumlah guru dan murid di setiap daerah masing-masing.

JAWAPAN

Tuan Yang di-Pertua,

Untuk makluman Ahli Yang Berhormat, bagi data berakhir 28 Februari 2022 terdapat sebanyak 192 buah Program Pendidikan Khas Integrasi (PPKI) yang mempunyai kelas prasekolah di seluruh negara termasuk Sabah dan Sarawak. Manakala bilangan guru pendidikan khas di prasekolah PPKI adalah seramai 198 orang dengan jumlah keseluruhan 1,132 orang murid berkeperluan khas (MBK).

Data terperinci mengikut negeri dan daerah adalah seperti berikut:

Bil	Negeri	Daerah	Jumlah Sekolah	Jumlah Guru	Jumlah MBK
1	Johor	Batu Pahat	3	3	15
2	Johor	Johor Bahru	8	10	60
3	Johor	Kluang	4	4	25
4	Johor	Kota Tinggi	5	5	28
5	Johor	Kulai	1	1	7
6	Johor	Mersing	1	1	5
7	Johor	Pontian	2	2	11
8	Johor	Segamat	3	3	10
9	Johor	Tangkak	1	1	4
10	Kedah	Baling	1	1	8
11	Kedah	Bandar Baharu	1	1	3
12	Kedah	Kulim	1	1	5
13	Kedah	Kota Setar	3	3	19
14	Kedah	Kuala Muda	2	2	11
15	Kedah	Yan	1	1	4
16	Kedah	Kubang Pasu	1	1	7
17	Kedah	Langkawi	1	1	7
18	Kedah	Padang Terap	1	1	3
19	Kedah	Pendang	1	1	7
20	Kedah	Sik	1	1	5
21	Kelantan	Bachok	1	1	7
22	Kelantan	Gua Musang	1	1	4
23	Kelantan	Jeli	1	1	4
24	Kelantan	Kota Bharu	4	4	29
25	Kelantan	Kuala Krai	1	1	4

SOALAN NO : 79

Bil	Negeri	Daerah	Jumlah Sekolah	Jumlah Guru	Jumlah MBK
26	Kelantan	Machang	1	1	4
27	Kelantan	Pasir Mas	2	2	13
28	Kelantan	Pasir Putih	1	1	7
29	Kelantan	Tanah Merah	1	1	6
30	Kelantan	Tumpat	1	1	6
31	Melaka	Alor Gajah	2	2	14
32	Melaka	Jasin	2	2	16
33	Melaka	Melaka Tengah	2	2	17
34	Negeri Sembilan	Jelevu	1	1	4
35	Negeri Sembilan	Jempol	1	1	7
36	Negeri Sembilan	Port Dickson	2	2	11
37	Negeri Sembilan	Rembau	1	1	10
38	Negeri Sembilan	Seremban	3	3	19
39	Negeri Sembilan	Tampin	3	3	4
40	Pahang	Bentong	1	1	4
41	Pahang	Jerantut	1	1	6
42	Pahang	Kuantan	3	4	27
43	Pahang	Maran	1	1	7
44	Pahang	Pekan	2	2	6
45	Pahang	Raub	1	1	2
46	Pahang	Rompin	1	1	3
47	Pahang	Temerloh	2	2	14
48	Perak	Bagan Datuk	1	1	4
49	Perak	Batang Padang	1	1	8
50	Perak	Hilir Perak	2	2	12
51	Perak	Kinta	5	5	28
52	Perak	Kampar	1	1	2
53	Perak	Kerian	2	2	12
54	Perak	Kuala Kangsar	2	3	12
55	Perak	Larut Matang & Selama	4	4	24
56	Perak	Manjung	4	4	15
57	Perak	Muallim	1	1	10
58	Perak	Perak Tengah	2	2	11
59	Perlis	Perlis	6	6	26
60	Pulau Pinang	Barat Daya	2	2	10
61	Pulau Pinang	Seberang Perai Tengah	3	3	14
62	Pulau Pinang	Seberang Perai Utara	2	2	15
63	Sabah	Beaufort	1	1	7

SOALAN NO : 79

Bil	Negeri	Daerah	Jumlah Sekolah	Jumlah Guru	Jumlah MBK
64	Sabah	Membakut (Daerah Kecil)	1	1	5
65	Sabah	Kota Belud	1	1	5
66	Sabah	Kota Kinabalu	1	1	6
67	Sabah	Sandakan	1	1	7
68	Sabah	Tambunan	1	1	4
69	Sabah	Tawau	1	1	6
70	Sabah	Tuaran	1	1	5
71	Sarawak	Saribas	1	1	3
72	Sarawak	Oya/Dalat	1	1	4
73	Sarawak	Daro	1	1	1
74	Sarawak	Kanowit	1	1	3
75	Sarawak	Kuching	3	4	33
76	Sarawak	Miri	1	1	9
77	Sarawak	Mukah	1	1	8
78	Sarawak	Sarikei	1	1	6
79	Sarawak	Serian	1	1	3
80	Sarawak	Sibu	2	2	14
81	Sarawak	Sri Aman	1	1	5
82	Selangor	Gombak	1	1	5
83	Selangor	Hulu Langat	2	1	13
84	Selangor	Klang	4	4	34
85	Selangor	Kuala Langat	1	1	7
86	Selangor	Kuala Selangor	2	2	15
87	Selangor	Petaling	7	7	43
88	Selangor	Sabak Bernam	1	1	6
89	Selangor	Sepang	2	2	9
90	Terengganu	Besut	2	2	3
91	Terengganu	Dungun	2	2	9
92	Terengganu	Hulu Terengganu	1	1	3
93	Terengganu	Kemaman	1	2	10
94	Terengganu	Kuala Terengganu	2	4	19
95	Terengganu	Marang	1	1	5
96	WP Kuala Lumpur	WP Kuala Lumpur	12	11	75
97	WP Labuan	WP Labuan	1	1	7
98	WP Putrajaya	WP Putrajaya	5	5	33
Jumlah			192	198	1,132

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI ANWAR BIN IBRAHIM
[PORT DICKSON]**

TARIKH : 24 MAC 2022 (KHAMIS)

SOALAN

DATO' SERI ANWAR BIN IBRAHIM [PORT DICKSON] minta **MENTERI PERTANIAN DAN INDUSTRI MAKANAN** menyatakan tindakan terkini Kerajaan dalam pelaksanaan Dasar Sekuriti Makanan Negara khasnya dalam menangani isu berkaitan kenaikan harga makanan, kekurangan bekalan makanan dan keperluan mengimport bekalan makanan secara besar-besaran dari negara-negara asing serta meningkatkan pengeluaran tempatan makanan yang berkualiti dan mencukupi.

JAWAPAN

Tuan Yang di-Pertua,

Untuk makluman Ahli Yang Berhormat, Pelan Tindakan Dasar Sekuriti Makanan Negara (Pelan Tindakan DSMN) 2021-2025 bermatlamat untuk mengukuhkan daya tahan sistem makanan negara agar kekal stabil dan mampan dalam mengharungi sebarang krisis global mahupun domestik. Antara strategi utama yang digariskan ini termasuklah usaha-usaha untuk:

- (i) memperluaskan adaptasi teknologi dalam sistem makanan sebagai langkah pragmatik untuk meningkatkan kecekapan dan produktiviti sistem ini, berteraskan skala ekonomikal dan pertanian mampan;
- (ii) memperkasa penyelidikan dan pembangunan berteraskan sekuriti makanan ke arah meningkatkan kapasiti pengeluaran makanan dan input pertanian seperti makanan ternakan, baka dan benih berkualiti secara domestik;
- (iii) memperkasa ketersediaan data sekuriti makanan bagi mengenal pasti dan memantau tahap sekuriti makanan penduduk Malaysia berdasarkan lokaliti;
- (iv) menterjemah aspirasi “*Food Security as a Shared Responsibility*” dengan memfokuskan usaha untuk memperluas kolaborasi strategik berteraskan sekuriti makanan antara kementerian, kerajaan-kerajaan negeri dan juga sektor swasta; dan
- (v) memperkukuh tadbir urus merentas Jabatan dan Agensi untuk merapatkan jurang dalam sistem makanan bagi meningkatkan kecekapan pemantauan sekuriti makanan negara.

Dalam hal ini, strategi-strategi yang dirangka menerusi pelan ini dijangka akan menyumbang kepada ketersediaan bekalan makanan yang mencukupi, selamat, berkhasiat dengan harga berpatutan kepada rakyat secara berterusan. Ini termasuklah beberapa inisiatif berteraskan peningkatan produktiviti sektor agromakanan, antaranya:

- (i) melaksanakan Program *Smart Sawah* Berskala Besar (*Smart SBB*) yang menyasarkan peningkatan purata hasil per hektar daripada 3.5 tan metrik kepada 7.0 tan metrik dalam tempoh Rancangan Malaysia Kedua Belas (RMKe-12) melalui pelbagai kaedah pelaksanaan seperti pertanian kontrak, sewaan dan sebagainya;
- (ii) membangun dan memperkasakan platform pemasaran produk agromakanan secara e-dagang bagi mengurangkan peranan orang tengah menerusi FAMA dan LKIM seperti *Agrobazaar Online* dan NEKMATBIZ serta kerjasama strategik dengan platform swasta; dan
- (iii) membangunkan makanan ternakan alternatif dan pemerksaan industri benih tempatan bagi mengurangkan kebergantungan negara kepada import input pertanian selain menyumbang kepada kestabilan harga makanan.

MAFI yakin strategi dan usaha yang dilaksanakan menerusi Pelan Tindakan DSMN 2021-2025 ini dapat mengekalkan kelangsungan bekalan makanan negara, sama ada menerusi pemerksaan pengeluaran makanan secara domestik dan seterusnya mengurangkan kebergantungan kepada import. Pelaksanaan pelan tindakan ini akan menyumbang kebolehcapaian makanan yang munasabah harganya serta mampu dibeli oleh rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN GOBIND SINGH DEO (PUCHONG)

TARIKH : 24 MAC 2022 (SELASA)

SOALAN

TUAN GOBIND SINGH DEO (PUCHONG) minta **MENTERI TENAGA DAN SUMBER ASLI** menyatakan langkah-langkah keselamatan yang telah diambil untuk mengawal pembalakan di Pahang sehingga menyebabkan banjir yang teruk.

JAWAPAN

Tuan Yang di-Pertua,

1. Jabatan Perhutanan Pahang telah mengeluarkan arahan pemberhentian aktiviti pengusaha hasilan hutan meliputi Hutan Simpanan Kekal (HSK), Tanah Kerajaan dan Tanah Bermilik pada 3 Januari 2022. Aktiviti ekopelancongan dalam Taman Eko Rimba juga diberhentikan semasa musim tengkujuh (pertengahan bulan Disember sehingga pertengahan Januari setiap tahun) bagi mengawal kerosakan kepada permukaan jalan hutan, dirian tinggal dan juga pencemaran aliran sungai.
2. Arahan pemberhentian yang dikeluarkan oleh Jabatan Perhutanan ini bertujuan menjamin keselamatan pekerja pengusaha hasilan hutan dan juga pengunjung ke Taman Eko Rimba. Arahan pemberhentian ini juga disebabkan sebahagian besar laluan ke kawasan aktiviti pengusaha hasilan hutan dan juga aktiviti ekopelancongan dalam Taman Eko Rimba lazimnya tidak dapat dilalui kerana kejadian tanah runtuh dan dinaiki air pada musim tengkujuh.
3. Selain itu, Jabatan Perhutanan Pahang juga telah mengeluarkan arahan pembatalan lesen bagi pengusaha hasilan hutan di Bukit Makro, Maran pada 17 Januari 2022 setelah membuat penilaian berdasarkan analisis pascabanjir dan mengambil kira kepentingan awam. Arahan pembatalan lesen ini juga selari dengan Pekeliling Ketua Pengarah Perhutanan Semenanjung Malaysia yang dikeluarkan oleh JPSPM pada tahun 2016 iaitu 'Panduan Amalan Baik Hutan (*Good Forest Practices*) untuk Pengusaha Hasilan Kayu Kayan Tanah Kerajaan' yang turut menggariskan aktiviti pengusaha hasilan hutan tidak dibenarkan semasa musim tengkujuh bagi mengurangkan impak ke atas hakisan tanah dan habitat flora dan fauna.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN NURUL IZZAH BINTI ANWAR
(PERMATANG PAUH)**

TARIKH : 24 MAC 2022 (KHAMIS)

SOALAN

PUAN NURUL IZZAH BINTI ANWAR (PERMATANG PAUH) minta **MENTERI TENAGA DAN SUMBER ASLI** menyatakan langkah Kerajaan pusat mewujudkan insentif kewangan tertentu supaya Kerajaan negeri tidak menyalah guna atau terlalu bergantung kepada penjualan hasil hutan di seluruh Malaysia, memandangkan Malaysia telah kehilangan sebanyak 8.39 hektar litupan hutan dari tahun 2001 hingga 2020 menurut laporan Global Forest Watch.

JAWAPAN

Tuan Yang di-Pertua,

1. Data terkini keluasan hutan di Malaysia adalah seluas 18,273,487 hektar iaitu peningkatan sebanyak 177,869 hektar berbanding 18,095,618 hektar pada tahun 2001. Sehubungan itu, Malaysia masih mengekalkan litupan kawasan berhutan melebihi 50 peratus selaras dengan komitmen negara semasa Sidang Kemuncak Bumi di Rio de Janeiro pada 1992.

2. Kerajaan Persekutuan telah memperkenalkan *Ecological Fiscal Transfer for Biodiversity Conservation* (EFT) pada tahun 2019 sebagai satu bentuk insentif kepada Kerajaan-kerajaan Negeri bagi melindungi dan memulihara kawasan perlindungan (*protected areas* - PA). EFT menunjukkan komitmen Kerajaan Persekutuan dalam konservasi biodiversiti serta menggalakkan Kerajaan Negeriewartakan kawasan perlindungan yang merupakan kawasan penting bagi perkhidmatan

ekosistem (*ecosystem services*) termasuk sebagai kawasan tadahan air dan perlindungan hidupan liar.

3. Sejak diperkenalkan pada tahun 2019 melalui Majlis Kewangan Negara yang bersidang pada 27 Mei 2019, sebanyak RM60 juta telah diagihkan pada tahun 2019 dan RM70 juta pada tahun 2021 kepada Kerajaan-kerajaan Negeri melalui Pemberian Berdasarkan Tahap Pembangunan Ekonomi, Infrastruktur dan Kesejahteraan Hidup (TAHAP). Peruntukan EFT berjumlah RM70 juta akan disediakan dan diagihkan kepada Kerajaan-kerajaan Negeri pada tahun 2022 sebagai satu bentuk pemberian khusus di bawah Kementerian Tenaga dan Sumber Asli (KeTSA). Mekanisme pelaksanaannya telah diperkukuhkan melalui kriteria ekologi berasaskan keberhasilan.

4. Selain itu, Mekanisme *Reducing Emissions from Deforestation and Forest Degradation* (REDD Plus) telah dibangunkan di bawah *United Nations Framework Convention on Climate Change* (UNFCCC) bertujuan untuk memberikan nilai kewangan terhadap penyerapan karbon oleh hutan serta menawarkan insentif kepada negara-negara membangun bagi mengekalkan hutan dan mengurangkan pelepasan gas rumah kaca (GHG) daripada aktiviti perhutanan. KeTSA pada masa ini sedang memuktamadkan Kerangka Kewangan REDD Plus atau *REDD Plus Finance Framework* (RFF) yang merupakan satu inisiatif kewangan kepada Kerajaan Negeri bagi melaksanakan aktiviti mengekalkan dan memulihara hutan serta menjamin ekosistem hutan yang berterusan. Bagi melaksanakan pengoperasian RFF, KeTSA juga telah menubuhkan sebuah Syarikat Berhad Menurut Jaminan (CLBG) iaitu Malaysia Forest Fund atau MFF.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 24 MAC 2022 (KHAMIS)

SOALAN

PUAN TEO NIE CHING [KULAI] minta **MENTERI KEWANGAN** menyatakan peruntukan yang telah disalurkan kepada SJKC Poay Chai, Johor, SJKC Kuek Ho Yao, Johor, SJKC Sim Mow Yu, Johor dan SJKC Kuang Yu, Pulau Pinang untuk dana pembinaan sejak tahun 2020 dan senarai sekolah yang telah menerima dana pembinaan dari Kementerian Kewangan sejak tahun 2020.

JAWAPAN

Tan Sri Yang di-Pertua,

Untuk makluman Ahli Yang Berhormat, setiap tahun Kementerian Pendidikan Malaysia (KPM) akan mengenal pasti sekolah-sekolah yang memerlukan peruntukan untuk kerja-kerja penyelenggaraan, menaik taraf, membaik pulih dan pembaikan sekolah meliputi Sekolah Kerajaan dan Sekolah Bantuan Kerajaan bagi memastikan suasana pembelajaran yang kondusif. Ini merangkumi Sekolah Kebangsaan, Sekolah Jenis Kebangsaan Cina, Sekolah Jenis Kebangsaan Tamil, Sekolah Agama Rakyat serta Sekolah Tahfiz dan Institusi Pondok yang berdaftar dengan JAKIM.

Namun demikian, merujuk kepada pertanyaan YB Kulai, peruntukan yang telah disalurkan kepada sekolah-sekolah yang diutarakan adalah sebanyak RM11 juta. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2020**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 24 MAC 2022 (KHAMIS)

SOALAN

**TUAN NIK MOHAMAD ABDUH BIN NIK ABDUL AZIZ (BACHOK)
minta MENTERI PERTANIAN DAN INDUSTRI MAKANAN
menyatakan usaha dan perancangan Kementerian untuk membantu
pengusaha bot laut dalam persendirian yang terkesan dengan
pandemik COVID-19 khususnya rayuan penangguhan pelaksanaan
PLKS.**

JAWAPAN

Tuan Yang di-Pertua,

Untuk makluman Ahli Yang Berhormat, mulai 1 Januari 2022, semua kru nelayan warga asing di Malaysia diwajibkan mempunyai Pas Lawatan Kerja Sementara (PLKS) yang dikeluarkan oleh Jabatan Imigresen Malaysia (JIM). Tujuan pelaksanaan PLKS adalah untuk meregularisasikan kru-kru nelayan warga asing yang bekerja di dalam sektor perikanan untuk bekerja secara sah di atas vesel penangkapan ikan tempatan.

Pelaksanaan PLKS ke atas kru-kru nelayan asing sepatutnya telah bermula sejak tahun 2016. Walau bagaimanapun, pelaksanaan PLKS telah ditangguhkan sebanyak dua kali melalui pemberian moratorium pengecualian PLKS. Ini adalah bagi memberi tempoh masa persediaan yang mencukupi kepada pengusaha-pengusaha vesel untuk bersedia sebelum PLKS dilaksanakan sepenuhnya. Sepanjang tempoh moratorium, Kementerian Pertanian dan Industri Makanan (MAFI) telah mengadakan pelbagai sesi libat urus dengan persatuan dan pengusaha vesel bagi menerangkan keperluan mendapatkan PLKS.

Selain daripada pemberian moratorium, usaha-usaha lain yang telah dilaksanakan oleh Kementerian bagi membantu pengusaha-pengusaha vesel adalah seperti berikut:

- i. permohonan PLKS oleh kru nelayan warga asing yang telah berada di Malaysia tidak dikenakan kompaun sehingga 31 Disember 2021;
- ii. pengeluaran nota diplomatik daripada Kementerian Luar Negeri kepada Kedutaan-Kedutaan Thailand, Indonesia, Vietnam, Myanmar, Cambodia, Laos dan Filipina bagi memohon kerjasama Kedutaan untuk mempermudah pengeluaran passport antarabangsa kepada kru nelayan warga asing;

SOALAN NO : 84

- iii. memberi kebenaran masuk kepada kru-kru nelayan asing warganegara Thailand melalui jalan darat di Pintu Masuk Antarabangsa Bukit Kayu Hitam (Kedah), Wang Kelian (Perlis) dan Rantau Panjang (Kelantan). Melalui kemasukan jalan darat ini, kos pengambilan baru kru nelayan warga asing ini dapat dikurangkan berbanding kemasukan melalui udara; dan
- iv. meningkatkan had umur kru nelayan warga asing sehingga 60 tahun. Bagi sektor-sektor lain, Kementerian Dalam Negeri menetapkan umur kali pertama pekerja asing masuk ke dalam negara adalah 45 tahun ke bawah. Pengecualian umur 60 tahun ini diberikan khusus kepada sektor perikanan tangkapan sahaja.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KHALID BIN ABD SAMAD
[SHAH ALAM]**

TARIKH : 24 MAC 2022 (KHAMIS)

SOALAN

TUAN KHALID BIN ABD SAMAD [SHAH ALAM] minta **MENTERI PERTANIAN DAN INDUSTRI MAKANAN** menyatakan apakah tindakan Kementerian dalam menangani kenaikan harga dan masalah pembekalan ayam dan telur yang telah menyebabkan ketidakstabilan pasaran serta menyusahkan rakyat terbanyak.

JAWAPAN

Tuan Yang di-Pertua,

Untuk makluman Ahli Yang Berhormat, purata keperluan ayam dalam negara adalah sebanyak 2.09 juta ekor sehari atau 62.9 juta ekor sebulan. Data pengeluaran ayam yang dikeluarkan oleh Jabatan Perkhidmatan Veterinar (DVS) pada bulan Oktober 2021 adalah sebanyak 52.05 juta ekor menurun kepada 51.4 juta ekor pada bulan November 2021. Manakala pengeluaran ayam pada bulan Disember 2021 adalah sebanyak 61.1 juta ekor berbanding 62.9 juta ekor mengikut keperluan sebenar. Ini menunjukkan terdapat kekurangan bekalan di pasaran. Antara faktor-faktor yang menyebabkan berlakunya penurunan bekalan ayam tersebut adalah seperti berikut:

- (i) pengurangan pengeluaran ayam oleh pihak industri bagi mengelakkan kerugian berikutan peningkatan kos operasi pengeluaran ayam. Kos makanan ternakan menyumbang kepada 70% daripada kos pengeluaran. Komposisi makanan ayam terdiri daripada bahan mentah utama iaitu jagung dan *soybean meal* (SBM). Pada bulan Mac 2022, harga jagung telah meningkat sebanyak 110.99% kepada RM1,920/tan, berbanding bulan RM910.00/tan pada Januari 2020. Manakala harga SBM telah meningkat sebanyak 83.45% kepada RM3,070/tan pada Mac 2022, berbanding RM1,673.50/tan pada bulan Januari 2020. Kenaikan harga import bahan mentah ini disebabkan oleh kenaikan harga pasaran dunia dan kadar tukaran matawang di luar kawalan pengimport. Faktor lain yang mempengaruhi kenaikan harga ayam adalah peningkatan kos operasi di sepanjang rantai seperti kos logistik, kos pekerja dan kadar tukaran matawang asing;
- (ii) peningkatan permintaan yang mendadak berikutan pembukaan semula sektor ekonomi terutamanya perhotelan, restoran dan katering pasca Perintah Kawalan Pergerakan (PKP) mulai Oktober 2021;

- (iii) bencana banjir pada penghujung tahun 2021 yang menjejaskan industri ternakan ayam; dan
- (iv) pengurangan kemasukan anak ayam oleh pihak industri semasa musim hujan bagi mengurangkan risiko penyakit berjangkit seperti sampar ayam (*Newcastle Disease*).

Bagi memenuhi permintaan tempatan serta meringankan beban penternak, Kerajaan melaksanakan langkah jangka pendek dan jangka panjang seperti berikut:

(a) Jangka pendek

- (i) memberi kebenaran mengimport (*approved permit – AP*) kepada 36 buah syarikat untuk mengimport ayam sebanyak 36,030 tan metrik bagi tempoh Disember 2021 hingga Mei 2022 tertakluk kepada syarat-syarat yang ditetapkan;
- (ii) memberi subsidi sebanyak RM0.60/kg pada harga borong ayam hidup di ladang dan RM0.05/biji bagi telur gred A, B dan C bermula dari 5 Februari hingga 5 Jun 2022. Usaha ini dijangka memberi manfaat kepada 2,061 penternak ayam pedaging dan 194 penternak ayam penelur. Rakyat pula dapat menikmati harga ayam bulat lebih rendah iaitu RM8.90/kg dan harga telur antara RM0.39 hingga RM0.43 sebiji mengikut gred. Jumlah keseluruhan subsidi yang ditanggung oleh Kerajaan ialah sebanyak RM528.52 juta. Permohonan subsidi telah dibuka mulai 28 Februari sehingga 6 Jun 2022 melalui DVS Negeri. Untuk mendapatkan bantuan subsidi tersebut, penternak perlu mengemukakan permohonan melalui borang yang boleh didapati di laman sesawang Jabatan Perkhidmatan Veterinar www.dvs.gov.my. Semua permohonan yang dikemukakan penternak akan dinilai di peringkat lapangan di negeri dan dipertimbangkan oleh Jawatankuasa di peringkat Putrajaya untuk kelulusan tuntutan. Bagi

permohonan yang berjaya, tuntutan subsidi akan dikreditkan ke dalam akaun penternak melalui Agrobank dalam tempoh satu (1) hingga tiga (3) hari;

- (iii) memberi insentif makanan ternakan ruminan kepada penternak kecil ruminan melalui skim harga bersubsidi dedak isirung kelapa sawit (PKC) yang berjumlah RM10 juta. Dianggarkan seramai 30,000 orang penternak akan menerima bantuan dalam bentuk tunai sebanyak RM300/penternak.

(b) Jangka panjang

- (i) mengurangkan kebergantungan kepada sumber jagung import sebanyak 30% menerusi inisiatif penanaman jagung bijian dalam negara yang berkeluasan sehingga 80,000 hektar dengan sasaran pengeluaran jagung bijian tempatan sebanyak 1.44 juta tan metrik menjelang tahun 2033;
- (ii) menjalankan kajian bagi menghasilkan bahan mentah gantian dari sumber tempatan berasaskan isirung sawit seperti PKC/PKE; dan
- (iii) menawarkan pinjaman mudah sebanyak RM200 juta kepada penternak melalui Agrobank bagi membantu penternak mengatasi masalah modal pusingan kewangan yang terjejas akibat kenaikan kos pengeluaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 24 MAC 2022 (KHAMIS)

SOALAN

TUAN WONG LING BIU [SARIKEI] minta **MENTERI PERTANIAN DAN INDUSTRI MAKANAN** menyatakan apakah faktor menyebabkan kekurangan pembekalan ayam dan telur pada masa ini dan apakah langkah yang telah diambil untuk mengatasi masalah ini.

JAWAPAN

Tuan Yang di-Pertua,

Untuk makluman Ahli Yang Berhormat, purata keperluan ayam dalam negara adalah sebanyak 2.09 juta ekor sehari atau 62.9 juta ekor sebulan. Data pengeluaran ayam yang dikeluarkan oleh Jabatan Perkhidmatan Veterinar (DVS) pada bulan Oktober 2021 adalah sebanyak 52.05 juta ekor menurun kepada 51.4 juta ekor pada bulan November 2021. Manakala pengeluaran ayam pada bulan Disember 2021 adalah sebanyak 61.1 juta ekor berbanding 62.9 juta ekor mengikut keperluan sebenar. Ini menunjukkan terdapat kekurangan bekalan di pasaran. Antara faktor-faktor yang menyebabkan berlakunya penurunan bekalan ayam tersebut adalah seperti berikut:

- (i) pengurangan pengeluaran ayam oleh pihak industri bagi mengelakkan kerugian berikutan peningkatan kos operasi pengeluaran ayam. Kos makanan ternakan menyumbang kepada 70% daripada kos pengeluaran. Komposisi makanan ayam terdiri daripada bahan mentah utama iaitu jagung dan *soybean meal* (SBM). Pada bulan Mac 2022, harga jagung telah meningkat sebanyak 110.99% kepada RM1,920/tan, berbanding bulan RM910.00/tan pada Januari 2020. Manakala harga SBM telah meningkat sebanyak 83.45% kepada RM3,070/tan pada Mac 2022, berbanding RM1,673.50/tan pada bulan Januari 2020. Kenaikan harga import bahan mentah ini disebabkan oleh kenaikan harga pasaran dunia dan kadar tukaran matawang di luar kawalan pengimport. Faktor lain yang mempengaruhi kenaikan harga ayam adalah peningkatan kos operasi di sepanjang rantai seperti kos logistik, kos pekerja dan kadar tukaran matawang asing;
- (ii) peningkatan permintaan yang mendadak berikutan pembukaan semula sektor ekonomi terutamanya perhotelan, restoran dan katering pasca Perintah Kawalan Pergerakan (PKP) mulai Oktober 2021;

- (iii) bencana banjir pada penghujung tahun 2021 yang menjejaskan industri ternakan ayam; dan
- (iv) pengurangan kemasukan anak ayam oleh pihak industri semasa musim hujan bagi mengurangkan risiko penyakit berjangkit seperti sampar ayam (*Newcastle Disease*).

Bagi memenuhi permintaan tempatan serta meringankan beban penternak, Kerajaan melaksanakan langkah jangka pendek dan jangka panjang seperti berikut:

(a) Jangka pendek

- (i) memberi kebenaran mengimport (*approved permit – AP*) kepada 36 buah syarikat untuk mengimport ayam sebanyak 36,030 tan metrik bagi tempoh Disember 2021 hingga Mei 2022 tertakluk kepada syarat-syarat yang ditetapkan;
- (ii) memberi subsidi sebanyak RM0.60/kg pada harga borong ayam hidup di ladang dan RM0.05/biji bagi telur gred A, B dan C bermula dari 5 Februari hingga 5 Jun 2022. Usaha ini dijangka memberi manfaat kepada 2,061 penternak ayam pedaging dan 194 penternak ayam penelur. Rakyat pula dapat menikmati harga ayam bulat lebih rendah iaitu RM8.90/kg dan harga telur antara RM0.39 hingga RM0.43 sebiji mengikut gred. Jumlah keseluruhan subsidi yang ditanggung oleh Kerajaan ialah sebanyak RM528.52 juta. Permohonan subsidi telah dibuka mulai 28 Februari sehingga 6 Jun 2022 melalui DVS Negeri. Untuk mendapatkan bantuan subsidi tersebut, penternak perlu mengemukakan permohonan melalui borang yang boleh didapati di laman sesawang Jabatan Perkhidmatan Veterinar www.dvs.gov.my. Semua permohonan yang dikemukakan penternak akan dinilai di peringkat lapangan di negeri dan dipertimbangkan oleh Jawatankuasa di peringkat Putrajaya untuk kelulusan tuntutan. Bagi

permohonan yang berjaya, tuntutan subsidi akan dikreditkan ke dalam akaun penternak melalui Agrobank dalam tempoh satu (1) hingga tiga (3) hari;

- (iii) memberi insentif makanan ternakan ruminan kepada penternak kecil ruminan melalui skim harga bersubsidi dedak isirung kelapa sawit (PKC) yang berjumlah RM10 juta. Dianggarkan seramai 30,000 orang penternak akan menerima bantuan dalam bentuk tunai sebanyak RM300/penternak.

(b) Jangka panjang

- (i) mengurangkan kebergantungan kepada sumber jagung import sebanyak 30% menerusi inisiatif penanaman jagung bijian dalam negara yang berkeluasan sehingga 80,000 hektar dengan sasaran pengeluaran jagung bijian tempatan sebanyak 1.44 juta tan metrik menjelang tahun 2033;
- (ii) menjalankan kajian bagi menghasilkan bahan mentah gantian dari sumber tempatan berasaskan isirung sawit seperti PKC/PKE; dan
- (iii) menawarkan pinjaman mudah sebanyak RM200 juta kepada penternak melalui Agrobank bagi membantu penternak mengatasi masalah modal pusingan kewangan yang terjejas akibat kenaikan kos pengeluaran.

Sekian, terima kasih.

**PEMBERITAHUAN PERTANYAAN LISAN DI BAWAH PERATURAN
MESYUARAT 22 (5) DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 24 MAC 2022 (KHAMIS)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI KANAN PENDIDIKAN** menyatakan pelajar tercicir daripada Sekolah Rendah dan Sekolah Menengah sebelum mengakhiri Darjah 6 dan Tingkatan 5 adalah pelajar berpotensi tinggi untuk terjerat dalam gejala social. Apakah angka dan peratus pelajar yang tercicir mengikut kaum dalam 10 tahun ini dan apakah puncanya.

JAWAPAN

Tuan Yang di-Pertua,

Kementerian Pendidikan Malaysia (KPM) mendefinisikan murid cicir dengan merujuk kepada kanak-kanak warganegara Malaysia yang berumur 6+ hingga 16+ tahun yang bersekolah di sekolah KPM tetapi keluar daripada sistem sebelum tamat tempoh pendidikan. Tempoh persekolahan murid adalah daripada Tahun 1 hingga Tingkatan 5. Walau bagaimanapun, murid cicir ini tidak termasuk murid yang meninggal dunia, sakit kritikal sehingga tidak berupaya mengikuti persekolahan berdasarkan pengesahan doktor pakar, diluluskan untuk menjalani terapi rehabilitasi atau intervensi yang memerlukan tempoh masa tertentu di pusat intervensi atau pusat rehabilitasi dan berpindah ke luar negara.

Keciciran murid bumiputera di peringkat sekolah rendah KPM pada tahun 2018 adalah 0.64 berbanding tiada keciciran pada tahun 2021. Manakala bagi murid bukan bumiputera pula, peratus keciciran di sekolah KPM telah meningkat daripada sifar peratus pada tahun 2018 kepada 0.09 peratus pada tahun 2021. Keciciran peringkat sekolah menengah KPM pula menunjukkan trend menurun untuk bumiputera dan bukan bumiputera pada tahun 2021 berbanding 2018. Pada tahun 2018 murid cicir bumiputera adalah 2.18 peratus menurun kepada 0.03 peratus pada tahun 2021. Sementara murid cicir bukan bumiputera adalah 0.53 peratus pada tahun 2018 menurun kepada 0.37 peratus pada tahun 2021.

Untuk makluman Ahli Yang Berhormat, antara faktor utama yang menyebabkan keciciran murid peringkat sekolah rendah dan sekolah menengah adalah faktor kemiskinan, perceraian ibu bapa, masalah disiplin, tidak berminat untuk belajar, kurang kesedaran ibu bapa terhadap pendidikan anak-anak dan gejala sosial.

Pihak KPM telah menjalankan pelbagai aktiviti bagi mengurangkan kadar keciciran murid termasuk menambah baik kemudahan asas, memperbanyakkan program motivasi, meningkatkan kesedaran ibu bapa, memperluas program-program bantuan seperti menyediakan Biasiswa Kecil

Persekutuan, Rancangan Makanan Tambahan (RMT) dan Kumpulan Wang Amanah Pelajar Miskin (KWAPM). Selain itu, pelbagai bantuan seperti pemberian buku teks secara percuma, serta menyediakan khidmat guru kaunselor dan guru pemulihan turut disediakan bagi meningkatkan minat dan keupayaan murid untuk meneruskan persekolahan. KPM juga turut menyediakan Sekolah Model Khas Komprehensif 9 (K9) dan pembinaan asrama sekolah supaya semua kanak-kanak dapat kekal bersekolah terutamanya bagi murid di kawasan luar bandar dan pedalaman.

Garis Panduan Mengurus Murid Berisiko Cicir di Sekolah (GPMBC) telah disediakan bagi membendung isu murid yang berpotensi untuk cicir. GPMBC telah dikuatkuasakan pada 1 Jun 2018 ke semua sekolah kerajaan dan bantuan kerajaan. Pemantauan serta intervensi pihak sekolah dapat dijalankan kepada murid berisiko cicir agar mereka kekal bersekolah hingga tamat Tingkatan 5. GPMBC ini juga mempunyai objektif bagi memastikan pemantauan murid khususnya murid berisiko cicir dapat dibuat oleh pihak jabatan pendidikan negeri (JPN), pejabat pendidikan daerah (PPD) dan sekolah secara berterusan.

KPM yakin semua usaha dan inisiatif yang dirancang dan dilaksanakan ini dapat menangani isu keciciran murid dan memastikan mereka kekal dalam sistem pendidikan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 24 MAC 2022 (KHAMIS)

SOALAN

PUAN HAJAH NATRAH BINTI ISMAIL [SEKIJANG] minta
MENTERI PELANCONGAN, SENI DAN BUDAYA menyatakan :-

- (a) sejauh manakah perpustakaan desa memainkan peranan dalam mewujudkan minat membaca dalam kalangan pelajar dan orang awam; dan
- (b) berapa jumlah perpustakaan desa yang terdapat di seluruh negara dan peratus keberkesanannya.

JAWAPAN

Tuan Yang di-Pertua,

1. Peranan Perpustakaan Desa selaras dengan objektif penubuhannya iaitu menyediakan dan memberikan akses dalam pelbagai bentuk bahan maklumat kepada semua lapisan masyarakat terutama komuniti luar bandar. Peranan ini merangkumi aspek pembelajaran, pembangunan diri, kemajuan sosial dan ekonomi masyarakat. Ia juga dapat menggalakkan budaya membaca serta menangani jurang ilmu dan digital dalam kalangan masyarakat.
2. Ini dapat dilihat melalui peningkatan jumlah buku yang dibaca oleh rakyat Malaysia. Kajian profil membaca pada tahun 2005 oleh

Perpustakaan Negara Malaysia (PNM) mendapati bahawa kalangan rakyat Malaysia hanya membaca dua (2) buah buku setahun manakala kajian interim yang dilaksanakan oleh PNM pada tahun 2014 ini telah mendapati rakyat Malaysia membaca secara puratanya sebanyak 15 buah buku setahun.

3. Ini menunjukkan tabiat membaca rakyat Malaysia sebenarnya telah meningkat selari dengan pertambahan jumlah Perpustakaan Desa di Malaysia, yang secara tidak langsung telah memberi akses dan mencipta minat membaca di kalangan rakyat yang sebelum ini mungkin tidak berpeluang untuk mengamalkannya tanpa perlu berurusan jauh dari tempat tinggal mereka. Pada tahun 2020, seramai 1,769,306 orang pengunjung telah mengunjungi 1,086 buah Perpustakaan Desa di seluruh negara.

4. Perpustakaan Desa sentiasa relevan kepada komuniti luar bandar yang memerlukan akses kepada bahan maklumat bagi menyokong pembelajaran dan minat membaca masyarakat dengan perlaksanaan program galakan membaca secara maya tanpa mengira lapisan umur. Ini dapat dilihat melalui pencapaian yang diterima oleh Perpustakaan Desa Hulu Meludam, Sarawak yang telah berjaya merangkul anugerah Perpustakaan Awam Ketua Menteri Sarawak tahun 2020 melalui inisiatif program kelas dewasa. Program yang dijalankan ini telah berjaya membantu lebih 50 orang dari komuniti Hulu Meludam celik huruf.

5. Sehingga Januari 2022, sebanyak 1,086 buah Perpustakaan Desa telah diwujudkan di seluruh negara. Daripada jumlah ini, sebanyak 579 buah perpustakaan desa telah dibina di bawah Peruntukan Pembangunan Rancangan Malaysia ke-6 (RMKe-6) hingga RMKe-8 yang ditadbir urus oleh Perpustakaan Awam Negeri. Manakala 507 unit Perpustakaan Desa telah dibina di bawah Peruntukan Khas Belanja Mengurus Kerajaan Persekutuan yang ditadbir urus oleh PNM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG (TANJONG MALIM)

TARIKH : 24 MAC 2022 (KHAMIS)

SOALAN

TUAN CHANG LIH KANG (TANJONG MALIM) minta **MENTERI PEMBANGUNAN LUAR BANDAR** menyatakan berapa buah rumah yang telah dibina di bawah Program Bantuan Rumah (PBR) sejak tahun 2020 di kawasan Parlimen Tanjong Malim. Senaraikan bilangan rumah mengikut kampung.

JAWAPAN

Tuan Yang di-Pertua,

Pada tahun 2020 dan 2021, sebanyak 11 unit rumah Bina Baharu di bawah Program Bantuan Rumah (PBR) telah diluluskan bagi Parlimen Tanjong Malim. Bantuan ini melibatkan kos sebanyak RM616,000. Bilangan kampung yang terlibat adalah seperti berikut:

BIL.	NAMA KAMPUNG	BILANGAN (UNIT)
1.	Kampung Lintah, Slim Village	1
2.	Kampung Padang, Behrang Stesen	1
3.	Kampung Tengah, Kuala Slim	1
4.	Kampung Lubuk Salak, Tanjong Malim	1
5.	Rancangan Rumah Awam, Behrang Stesen	1
6.	Kampung Cegar, Bidor	1
7.	Kampung Baru, Bidor Stesen	1
8.	Kampung Perlok Baru, Sungkai	1
9.	RTB Menderang, Sungkai	1
10.	Kampung Sungai Sekiah, Behrang Ulu	2

Dalam tempoh yang sama juga, Kementerian telah meluluskan sebanyak 157 unit rumah untuk dibaik pulih bagi Parlimen Tanjong Malim. Pembaikan rumah ini melibatkan kos sebanyak RM 2.041 juta.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NOOR AMIN BIN AHMAD (KANGAR)

TARIKH : 24 MAC 2022 (KHAMIS)

SOALAN

TUAN NOOR AMIN BIN AHMAD (KANGAR) minta **MENTERI TENAGA DAN SUMBER ASLI** menyatakan apakah jenis dan berapa jumlah subsidi yang diberikan oleh Kementerian dalam rangkaian sektor penghasilan tenaga di Malaysia. Adakah ia lestari dari segi kewangan dan juga usaha Kementerian menangani perubahan iklim. Apakah kesan langkah Kementerian untuk beranjak ke sumber tenaga yang lebih bersih.

JAWAPAN

Tuan Yang Dipertua,

1. Penetapan kadar tarif elektrik di Semenanjung dan Sabah dilaksanakan melalui mekanisme *Incentive Based Regulation* (IBR). Di bawah mekanisme ini, kadar tarif asas elektrik diselaraskan setiap 3 tahun manakala perubahan kos bahan api diselaraskan setiap 6 bulan. Oleh itu, melalui mekanisme ini, tiada pemberian subsidi oleh Kerajaan bagi pembekalan elektrik di Semenanjung dan Sabah.
2. Namun begitu, berikutan impak penularan pandemik COVID-19 kepada ekonomi negara dan rakyat Malaysia, Kerajaan telah meluluskan beberapa pakej pemberian diskaun bil elektrik pada tahun 2020 dan 2021 yang melibatkan pemberian diskaun bil elektrik secara bersasar kepada pengguna domestik dan bukan domestik dengan jumlah keseluruhan peruntukan sebanyak RM3.69 bilion.
3. Selain itu, sejak tahun 2005 hingga 2021, Kerajaan Persekutuan telah menyalurkan subsidi yang terdiri daripada subsidi bahan api, subsidi solar dan subsidi sokongan tarif yang berjumlah sekitar **RM8.35 bilion** kepada Sabah Electricity Sdn. Bhd. (SESB) supaya purata tarif asas elektrik di Sabah dapat dikekalkan pada kadar 34.52 sen/kWj berbanding kos pembekalan elektrik sebenar di Sabah iaitu 43.83 sen/kWj.
4. Oleh yang demikian, bagi memastikan kemampanan operasi SESB, Kerajaan telah melaksanakan mekanisme *Incentive Based Regulation* (IBR) di Sabah bermula pada 1 Januari 2022 sehingga 31 Disember 2024 agar pemberian subsidi tahunan oleh Kerajaan Persekutuan kepada SESB dapat distrukturkan semula dan dikurangkan secara berperingkat supaya tarif elektrik yang dikenakan kepada pengguna di Sabah adalah berdasarkan kos pembekalan elektrik yang sebenar.
5. Bagi menangani impak perubahan iklim serta mengurangkan jejak karbon bagi sektor pembekalan elektrik, Kerajaan telah menetapkan perancangan yang komprehensif untuk beralih ke sumber tenaga yang lebih bersih. Ini termasuklah:

(i) Penetapan sasaran kapasiti Tenaga Boleh Baharu (TBB) kepada 40% menjelang tahun 2035 melalui pelaksanaan Malaysia Renewable Energy Roadmap (MyRER);

(ii) tiada lagi pembinaan loji janakuasa arang batu baharu bagi menggantikan loji-loji janakuasa arang batu yang tamat tempoh operasi dan merancang pembangunan loji janakuasa elektrik dari sumber yang mesra alam;

(iii) memperkenalkan '*battery energy storage system* - BESS' pada 2030 bagi menyokong pembangunan TBB; dan

(iv) penetapan sasaran 8% penjimatan penggunaan tenaga elektrik melalui usaha kecekapan tenaga menjelang tahun 2025, berbanding tahun 2016 di bawah *National Energy Efficiency Action Plan* (NEEAP).

6. Langkah-langkah peralihan tenaga ini berupaya menurunkan intensiti pelepasan karbon berbanding nilai KDNK bagi sektor bekalan elektrik kepada 45% pada tahun 2030 dan 60% pada tahun 2035, berbanding intensiti pada tahun 2005. Usaha ini juga akan menyumbang kepada aspirasi perubahan iklim negara sebagaimana yang diumumkan oleh YAB Perdana Menteri dalam pembentangan Rancangan Malaysia Ke-12.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB DATUK SERI HAJI SALAHUDDIN BIN
AYUB [PULAI]**

TARIKH : 24 MAC 2022 (KHAMIS)

SOALAN

DATUK SERI HAJI SALAHUDDIN BIN AYUB [PULAI] minta **MENTERI PEMBANGUNAN WANITA, KELUARGA DAN MASYARAKAT** menyatakan status Dasar Wanita Negara yang mula diperkenalkan pada tahun 1989 serta apakah potensi dasar sedia ada ini dalam mendepani cabaran isu-isu wanita pada ketika ini.

JAWAPAN

Tuan Yang di-Pertua,

Dasar Wanita Negara telah digubal pada 1989 dan pindaan pada 2009 dengan penambahan Pelan Tindakan Pembangunan Wanita. Dasar Wanita Negara ini mendukung prinsip tiada diskriminasi berasaskan gender seperti yang termaktub dalam Perlembagaan Persekutuan, Konvensyen Penghapusan Segala Bentuk Diskriminasi Terhadap Wanita (CEDAW), Konvensyen Mengenai Hak Kanak-kanak (CRC), Deklarasi dan Pelan Tindakan Beijing (Beijing Platform for Action), Matlamat Pembangunan Milenium (MDGs) serta Deklarasi Putrajaya dan Program Tindakan Mengenai Pembangunan Wanita Dalam Negara Anggota Pergerakan Negara-Negara Berkecuali (NAM Putrajaya Declaration).

Dasar ini bermaksud untuk memberi panduan dan hala tuju dalam usaha perancangan dan pelaksanaan pembangunan wanita atas kesedaran

bahawa kaum wanita merupakan separuh daripada penduduk negara yang gigih menyumbang kepada pembangunan negara.

Kajian Semakan Keberkesanan Dasar Wanita Negara dan Pelan Tindakan Pembangunan Wanita 2011 – 2015 telah dijalankan oleh *United Nations Development Programme* (UNDP) dan merupakan projek di bawah RMK11 iaitu melibatkan kebersamaan Dasar Wanita Negara dan Pelan Tindakan. Dapatan kajian agak membimbangkan kerana pelaksanaan dan pencapaian Dasar Wanita, dan Pelan Tindakan Pembangunan Wanita mendapati, hanya 1/3 daripada keseluruhan sasaran pelan tindakan tersebut dapat dicapai. Ini kerana tiadanya rasa kepunyaan, dalam mencapai kesaksamaan gender. Ini juga bermakna, perjalanan bagi mengangkat agenda wanita di Malaysia, masih jauh dan berliku. Walaupun hakikatnya **kita juga telah banyak melaksanakan inisiatif dan membawa perubahan kepada wanita saban tahun.**

Kementerian ini sedang giat mengemaskini Dasar Wanita Negara dan Pelan Tindakan Pembangunan Wanita agar selari dan kekal relevan dengan peredaran masa. Input daripada pelbagai sesi libat urus yang diadakan bersama-sama dengan agensi kerajaan, pihak swasta, korporat, Badan Bukan Kerajaan (NGO) dan orang perseorangan telah dijadikan rujukan dalam merangka dasar yang lebih objektif dan inklusif.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : Y.B. DATUK SERI PANGLIMA WILFRED
MADIUS TANGAU [TUARAN]**

TARIKH : 24 MAC 2022 (KHAMIS)

SOALAN

DATUK SERI PANGLIMA WILFRED MADIUS TANGAU [TUARAN] minta **MENTERI KEWANGAN** menyatakan apakah langkah-langkah yang telah, sedang dan akan diambil untuk melaksanakan penyerahan 40% pungutan cukai Persekutuan daripada Sabah kepada Kerajaan Negeri Sabah seperti mana yang telah dipersetujui dalam Perjanjian Malaysia 1963 (MA63).

JAWAPAN

Tan Sri Yang Di Pertua,

Sememangnya di awal pembentukan Malaysia, Perkara 112C Perlembagaan Persekutuan (PP) dibaca bersama subseksyen 2(1), Bahagian IV, Jadual Kesepuluh, Perlembagaan Persekutuan memperuntukkan bahawa negeri Sabah berhak menerima Pemberian Khas bersamaan dengan dua perlima ($\frac{2}{5}$) atau 40% daripada hasil bersih negeri Sabah yang dikutip oleh Kerajaan Persekutuan.

Namun, formula tersebut tidak lagi terpakai oleh kerana kajian semula ke atas Pemberian Khas telah dijalankan dan dipersetujui bersama di bawah Perkara 112D Perlembagaan Persekutuan dalam tempoh 1969 hingga 1973 serta kadar tersebut masih berkuat kuasa.

Kini, Kerajaan Persekutuan dan Kerajaan Negeri Sabah dalam proses mengkaji semula dan menambah baik Pemberian Khas selaras dengan Perkara 112D Perlembagaan Persekutuan; dan perkara tersebut akan diumumkan kelak.

Sekian, terima kasih.